

የሃኒሲ ጸፊዳ **ኑ ጎዳ ዩሱስ ኪርስቶስ ሚሺራቸ ቃላ** **ጊዶ ቆፋ**

የሃኒሳ ሚሺራቸ ቃላይ ዩሱሲ እሾ ማይኢዲ እሳ ጊዶን ቤተዳ ዴኑ ጸሳ ቃላ ጊዲዳይሳ ቆንጨሴስ። ሄሲካ አዋይ ጎዳ ጸሳ ጊዲዳይ ማላ፥ ዩሱሲካ ጎዳ ጸሳ ጊዲዳይሳ ቤሴስ። ዮሃ 1፡1፤ 8፡58፤ 12፡41፤ 20፡28። ማጸፋዚ ሎኤሊ ቆንጨሲዛ ማላ ሃይሲ ሚሺራቸ ቃላይ ጸፊተዳይ ናባቢዛይተ ዩሱሲ እስ አሺዛዴ ጊዲዲ ያና ጌቲቲዳ ጸሳ ና ጊዲዳይሳ አማናና ማላኔ አሳይ እዛ አማኒዲ ሜርና ዴኣይ ኢዛን ዲዛይሳ ኤራና ማላሳ። (20፡31)

ሚሺራቸ ቃላዛስ ኮይሮ ከፊሌይ ሜርናስ ዲዛ ጸሳ ቃላይኔ ዩሱሲ ኢሲኖ ጊዲዳይሳ ኮይሮ ሺሺዳፔ ጉዬ ዩሱሲ እስ አሺዛዴ ጊዲዲ ያና ጌቲቲዳ ጸሳ ናይ ኢዛ ጊዲዳይሳ ቤሲዛ ዲማ ዲማ ማላታታካ ሺሺስ። ሄሳፌ ቃሴ ሄ ማላታታፔ ኣይ ኣይፊይ ቤተዳኮ ቆንጨሲዛ ታሪኬቲ ካሌቲስ። ሃይሲ ሃ ከፊሌዚ ኢሲ ኢሲ አሳቲ ዩሱሳን አማኒዲ ኢዛ ካሊዛይታ ጊዲዳይሳኔ ሃራ አሳቲ ቃሴ ኢዛራ ዋኒ ኤቄቲዳኮኔ ኢዛን ኑ አማኖኮ ጊዛይሳ ዮቲቲስ። ሺምፖ 13-17 ጋካናስ ዩሱሲ ኦይኬቲዳ አማርስ ባና ካሊዛይታራ ኢዛስ ኣይ ማላ ሚኖ ኢሲፊቲሊ ዲዛኮ ኢዛስ ካቄቲሳ ዋዴይ ማቲሺን ኢዚ ባና ካሊዛይታስ ጊገሲዛ ቃላኔ ሚንፊሊዛ ቃላ ኢዚ ኢስታ ሲሲዳይሳ ቆንጨሴቲስ። ሃንኮ ኣቲዳ ጦርሴላ ሺምፖቲ ቃሴ ዩሱሲ ኦይኬቲዳይሳ፥ ፒርዳስ ሺቄዳይሳ፥ ኢዛ ካቄቲሳ ጊሻሲኔ ሃይቆፔ ዴንሳ ጊሻሲ ሄሳሶካ ኢዛ ዴንሳፌ ጉዬ ባና ካሊዛይታስ ኢዚ ባና ቆንጨሲዳይሳ ዮቲቲስ።

የሃኒሲ ዩሱስ ኪርስቶስ ባጋራ ቤቲዛ ሜርና ዴኑ ሎኤሊ ቤሲዛይ፥ ጸሳ ኪያቲሊ ሃኢፔ ዶሚዲ ዩሱሳ፥ ኦጌ፥ ቱማኔ ዴኑ ሂስቲ አማኖን ኤኪዛይታሳ። የሃኒሳ ሚሺራቸ ቃላ ሃራታፔ ዲማሲዛይ ኣያና ቱማቲላ ኤሪሳናስ ኬሂ ኤሬቲዳ ኣሲ ሃች ሃች ጎኤቲዛ ሚሻታ ሄይቲካ ሃላ፥ ቁማ፥ ፖኦ፥ ሄሚዛዴ፥ ዶርሳታ፥ ዋይኔ ሚሊኔ ዋይኔ ሚላ ኣይፌ ሚሳቲዛይታ ሌሚሶን ዮቲዛይሳ።
ሃ ማጸፋይ ኦይኪዳ ኩሜሳ ቆፋ

ጌሎሶ 1:1-18

ጸማቂዛ የሃኒሳኔ ዩሱሳ ካሊዳ ኮይሮ ታማሪታ 1:19-51

ዩሱሲ ጸሓ ኦሶ ደሚዴስ 2:1—12:50

ዩሩሳላሜኒኔ ሄ ሄራን ዩሱሳስ ወርሴላ ኦሶ ጋላሳታ 13:1—19:42

ሃይቆፔ ጎዳ ዴንፊኔ ኢዛ ቆንጨቱ 20:1-31

ኩሻ ቆፋ 21:1-25

1 ቃላይ ካሴ ኮይሮ ዴስ፡፡ ቃላይካ ጸሓ ኣቻን ዴስ፡፡ ሄ ቃላይካ ጸሓ፡፡

2 ኢዚ ኮይሮ ጸሓ ኣቻን ዴስ፡፡

3 ሜዴቱሊ ወሪ ኢዛን ሜዴቱዴስ፡፡ ሜዴቱዴዛን ኢዚ ባይንዳ ሜዴቱዴይ ኢሲናካ ዱኩ፡፡

4 ዴኦይ ኢዛን ዳወሰ፤ ሃና ዴኦይ ኣሳሰ ፖኦ፡፡

5 ፖኦይ ቆማን ፖኢሴስ፤ ቆማይ ፖኦ ሙሌካ ጸኔና፡፡

6 ጸሓፌ ከቲቲዳ የሃኒሳ ጌቲቲዛ ኢሳዳይ ዴስ፡፡

7 ኢዛ ማርካቲላን ኢሲ ወሪ ኣማናና ማላ ፖኦስ ማርካ ጌዲ ዩዴስ፡፡

8 ኢዚ ፖኦ ጌሻስ ማርካታና ዩዴስ ኣቲን ኢዚ ባ ሁኤስ ፖኦ ጌዴና፡፡

9 ኣስ ኡባሰ ፖኦ ኢሚዛ ቱሙ ፖኦይ ሃይሳ ሃ ኣላሜዛን ዩሳን ዴስ፡፡

10 ቃላይካ ካሴ ኣላሜን ዴስ፤ ኣላሜይካ ሜዴቱዴይ ኢዛና፡፡ ጌዴ ኣቲን ኣላሜይ ኢዛ ኤሪቤና፡፡

11 ኢዚ ባ ባጋታኮ ዩን ኢዛ ባጋቲ ኢዛ ኤኪቤቴና፡፡

12 ጌዴ ኣቲን ኢዛ ኤኪዳይቲ ኢዛ ሱንላን ኣማኒዳይቲ ኢሰቲ ጸሓ ናይታ ጌዴና ማላ ማታ ኢሰታስ ኢሚዴስ፡፡

13 ኢሰቲካ ጸሓ ናይታ ጌዲዳይ ጸሓፌ ዩሌቲዳ ጌሻስ ኣቲን ኣሳ ዜሬላፌ ሄሲካ ኣሳ ዋጋን ዋይኮ ኣሾ ሸኔን ጌዴና፡፡

14 ቃላይካ ኣስ ጌዲዴስ፤ ጸሓ ኪያቲላኒኔ ቱማን ኩሚዲ ኑናን ኣቂዴስ፤ ኢሲ ናስ ኣዋ ማታን ዲዛ ቦንቾ ሚሳቲዛ ኢዛ ቦንቾ ኑ ቤኢዴስ፡፡

15 የሃኒሲካ፡ «ታፔ ጉዬራ ዩዛይሲ ታፔ ኣዴስ፡፡ ጋሶይካ ኢዚ ታፔ ካሴካ ዴስ ጋዳ ታ ኢንቴስ የቲዳይሲ ሄኮ ሃይሲ ኢዛኮ!» ጌ ማርካቲዴስ፡፡

16 ኢዛ ኩሜላ ኪያቲላን ኑ ወሪ ኪያቲላ ቦላ ኪያቲላ ኤኪዴስ፡፡

17 ዋጋይ ሙሴ ባጋራ አሜቲዴስ፤ ኪያቴሊኔ ቱማይ ጊዲኮ ዩሱስ ኪርስቶስ ባጋራ ኑስ ዩዴስ።

18 ጸሰ ቤኢዳይ ኦኒካ ባ። ጊዶ አቲን ጸሳ አዋ ማታን ዲዛ ጸሳ ና ኢሶይ ጸላላ ኢዛ ቆንጨሲዴስ።

ጸማቂዛ የሃኒሳ ማርካቴል

(ማቶ 3:1-12፤ ማር 1:1-8፤ ሉቃ 3:15-17)

19 አይሁዳታ ዳናቲ ዩሩሳላሜ፤ ቴሴታኔ ለዌ ናይታ የሃኒሳኮ ከቲዳ፡ «ኔ ኦኔ?» ጊ ኦይቺሺን፤

20 የሃኒሱ፡ «ታኒ ኪርስቶስ ጊዲኬ» ጊዲ ጌሺ ማርካቴዴስ አቲን ማርካታናስ ኢዲቤና።

21 ኢስቲካ፡ «ሂስቲን ኔ ኦኔ? ኔ ኤላሳ?» ጊ ኦይቺዳ፤ ኢዚካ፡ «ጊዲኬ» ጊዲ ኢስታስ ዛሪዴስ። ኢስቲካ፡ «ኢዚ ያና ጌቲቲዳ ናቤይ ኔኔ?» ጊዳ። ኢዚካ፡ «አካይ ታና ጊዲኬ» ጊዴስ።

22 ኢስቲ ቃሴ፡ «ሂስቲን ኔ ኦኔ? ኦና ከቲዳ አሳስ ኦ የታና ማላ ኔ ኔና ኦና ጋይ?» ጊዳ።

23 ኢዚካ፡ «ናቤ አሳያሲ የቲዳ ማላ ታኒ፡ «ጸሳ ኦጌ ሱሪሲቴ» ጊሺ ባዘ ቢታን ዋሲዛዴ ቃላ ጊሪሳ» ጊዴስ።

24 ፋርሳዌታ፤ ከቲቲዳ ኢሲ ኢሲ አሳቲ፤

25 ሄሳ ጊሻስ፡ «ኔ ጸሲ ከቲዳዴ ዋይኮ ቡሮ ያና ጌቲቲዳ ናቤይ ኔና ጊዶንታ ጊዲኮ ሂስቲን አዛስ ኦና ጸማቃይ?» ጊዲ ኢዛ ኦይቺዳ።

26 የሃኒሲካ ኢስታስ፡ «ታ ሃላን ጸማቃይስ፤ ጊዶ አቲን ኢንቴ ኤርንታዴይ ኢንቴ ጊዶን ኤቂዴስ።

27 ታ፤ ጉዬራ ያናይሲ ኢዛ፤ ታ ኢዛ ጫማ ቃሾ ቢርሻናስ ቤሲዛዴ ጊዲኬ» ጊዴስ።

28 ሃይሲ ዉሪ ሃኒዳይ የሃኒሲ ጸማቂዛ የርዳኖሴ ሻፋ፤ ሄ ፒንላን ዲዛ ቢታኒያ ጌቲቲዛ ካታማና።

ጸሳ ዶርሲ

29 ዋንቴላ ጋላስ የሃኒሲ ዩሱሲ ባኮ ዩሺን ቤኢዲ፡ «ዴሬ ናጋራ ቢታፊ ዲጋና ጸሳ ዶርሲ ሄኮ ሃይሲች!

30 ታ፤ ጉዬራ ያናይሲ ኢዚ ታ፤ ካሴካ ዲዛ ጊሻስ ታ፤ አዴስ፤ ጋዶ ታ ኢንቴስ የቲዛይ ሃይሲች!

31 ታኒካ ታ ባጋራ ኢዛ ኤራቤኬ፤ ጊዲኮካ ኢዚ ኢስራኤሌ ዴሬስ ቆንጫና ማላ ታ ሃላን ጸማቃሼ ያዲስ» ጊዴስ።

32 ካሌሊዲካ የሃኒሳ ሂዘጊ ማርካቲዳስ፤ «ጸሎ አያናይ ሃራጾ ካፎ ሚሳቲዲ ሳሎፔ ዋጂሽኒኔ ኢዛ ቦላ ኡቲሽን ቤያዲስ።

33 ታ ታ ባጋራ ኢዛ ኤሪኬ ሽን ታ ሃላን ጸማቃና ማላ ታና ከቲዳዳይ፥ «ጸሎ አያናይ ኢዛ ቦላ ዋጂ ሽምፒሽን ኔ ቤያናዳይ ጸሎ አያናን ማጫናይ ኢዛ» ጊዲ ታሰ የቲዳስ።

34 ታኒካ ሄሳ ቤያዲስ። ሄሳ ጊሻሰ ኢዚ ጸሳ ና ጊዲዳይሳ ታ ማርካታይስ» ጊዳስ።

ዩሱሳ ኮይሮ ካሊዳይታ

35 ዋንቴላ ጋላስ የሃኒሳ ባና ካሊዛ ናምኣታራ ሄን ኤቂዳስ።

36 ዩሱሲ ኢዛ ኣቻራ ኣጂሽን የሃኒሳ ቤኢዲ፥ «ጸሳ ዶርሲ ሄኮ ሃይሲቸ!» ጊዳስ።

37 የሃኒሳ ካሊዛ ናምኣቲ ሄሳ ሲዩዲ ዩሱሳ ካሊዳ።

38 ኢስቲ ኢዛ ካሊሽን ዩሱሲ ጉዬ ዩዩ ጸሊዲ፥ «ኣይ ኮዬቲ?» ጊዳስ። ኢስቲካ፥ «ኣስታማሬ! ኔ ዲሳሶይ ኣዋ?» ጊዳ።

39 ኢዚካ ኢስታ፥ «ሃ ዩዲ ቤኢቲ» ጊዳስ፤ ሄሳ ጊሻሰ ቢዲ ኢዚ ኣዋን ዲዛኮ ቤኢዳኔ ሄ ጋላስ ኢዛራ ኢሲፌ ፔኢዳ፤ ዋዳይካ ጌዴ ታሙ ሳቴሶ ቢዳስ።

40 የሃኒሳ የቲዳ ቃላ ሲዩዲ ዩሱሳ ካሊዳ ናምኣታፔ ኢሶይ ሲሞና ጸጽሮሳ ኢሻ ኢንዲራሳ።

41 ኢንዲራሲ ኮይሮ ባ ኢሻ ሲሞናኮ ቢዲ፥ «ጸሲ ከቲዳ ከርስቶሳ ኑ ዴሚዶስ!» ጊዳስ።

42 ሄሳፌ ጉዬ ኢንዲራሲ ሲሞና ዩሱሳኮ ኤኪ ቢዳስ።

ዩሱሲካ ኢዛ ቲሺ ሂስቲ ጸሊዲ፥ «ሃይሶ! ኔ ዮና ና ሲሞና፤ ሃይሳፌ ጉዬ ኔ ኬፋ ጌቲታና» ጊዳስ። ኬፋ ጉሲ ጸጽሮሳ ጉሳ ዋይኮ ዛላ ሹቾ ጉሳ።

ዩሱሲ ፒሊጶሳኔ ናቲናኤሌ ጸይጊዳስ

43 ዋንቴላ ጋላስ ዩሱሲ ጋሊላ ባናስ ኮዩዳስ። ፒሊጶሳካ ዴሚዲ፥ «ታና ካላ» ጊዳስ።

44 ፒሊጶሲካ ኢንዲራሳ ማላኔ ጸጽሮሳ ማላ ቤቴሳይዳ ካታማ ኣሳ።

45 ፒሊጶሲ ናቲናኤሌ ዴሚዲ፥ «ሙሴይ ዋጋ ማጸፋን ቃሴ ናቤቲካ ቡሮፔ ሃናናይሳ የቲዛ ባ ማጸፋታን ኢዛ ጊሻሰ ጸፊዳ ኣዳዛ ኑ ዴሚዶስ። ኢዚካ ዮሴፌ ና ናዚሬቴ ዩሱሳኮ!» ጊዳስ።

46 ናቲናኤሌይ ቃሴ፥ «ናዚሬቴፔ ሎኑ ሚሺ ቤቲ ኤሪዜ?» ጊ ኦይቺን ፒሊጶሲ ኢዛ፥ «ሃ ያዳ ቤያ» ጊዳስ።

47 ናቲናኤሌይ ዩሱሳ ቤያና ዪሺን ዩሱሲ ቤኢዲ ኢዛ፥ «ሄኮ! ጌኔይ ባይንዳ ቱሙ ኢሰራኤል ኣሳ!» ጊዲ ኢዛ ጊሻሰ ዮቲዳስ።

48 ናቲናኤሌይካ ዛሪዲ፥ «ታና ዎስታ ኤራዲ?» ጊ ኦይቺን ዩሱሲካ፥ «ፒሊጶሲ ኔና ጸይጋናፔ ካሴ ባላሴ ሚላ ጋርሳን ኔ ዲሺን ታ ኔና ቤያዲስ» ጊ ዛሪዳስ።

49 ናቲናኤሌይ፥ «ኣስታማሬ! ኔ ጸሳ ና፤ ኔ ኢሰራኤል ካዎ» ጊዳስ።

50 ዩሱሲካ ኢዛስ፥ «ኔ ኣማኒዳይ፥ ታ ኔና ባላሴ ሚላ ጋርሳን ቤያዲስ» ጊዳ ጊሼ? ኔ ቡሮ ሃሳፌ ኣጂዛ ዳሮ ሚሽ ቤያና።

51 ጉጂዲካ ታ ኢንቴስ ቱሙ ጋይስ፤ ቡሮ ሳሎይ ዶዩቲን ጸሳ ኪታንቻቲ ኣሳ ና ቦላ ዎጂሺኒ ኬዚሺን ኢንቴ ቤያና» ጊዳስ።

2

ዩሱሲ ሃሌ ዎይኔ ኡሹ ኬሲዳስ

1 ሄሻንላ ጋለስ ጋለላ ጊደን ዲዛ ቃና ጌቲቲዛ ካታማን ሳርጌይ ዳስ፤ ዩሱሳ ኣዬያካ ሄን ዳዉስ።

2 ዩሱሲኔ ኢዛ ካሊዛይቲካ ሳርጌዛሶ ጸይጌቲዳ።

3 ሳርጌዛሶን ዎይኔፔ ኣጌቲዳ ኡሻይ ወሪን ዩሱሳ ኣያ ዩሱሳ፥ «ዎይኔ ኡሻይ ወሪዳስ» ጋዱስ።

4 ዩሱሲካ ኢዛ፥ «ኣዬ! ታስ ኔናራ ኣዚ ዲዜ? ታ ዎዳይ ጋኪቤና» ጊዳስ።

5 ሄ ዎዳ ዩሱሳ ኣዬያ ማራማ ሄን ጋዳዛን ዲዛ ኦሳንቻታ፥ «ኢዚ ኢንቴና ጊዛይሳ ኦሊቲ» ጋዱስ።

6 ኣይሁዳታስ ጌሾ ዎጋይ ዲዛ ጊሻሰ ሹቻፌ ሜጴቲዳ ኡሱፑን ባላቲ ሄን ዳቲስ፤ ኢስቲካ ኢሶይ ኢሶይ ናሞኡ ኦቶ ዎይኮ ሄሹ ኦቶ ሃሌ ኦይኬቲስ።

7 ዩሱሲ ኦሳንቻታ፥ «ባላታ ሃሌ ኩንሊቲ» ጊን ኢስቲካ ባላታ ደና ጋካናስ ሲልቲ ሂስቲ ኩንሊዳ።

8 ሄሳፌ ጉዬ ኦሳንቻታ፥ «ኣኔ ሃኢ ዱቂዲ ሳርጌዛ ኣላፌዛስ ኢዛፔ ኢሚቲ» ጊዳስ። ኢስቲካ ዱቂ ዱቂ ኢሚዳ።

9 ኣላፌዚካ ዎይኔ ኡሻን ላሜቲዳ ሃላ ጋንጺ ጸሊዲ ኢዚ ኣዎፔ ዩዳኮ ኤሪቤና። ሃላ ዱቂዳይቲ ጊዲኮ ኤሪቴስ፤ ሄሳ ጊሻሰ ሳርጌዛ ኣላፌይ ሚሺራዛ ጸይጊዲ፥

10 «አሲ ወሪ ሳርጌሶን ኮይሮ ሎኦ ኡሹ ሺሼሰ፤ አሳይ ማላቲዳፔ ጉዬ ኢታ ኤሄሰ፤ ጊዶ ኣቲን ኔ ጊዲኮ ሎኦ ኡሹ ሃኖ ጋካናሰ ዋላ ጋዳሳ» ጊደሰ።

11 ዩሱሲ ሄሳ ማላሊሲዛ ማላታ ኡባፌ ኮይሮ ጋሊላ ጌቴቲዛ ደሬን ቃና ካታማን ኦሒደሰ፤ ባ ቦንቸካ ሄሳ ማላን ቆንጨሲደሰ፤ ኢዛ ካሊዛይቲካ ኢዛን አማኒዳ።

12 ሄሳፌ ጉዬ ዩሱሲ ባ ኣዩይራ ባ ኢሻታራኔ ባና ካሊዛይታራ ዲጌ ቂፊርናሆሜ ዋጲዲ ሄን ጉላ ዋዴ ታኪዳ።

ጸሳ ኬላን ዛልኢዛይታ ጎዴቴሰ

(ማቶ 21:12-13፤ ማር 11:15-17፤ ሉቃ 19:45-46)

13 ኣይሁዳታ ፓዚጋ ባኣሌይ ማቲዳ ጊሻሰ ዩሱሲ ዩራሳላሚ ቢደሰ።

14 ጸሳ ኬላ ጊቤ ጊዶን ቦራታ፥ ዶርሳታኔ ሃራጴታ ባይዚዛይታ ቃሰካ ሚሹ ላሚዛይቲ ሚሹ ላሚሺን ዳሚደሰ።

15 ሄሳ ቤኢዲ ዋዶሮ ጸርቃፌ ዶቂ ኤኪዲ ኣሳኔ ቦራታካ ጸሳ ኬላ ጊቤፌ ኬሲደሰ፤ ሚሹ ላሚዛይታ ሚሻካ ጳርጨዲ ኢሰታ ጸራጴዛታካ ሺሪ ሺሪ ዩጊደሰ።

16 ሃራጴ ባይዚዛ ኣሳካ፥ «ሃይሳ ኡባ ጌዴ ዲጊቴ! ታ ኣዋ ኬላ ዛልኤ ኬሰ ሂሰቶፍቴ» ጊደሰ።

17 ሄ ዋዴ ኢዛ ካሊዛይቲ፥ «ኔ ኬላ ሚሻይ ታና ታማ ማላ ጸጌሰ» ጌቴቲ ጸፊቲዳ ቃላ ቆፓ።

18 ሄሳፌ ጉዬ ኣይሁዳ ኣሳ ሃላቃቲ ዩሱሳ፥ «ኔ ሃይሳ ወርሳ ኦላናሰ ሽኔይ ኔሰ ዲዛይሳ ቆንጨሳናሰ ኔ ኡና ኣይ ማላሊሲዛ ማላታ ቤሳኔ?» ጊ ኦይቺዳ።

19 ዩሱሲካ ኢሰታሰ፥ «ኣኔ ሃይሳ ጸሳ ኬላ ላሊቴ፤ ታ ኢዛ ሄሹ ጋላሳራ ዛራ ኬጸና» ጊ ዛሪደሰ።

20 ኢሰቲካ ኢዛ፥ «ሃይሳ ጸሳ ኬላ ኬጸናሰ ካሴ ኦይዱ ታማኔ ኡሱቸን ላይሳ ኤኪደሰ፤ ሂሰቲን ኔኒ ሄሹ ጋላሳራ ኬጸ ኩንላኔ?» ጊ ኦይቺዳ።

21 ጊዶ ኣቲን ዩሱሲ፥ «ጸሳ ኬላ» ጊዳይ ባ ኣሳቴላ ጊሻሳ።

22 ሄሳ ጊሻሰ ዩሱሲ ሃይቂ ዳንዲን ኢዛ ካሊዛይቲ ሄ ዮኦዛ ዩሺ ቆፒዲ ኤሪዳኔ ሃይሳ ካሴ ማጸፋን ጸፊቲዳይሳ ዩሱሲ ኢሰታሰ ካሴቲ ዮቲዳ ቃላ አማኒዳ።

23 ፓዚጋ ባኣሌ ጋላስ ዩሱሲ ዩሩሳላሚን ዲሼ ኦሊዳ ማላታታ ቤኢዲ ዳሮ አሳይ ኢዛ አማኒዴስ።

24 ቃሴ ዩሱሲ አሳ ኡባ ኤሪዛ ገሻስ ኦናካ አማኒቤና።

25 ኢዚ አሳ ዎዚናን ዲዛ ኡባ ኤሪዛ ገሻስ ኦኒካ ኢዛስ አሳ ገሻስ ዮታናስ ኮሺቤና።

3

ዩሱሳኔ ኒቆዲሞሳ

1 ፋርሳዌታ ባጋ አስ አይሁዳታ ሃላቃታፔ ኢሲ ኒቆዲሞሳ ጌቴቲዛ አሲ ዴስ።

2 እዚ ቃማራ ዩሱሳኮ ቢዲ፥ «አስታማሪ! ጸሲ ኢዛራ ዲዛዴ ገዲኮፌ ኣቲን ሃይታ ኔ ኦሊዛ ማላሊሲዛ ማላታታ ኦላና ዳንዳይዛዴይ ዴና፤ ሄሳ ገሻስ ኔኒ ጸሳ አታፌ ዩዳ አስታማሪ ገዲዳይሳ ኑ ኤርስ» ገዴስ።

3 ዩሱሲካ ኢዛስ ዛሪዲ፥ «ታ ኔስ ቱሙ ጋይስ፤ አሲ ናሞኣንሶ ዩሌቶንታ አጊኮ ጸሳ ካዎቴሐ ቤያናስ ዳንዳዬና» ገዴስ።

4 ኒቆዲሞሲካ ዛሪዲ፥ «ሂስቲን አሲ ጨሚዳፔ ጉዬ ዋኒዲ ናሞኣንሶ ዩሌታና ዳንዳይዜ? ቃሴካ ባ ኣዩ ኡሎን ሲሚ ጌሊዲ ዩሌታኔ?» ገዲ ኦይቺዴስ።

5 ዩሱሲካ ኢዛስ፥ «ታ ኔስ ቱሙ ጋይስ፤ አሲ ሃላፌኔ ጸሎ ኣያናፔ ዩሌቶንታ ዲሼ ጸሳ ካዎቴሐ ጌላናስ ዳንዳዬና።

6 አሳፔ ዩሌቲዳይ አሳ፤ ኣያናፔ ዩሌቲዳይ ኣያና።

7 ሄሳ ገሻስ፥ «ኢንቴ ናሞኣንሶ ዩሌታናስ ኮሺስ» ታ ኔና ገዳ ገሻስ ማላሊቶፋ።

8 ጫርኮይ ባ ኮዩዳ ባጋ ጫርኬስ፤ ኔኒ ጫርኮስ ገሪስ ሲያሳ ኣቲን ኢዚ ኣዎፔ ዩዛኮኔ ኣዎ ቢዛኮ ኤራካ። ኣያናፔ ዩሌቲዳይካ ሄሳ ማላ» ገዴስ።

9 ኒቆዲሞሲ፥ «ሃይሲ ዋኒ ሃናና ዳንዳይዜ?» ገዲ ኦይቺዴስ።

10 ዩሱሲካ ኢዛስ፥ «ኢሰራኤሌ አስታማሪ ገዳ ኡታዳ ሄሳ ኔ ኤርኪ?»

11 ታ ኔስ ቱሙ ጋይስ፤ ኑኒ ኑ ኤሪዛይሳ ዮቶስ። ኑ ቤኢዳይሳ ማርካቶስ፤ ገዶ ኣቲን ኢንቴ ኑ ማርካቴሐ ኤኬኬታ።

12 ታ ኢንቴስ ሃይሳ ሃ ቢታ ዮኑ ዮቲን ኣማኖንታ ኢጸኮ ሳሎ ሚሽ ዮቲኮ ዎስቲ ኢንቴ ኣማናኔ?

13 ሳሎፔ ዱጌ ዋዲዳ አሳ ናፔ አቲን ፑዴ ሳሎ ከዚዳይ ሃራይ ኦኒካ ዳና። *

14 «ባዘ ቢታን ሙሴይ ሸሽ ቶቄ ሂስቲ ካቂዳይሳሉ ሂሳሉካ አሳ ናይ ቶቃሶሆን ካቂታናሰ ቤሴስ።

15 ሂሴካ ኢዛን አማኒዛዴይ ወሪካ ሜርና ዴኦ ዴማናሳ።

16 ጸሳ ና አማኒዛይ ወሪ ሜርና ዴኦ ዴማናፔ አቲን ቆዮንታ ማላ ጸሲ ሃይሳ አላሜዛ ዳሮ ሲቂዳ ገሻሰ ባ ሜጺ ኢሲ ናዛ ኢሚዴስ።

17 ጸሲ ባ ናዛ ዱጌ አላሜ ከቲዳይ አላሜ አሳይ ኢዛን አማኒዱ አታና ማላሳ አቲን ኢዚ አላሜ አሳ ቦላ ፒርዳናሰ ገዴና።

18 «ኢዛ አማኒዛዴ ቦላ ፒርዴቴና። ኢዛ አማኖንታዴይ ገዲኮ ጸሳ ና ኢሲኔዛን አማኖንታ ገሻሰ ካሴካ ፒርዴቲ ኡቲዴስ።

19 ፒርዳይካ ሃይሳ ማላ፥ ፖኦይ ሃ አላሜ ዪዴስ ሺን አሳሰ ኦሶይ ኢታ ገዲዳ ገሻሰ አሳይ ፖኦፔ ኬሂ ቆማ ዶሲዴስ።

20 ኢታ ኦላዛዴይ ወሪካ ፖኦ ዶሴና። ኢዚ ኦላዛ ኢታ ኦሶይ ቆንጮ ከዘንታ ማላ ኢዚ ባ ሁኤስ ፖኦይ ዲዛሶ ከዜና።

21 ቱሙ ኦላዛዴይ ገዲኮ ፖኦይ ዲዛሶ ዬስ። ኢዚ ፖኦይ ዲዛሶ ዪዛ ጋሶይካ ጸሳ አዛዘ ማላ ኢዚ ኦላዳ ኦሶይ ቆንጮና ማላሳ» ገዴስ።

ዬሱሳኔ ጸማቂዛ የሃኒሳ

22 ሃሳፌ ጉዬ ዬሱሲ ባና ካሊዛይታራ ዩሁዳ ዴሬ ቢዴስ፤ ሄንካ አሳ ጸማቂሽ ኢሰታራ ጉላ ዋዴ ጋሞኢዴስ።

23 ሄ ዋዴ ሳለሜ አቻን ሄኖኔ ጌቲቲዛሶን ዳሮ ሃላ ዲዛ ገሻሰ የሃኒሲ አሳ ጸማቂሽን አሳይካ ኢዛኮ ቢዲ ጸማቂቲዴስ።

24 ሄ ዋዴ የሃኒሲ ቡሮ ቃሾ ከሐ ጌሊቤና።

25 ሄ ዋዴ የሃኒሳ ካሊዛይታ ገዴኒኔ ኢሲ ኢሲ አይሁዳ አሳታ ገዴን አይሁዳታ ጌሾ ዋጋ ገሻሰ ጌታ ፓላማይ ዴንዲዴስ።

26 የሃኒሳ ካሊዛይቲ ኢዛኮ ሸቂዳ፥ «አሰታማሬ! ኔናራ ዮርዳኖሴ ሻፋ ፒንላን ኢሲፌ ዲሺን ኔ ኢዛ ገሻሰ ማርካቶ አዴዚ ሄኮ ጸማቂስ፤ አሳይካ ኢዛኮ ቤስ» ገዴ።

27 የሃኒሲካ ኢሰታስ፥ «ኦናሰካ ጸሳፌ ኢሜቶንታ ዲሺን አይኮይካ ዳና ዳንዳዬና።

* 3:13 ሳሎፔ ዱጌ ዋዲዳ አሳ ናፔ አቲን ፑዴ ሳሎ ከዚዳይ ሃራይ ኦኒካ ዳና ገዛይሳ ኢሲ ኢሲ ጌሻ ማጻፋቲ ሳሎን ዲዛ አሳ ናፔ አቲን ጌቲስ። 3:14 ታይ 21:9 3:24 ማቶ 14:3፤ ማር 6:17፤ ሉቃ 3:19-20

28 «ታኒ ኢዛፔ ሲንፋታ ከቴታዲሰ አቲን ያና ጊዳ ከርሰቶሲ ታና ጊዳኬ» ጋዳ ታ ኢንቴሰ የቶይሳሰ ኢንቴ ኢንቴ ሁኤራ ታ ማርካታ።

29 ሳርጌ ዋዴ ኤካና ሚሺራይ ዲዛዴይ ኢዚካ ሚሺራ፤ ሚሺራ ላጌይ ጊዲኮ ሚሺራዛ አቻን ኤቂዲ ሚሺራዚ ጊዛዝ ሲዬሰ፤ ሚሺራዛ ቃላ ሲዬዲ ኡፋዬቴሰ፤ ሄሳ ገሻሰ ታ ኡፋይሲ ሃኢ ፖሌቴዴሰ።

30 ኢዚ ቆቁ ቆቁ ጋና ማላ ታኒካ ዚቂ ዚቂ ጋና ኮሼሰ።

31 «ቦላፌ ዪዛዴይ ኡባፌ ቦላ፤ ጋርሳ ቢታፌ ዪዛዴይ ኢዚ ቢታፌኔ ቢታዝ የቴሰ፤ ሳሎፔ ዪዛዴይ ኢዚ ኡባፌ ቦላ።

32 ኢዚ ባ ቤኢዳዚኔ ባ ሲዬዳዝ ማርካቴሰ፤ ጊዶ አቲን ኢዛ ማርካቴሰ ኤከዛዴይ ዴና።

33 ኢዛ ማርካቴሰ ኤከዛዴይ ጊዲኮ ጸሳ ቱማንቻ ጊዲዳይሳ ቆንጪሴሰ።

34 ጸሲ ከቴዳዴይ ጸሳ ቃላ የቴሰ። ጸሲካ ኢዛዴሰ ባ ኣያና ማኪ ኢሜና።

35 «ኣዋይ ባ ና ዶሴሰ። ሃኒዛ የኦ ኡባ ኢዛ ኩሼን ኣሊ ኢሜሰ።

36 ናዛን ኣማኒዛዴሰ ሜርና ዴኦይ ዴሰ። ናዛን ኣማኖንታይ ጊዲኮ ጸሳ ሃንቆይ ኢዛ ቦላ ዳና አቲን ዴኦ ዴሜና» ጊዴሰ።

4

1 ሄ ዋዴ ዬሱሲ የሃኒሳፔ ቦላራ ዳሮ አሳ ባና ካሊዛዴ ኦሊዛይሳኔ ጸማቂዛይሳ ፋርሳዌቲ ሲዬዳ።

2 ጊዶ አቲን ጸማቂዛይቲ ኢዛ ካሊዛይታፔ አቲን ኢዚ ጸማቂቤና።

3 ኢዛ ገሻሰ ሃሳዬቴዛይሳ ፋርሳዌቲ ሲዬዳይሳ ዬሱሲ ኤሪዲ ዩሁዳ ዴሬ ኣጊዲ ጋሊላ ዴሬ ሲሚ ቢዴሰ።

4 ኢዚ ሄ ቢሺን ሳማሪያራ ኣጂ ባናይሲ ኢዛሰ አቶንታዝ ጊዲዴሰ።

5 ሄሳ ገሻሰ ሲካሮ ጌቴቴዛሶ ሳማሪያ ካታማ ቢዴሰ። ሲካራ ያቆቤይ ባ ና የሱፌሰ ኢሚዳ ቢታ አቻን ዳዉሰ።

6 ሄንካ ያቆቤ ሃሳ ኦላይ ዴሰ። ዬሱሲ ኦጌ ሄሜቲ ዳቡርዳ ገሻሰ ሄ ኦላይ አቻን ኡቴዴሰ። ዋዴይካ ጋላሳፌ ኡሱፑን ሳቴ ማላ።

7 ሄ ዋዴ ኢሲ ሳማሪያ ዴሬ ማጫስ ዲዛራ ሃሌ ዱቃናስ *
ሄ ሃላ ኦላኮ ያዱስ። ዩሱሲካ ኢዞ፡ «ታና ሃሌ ኡሻ» ገዴስ።

8 ሄሲ ሃኒሺን ዩሱሳ ካሊዛይቲ ቁማ ሻማና ካታማ ቢዳ።

9 ሄና ሳማሪያ ማጫሳያ ዩሱሳ፡ «ኔ አይሁዳ አስ ገዳ ኡታዳ ዋናዳ ታና ሳማሪያ ማጫስ፡ «ሃሌ ኡሻ» ጋ ኦይቻይ?» ጋዱስ፤ ኢዛ ሄሳ ገዳይ አይሁዳ አሳሲኔ ሳማሪያ አሳስ ጋጎቴሌ ዶንታ ገሻሳ።

10 ዩሱሲካ ኢዚስ፡ «ጸሳ ኢሞታይኔ ኔና፡ «ታና ሃሌ ኡሻ» ገዛዴይ ኢዚ ኦናኮኔ ኔ ኤሪዛኮ ኔ ኢዛ ዋሳናስ ቤሴስ። ኢዚካ ኔስ ዴኦ ሃሌ ኢማናኮሺን» ገዴስ።

11 ኢዛካ ኢዛስ፡ «ጎዶ! ኔስ ሃሌ ዱቁዛ ሚሺ ዴና፤ ሃላ ኦላይካ ዳሮ ጨማ፤ ሂስቲን ኔ ዴኦ ሃላ አዋፔ ዴማኔ?

12 ኔ ሃይሳ ሃላ ኦላዛ ኮስ ኢሚዳ ኦ አዋ ያቆቤፔ አሳይ? ኢዚኔ ኢዛ ናይቲ ኢዛ ሜሄቲካ ሃይሳ ሃ ኦላፌ ሃላ ኡዱዳ» ጋዱስ።

13 ዩሱሲ ኢዚስ፡ «ሃይሳ ሃ ሃላፌ ኡዱዳይ ዉሪ ናሞኣንሉ ሳሜቲዲ ዛሪ ሃራ ኡያናሺን።

14 ታ ኢሚዛ ሃሌ ኡዱዳይ ገዲኮ ሜርናስ ሙሌካ ሳሜቲና፤ ጋሶይካ ታ ኢሚዛ ሃላ ኡዱዳይ ሜርና ዴኦስ ፑልቲዛ ፑልቶ ሃሌ ገዳና» ገዴስ።

15 ማጫሳያካ፡ «ጎዶ! ሃይሳፌ ጉዬ ታና ሃሌ ሳሞንታ ማላኔ ቃሴካ ታ ሃሌ ዱቃና ሃ ዮንታ ማላ ሄሳ ኔ ገዛ ሃላ ማላ ሃሌ ታስ ኢማርኪ?» ጋዱስ።

16 ዩሱሲካ ኢዞ፡ «ባዳ ኔ አዚና ጴይጋ ኤካዳ ያ» ገዴስ።

17 ማጫሳያካ ዛራዳ፡ «ታስ አዚናይ ዴና» ጋዱስ፤ ኢዛ ሂዝጊን ዩሱሲ፡ « ኔ ታስ አዚናይ ዴና» ጉሳይ ቱሙኮ።

18 ጋሶይካ ካሴ ኔስ ኢቻሹ አዚናቲ ዴቴስ፤ ቃሴ ሃኢ ኔናራ ዲዛይሲ ኔ አዚና ገዴና፤ ሄሳ ገሻስ ኔ ቱሙ ጋዳሳ» ገዴስ።

19 ማጫሳያ ኢዛስ፡ «ጎዶ! ኔኒ ናቤ ገዲዳይሳ ታ ሃኢ ኤራዲስ።

20 ካሴ ኦ አዋቲ ሃይሳ ዙማ ቦላ ጎይኒዳ፤ ኢንቲ ቃሴ፡ «አሳይ ጎይናናስ ቤሲዛሶይ ዩሩሳላሜንኮ!» ጌታ» ጋዱስ።

21 ዩሱሲካ ኢዚስ፡ «ሃኔ ማጫሳዬ፡ ጸሳ አዋስ ሃይሳ ዙማ ቦላ ዋይኮ ዩሩሳላሜን ኢንቲ ጎይኖንታ ዋዴይ ያናይሳ አማና።

22 ኢንቲ ኢንቲ ኤሮንታ ጸሳስ ጎይኔታ፤ ኦ ገዲኮ አሳስ አቶቴሌ አይሁዳፔ ገዲዳ ገሻስ ኦኒ ኦ ኤሪዛ ጸሳስ ጎይናስ።

* 4:7 ዱቃናስ፡ ዱቃናስ ገዛይሳ ኢሲ ኢሲ ባጋ ጋሞላ ቃላን ቲካናስ ጌቴስ።

4:9 ሂዚ 4:1-5፤ ኢያ 4:1-2

23 ጌዶ አቲን ቱሙ ጎይኒዛይቲ ጸሓ ኣዋሰ ኣያናኒኔ ቱማን ጎይኒዛ ዋዴይ ቡሮ ያና፤ ሃራይ ኣቶሺን ሃኢካ ዪዴስ። ጸሓይ ኣዋይካ ኮይዛይ ሄሳ ማላ ጎይኒዛይታ።

24 ጸሲ ባ ሁኤስ ኣያና፤ ኢዛ ጎይኒዛይቲ ኣያናኒኔ ቱማን ጎይናናስ ቤሴስ» ጌዴስ።

25 ማጫሳያካ፡ «ኪርሰቶሲ ያናይሳ ታ ኤራይስ፤ ኢዚ ዪዲ ሃኒዛዝ ኡባ ኑስ የታና» ጋዱስ።

26 ዬሱሲካ ኢዚስ፡ «ሃኢ ኔናራ ሃሳይዛይ ታ ኢዛ» ጌዴስ።

27 ሄሲ ሃኒሺን ኢዛ ካሊዛይቲ ባ ቢዳሶፕ ሰሚዳ። ዬሱሲ ማጫሳራ ሃሳይዛይሳ ማላሌቲዳ፤ ጌዶ አቲን፡ «ሃኔ ኣይ ኮያይ? ዋይኮ ሃኒራ ኣዛስ ሃሳያይ?» ጌዱ ኦኒካ ኦይቸቤና።

28 ሄሳፌ ጉዬ ማጫሳያ ኦቶዛ ሄን ኣጋጋዳ ጌዴ ካታማ ባዳ ኣሳስ፡

29 «ታ ኦሊዳዝ ዉርሲ ታስ የቲዳዴ ሃ ዪዲ ቤኢቲ፤ ኦኔ ኤሪዛይ ጸሲ ቲይዳ ኪርሰቶሲ ኢዛኮኔ!» ጋዱስ።

30 ኣሳይካ ካታማፕ ኬዚዲ ዬሱሳኮ ቢዴስ።

31 ሄ ዋዴ ዬሱሳ ካሊዛይቲ ዬሱሳ፡ «ኣስታማሬ! ቁማ ማ» ጌዱ ዋሲዳ።

32 ኢዚ ቃሴ፡ «ኢንቲ ኤርንታይ ታ ሚዛ ቁማይ ታስ ዴስ» ጌዴስ።

33 ሄሳ ጊሻስ ኢዛ ካሊዛይቲ፡ «ኣይኮ ሚዛ ካሐ ኣሲ ኢዛስ ኤሄዴሻ?» ጌዱ ባ ጌዶን ሃሳዬቲዳ

34 ዬሱሲካ ኢስታስ ዛሪዲ፡ «ታ ቁማይ ታና ኪቲዳ ታ ኣዋ ሼኔ ኦሶኔ ኢዛ ኦሶ ፖሎ።

35 ኢንቲ ቃሴ፡ «ካላ ማጸይ ጋካናስ ቡሮ ኦይዱ ኣጊናይ ኣቲዴስ» ጌታ ጌዴኬቲ? ቃሴ ታኒ ጌዲኮ ኢንቲና፤ «ቋቋ ጌዲ ካሳይ ማጸ ጋኪዳይሳ ጸለቱ» ጋይስ።

36 ማጸዚዛይ ባ ዳሞዛ ኤካና፤ ሜርናስ ጌዲዛ ኣይፌ ሺሻና፤ ሄሳ ጊሻስ ዜሪዛዴይኔ ማጸዚዛይ ኢሲፌ ኡፋይታና።

37 ሄሳ ጊሻስ ኢሳዴይ ዜራና፤ ሃራ ኣሲ ማጸና ጌቲቲዛ ሌሚሶይ ቱማ።

38 ታ ኢንቲና ኢንቲ ዳቡርንታይሳ ማጸና ማላ ዬዳዲስ፤ ሃራቲ ኦሶን ዳቡርዳ፤ ጌዶ አቲን ኢንቲ ኢስታ ዳቡርሳን ጎኤቲዴታ» ጌዴስ።

39 ማጫሳያ፡ «ታ ኦሊዳዝ ኡባ ታስ ኢዚ የቲዴስ» ጋዳ ኣሳስ ማርካቲዳ ማላ ካታማፕ ዳር ሳማሪያ ኣሳይ ኢዛን ኣማኒዴስ።

40 ሄሳ ጊሻስ ሳማሪያ ኣሳይ ዬሱሳኮ ዪዲ ኢዚ ኢስታኮን ጋሞኣና ማላ ዋሲዴስ፤ ኢዚካ ናሞኡ ጋላስ ሄን ጋሞኢዴስ።

41 ኢዛ ቃላ ሲዱዲ ዳሮ አሳይ ኢዛ አማኒዴስ።

42 ማጫሳዮካ፥ «ሃኢ ኑ ኢዛ አማኒዛይ ኔ ዮተዳ ቃላ ገሻስ ጸላ ገደንታ ኑኒካ ኑ ባጋራ ኢዛ፤ ሲዱዳ ገሻሲኔ ቱማ፤ ኢዚ ዴሬ አሽዛዴ ገዲዳይሳ ኤሪዳ ገሻሳ» ገዳ።

ዬሱሲ ሹማዛ ናዛ ፓሊዴስ

43 ዬሱሲ ሳማሪያን ናምኡ ጋላስ ጋምኢዳ፤ ጉዬ ጋለላ ቢዴስ።

44 ኢዚ ባ ባጋራ፥ «ናቤይ ባ ዴሬን ቦንቹቴና» ገ ዮተዴስ።

45 ገደ አቲን ኢዚ ጋለላ ቢን ጋለላ አሳይ ኢዛ ሎኤላ ሞኪ ኤኪዴስ፤ ጋሶይካ ፓዚጋ ባኣሌ ቦንቻና ዬሩሳላሜ ቢዳሶን ሄን ዲሺን ኢዚ ኦሊዳይሳ ወርሲ ቤኢዳ ገሻሳ።

46 ሄሳፌ ጉዬ ዬሱሲ ሃሌ ዎይኔ ጫጃ ኦሊዳ ጋለላ ዴሬ ገደን ዲዛ ቃና ጌቴተዛ ካታማ ናምኣንሶ ቢዴስ። ሄ ዎዴ ቂፊርናሆማን ኢዛስ ናይ ሳኬቲዳ ኢሲ ካዎ ሹማይ ዴስ።

47 ኢዚካ ዬሱሲ ዩሁዳ ዴሬ፤ ጌዴ ጋለላ ዩዳይሳ ሲዱዲ ዬሱሳኮ ቢዴስ። ዬሱሲ ዲጌ ቂፊርናሆማ ዎፋና ማላኔ ዳሮ ሳኬቲዳ ሃይቃና ገዛ ናዛ ፓላና ማላ ዬሱሳ ዎሲዴስ።

48 ዬሱሲካ ኢዛስ፥ «ኢንቲ ገታ ማላታታኔ ማላሊሲዛዝ ቤኦንታ ኣይኮካ አማኔኬታ» ገዴስ።

49 ሹማዚካ ዛሪዲ፥ «ጎዶ! ታ ናዚ ሃይቆንታ ኤሌላ ዎፋርኪ!» ገዴስ።

50 ዬሱሲካ ኢዛ፥ «ኔኒ ኔሶ ባ! ናዚ ፓጺዴስ» ገዴስ፤ ኣዴዚካ ዬሱሲ ኢዛስ ዮተዳ ቃላ አማኒዲ ሶ ሲሚ ቢዴስ።

51 ኢዚ ሶ ቢሺን ኢዛ አሽካራቲ ኢዛራ ኦጌን ጋገዲ፥ «ኔ ናዚ ፓጺዴስ» ገዲ ኢዛስ ዮተዳ።

52 ሹማዚካ ናዚ ኣይ ሳቴን ፓጺዳኮ ኢስታ ዛሪ ኦይቹዴስ። ኢስቲካ ኢዛስ፥ «ቃማ† ጋላሳፌ ላፑን ሳቴን ኢዛ ሚቹዛይሲ ኣገዴስ» ገዳ።

53 ናዛ አዎይካ ዬሱሲ፥ «ኔ ናዚ ፓጺዴስ» ገዳይ ሄ ኢስቲ ኢዛስ ዮተዛ ዎዴ ገዲዳይሳ ኤሪዴስ። ሄሳ ገሻስ ሄ ጋላሳፌ ኦይኪዲ ኢዚኔ ኢዛሶ አሳይ ወሪ ዬሱሳ አማኒዳ።

54 ሃይሲ ማላታይ ዬሱሲ ዩሁዳ፤ ጋለላ ዩዲ ኦሊዳ ናምኣንሶ ማላታ።

4:44 ማቶ 13:57፤ ማር 6:4፤ ሉቃ 4:24 4:45 ዮሃ 2:23 4:46 ዮሃ 2:1-11 † 4:52 ቃማ፡ ቃማ ገዛይሳ ኢሲ ኢሲ ባጋ ጋሞሶ ቃላን ዘኔ ጌቴስ።

5

ዬሱሲ ፓሊዳ ቶሆ ሲላ አዳዛ

¹ ሄሳፌ ካሊዲ አይሁዳታ ባኣሌይ ዲዛ ጊሻሰ ዬሱሲ ዬሩሳሌም ቢደሰ።

² ዬሩሳሌምን ደርሲ ጌሊዛ ፔንጌ አቻን ኢብራዌታ ቃላራ፥ «ቤተሳይዳ»* ጌቴቲዛ ኢሲ ፑልቶፌ ሸቂዲ ኤሊዳ ሃሊ ዴሰ፤ ኢዛፔ ቦላራ ካማይ ዲዛ ኢቻሹ ኦጌቲ ዴቴሰ።

³ ዳሮ ሃርጋንቻቲ፥ አይፌ ቆቂቲ፥ ቶሆ ዋቤቲኔ ቶሆ ሲላቲ ኦጌ ቦላ ኢቺዲ ሃሊ ቃጾታና ጋካናሰ ናጌቴሰ።

⁴ ኢሲ ኢሲ ዋዴ ጎዳ ኪታንቻይ ሃላን ዋዲዲ ሃላ ቃሌሰ፤ ሃላ ቃላፌ ካሊዲ ኮይሮቲዲ ሃላን ጌሊዛ ሃርጋንቻይ ባና ሳኪዛ አይ ሃርጌፌካ ፓጼሰ። †

⁵ ሄን ሄሹ ታማኔ ኦሰፑን ላይላ ኩሜላ ሳኬቲዳ ኢሳዴይ ዴሰ።

⁶ ዬሱሲ አዳዚ ሄን ኢቺዳይሳ ቤኢዲኔ ኢዚ ዳሮ ላይላ ሳኬቲዳይሳ ኤሪዳ፥ «ኔ ፓጻና ኮያይ?» ጌዴሰ።

⁷ ሃርጋንቻዚካ ዛሪዲ፥ «ጎዶ! ሃላይ ቃጾቲዛ ዋዴ ታና ሃላን ጌልሊዛ አሲ ዴና፤ ታ ቡሮ ባና ጊሺን ሃራይ ታፔ ካሰቲ ሃላን ጌሌሰ» ጌዴሰ።

⁸ ዬሱሲካ ኢዛ፥ «ዴንዳ! ኔ ኢቺዳ አልጋ ቶካዳ ባ!» ጌዴሰ።

⁹ አዳዚካ ሄራካ ፓጼዴሰ፤ ባ አልጋ ቶኪ ኤኪዲ ቢዴሰ። ሄሲ ሃኒዳይ አይሁዳታ ሳምባታ ጋላሳ።

¹⁰ ሄሳ ጊሻሰ አይሁዳታ ሃላቃቲ ፓጼዳ አዳዛ፥ «ሃኙ ሳምባታራ ኔ አልጋ ቶካና ማላ ሙሴ ዋጋይ አዛዜና» ጌዳ።

¹¹ ኢዚካ ኢሰታሰ፥ « ኔ ኢቺዳ አልጋ ቶካዳ ባ» ጌ ዮቲዴሰ» ጌዴሰ።

¹² ኢሰቲካ፥ «ኔና አልጋ ቶካዳ ባ ጌዳይ ኦኔ?» ጌ ኦይቺዳ።

¹³ ዴሬይ ዳሪዳ ጊሻሲኔ ዬሱሲ ሄፔ ሃኪ ቢዳ ጊሻሰ ኢዛ ኦኒ ፓሊዳኮ አዳዚ ኤሪቤና።

* 5:2 ቤተሳይዳ፡ ቤተሳይዳ ኢሲ ኢሲ ጌሻ ማጻፋቲ፥ «ቤተዛታ» ጊሺን ሃራቲ፥ «ቤተሳይዳ» ጌቴሰ፤ ቢርሺላይካ፥ «ማሮቴላ ኬላ» ጉሳ። † 5:4 ኢሲ ኢሲ ጌሻ ማጻፋቲ ታይቦ ሄሻሰ ወርሴላ ቦላፌ ቢዲ ኦይዳ ወርሴላ ጋካናሰ ዲዛ ቆፋ ጉጃቲና።

14 ሄሳፌ ጉዬ ዬሱሲ አዳዛ ጸሳ ከላን ዳሚዲ፡ «ሄኮ ሃኢ ኔ ፓጸዳሳ፤ ካሴይሳፌ አፂዛ ኢታ ሚሺ ኔ ቦላ ጋኮንታ ማላ ናጋራ ናምእንሶ ኦሶፋ» ጊደሰ።

15 አዳዛካ ቢዲኔ ኢዛ ፓሊዳይ ዬሱሳ ጊዲዳይሳ አይሁዳታ ሃላቃታሰ ዮቲደሰ።

16 አዳዛ ሳምባታ ጋላሰ ፓሊዳ ጊሻሰ አይሁዳታ ዳናቲ ዬሱሳ ኦይካና ዬዳሊዳ።

17 ዬሱሲካ ኢሰታሰ፡ «ታ አዋይ ኡባ ዋዴ ኦሌስ፤ ታኒካ ኦላና» ጊደሰ፤

18 ሄሳ ጋሶን አይሁዳታ ዳናቲ ዬሱሳ ዋቆና ማላ ካሴፔ አሊ ዴንሌሊዳ። ቃሴ ኢዚ ሳምባታ ሞሪዳ ጊሻሰ ጸላ ጊዶንታ፡ «ጸሲ ታ አዋ» ጊዳ ጊሻሲኔ ባና ጸሳራ ጊኒሲዳ ጊሻሳ።

ጸሳ ና ጎዳቴል

19 ዬሱሲ ኢሰታሰ፡ «ታ ኢንቴሰ ቱሙ ጋይሰ፤ አዋይ ኦሊሺን ቤኢዳይሳ ኦሶፔ አቲን ናዚ ባ ሸኔን አይኮካ ኦሌና። አዋይ ኦሊዛይሳ ኢዛ ናይ ሄሳላካ ኦሌሰ።

20 ጋሶይካ አዋይ ናዛ ዶሴሰ። ባ ኦሊዛይሳካ ወርሲ ኢዛ ቤሴሰ፤ ኢንቴ ማላሌታና ማላ ሃይሳፌካ አፂዛ ኦሶ ቡሮ ቤሳና።

21 አዋይ ሃይቁዳይታ ዴንሊዛይሳኦ ዴኦ አሚዛይሳሶ ናዚካ ሄሳሶ ባ ኮዬዲዴሰ ዴኦ አሚና።

22 አዋይ ኦና ቦላካ ፒርዴና፤ ጊዶ አቲን ፒርዳ ማታ ኡባ ባ ናዛሰ አሚደሰ።

23 ኢዚ ሄሳሶ ኦሊዳይ አሳይ ወሪ አዋ ቦንቻና ማላኔ ቃሴካ ናዛካ ቦንቻና ማላሳ። ናዛ ቦንቻንታይ ናዛ ከቲዳ አዋካ ቦንቹና።

24 «ታ ኢንቴሰ ቱማ ጋይሰ፤ ታ ቃላ ሲዬዛዴሰኔ ታና ከቲዳዴን አማኒዛዴሰ ሜርና ዴኦይ ዴሰ። ኢዛዴይ ሃይቆፔ ጌዴ ዴኦን ፒኒዴሰ አቲን ኢዛ ቦላ ፒርዴቴና።

25 ታ ኢንቴሰ ቱማ ጋይሰ፤ ካሴ ሃይቁዳ አሳቲ ጸሳ ና ቃላ ሲዬዛ ዋዴይ ያና፤ ሄ ዋዴያካ ሃኖ፤ ሲዬዛይቲ ወሪ ዴኦን ዳና።

26 ጋሶይካ አዋይ ባ ባጋራ ዴኦይ ዲዛ ማላ ናዚካ ባ ባጋራ ዴኦይ ዳና ማላ ኦሊዴሰ።

27 ኢዚ አሳ ና ጊዲዳ ጊሻሰ ፒርዳና ማላ ጎዳቴል ኢዛሰ አሚደሰ።

28 ሃይሳን አይኮካ ማላሌቶፍቴ። ጋሶይካ ካሴ ሃይቁዲ ዱፎን ዲዛይቲ ወሪ ኢዛ ቃላ ጊሪሰ ሲዬዛ ዋዴይ ያና።

29 ሎኦ ኦሊዳይቲ ሃይቆፔ ዴንዲዲ ፓጸና። ጊዶ አቲን ኢታ ኦሊዳይቲ ሃይቆፔ ዴንዲዲ ፒርዴታና።

ዬሱሳስ ማርካቲዳ አሳታ

30 «ታኒ ታ ሼኔን አይኮካ አላናስ ዳንዳይኬ፤ ጊዶ አቲን ታ አዋፔ ታ ሲዱዳ ማላ ፒርዳይስ። ታና ከቲዳይሳ ሼኔ ኦላይስ አቲን ታ ሼኔን ታ አላንታ ገሻስ ታ ፒርዳን ባላይ ባ።

31 ታኒ ታ ገሻስ ታርካ ማርካቲኮ ታ ማርካይ ቱሙ ጊዳና።

32 ጊዶ አቲን ታ ገሻስ ማርካቲዳይ ሃራይ ዴስ፤ ኢዚካ ታ ገሻስ ማርካቲዳይ ማርካቲዳይ ቱሙ ጊዱዳይሳ ታ ኤራይስ።

33 አንቴ ዮሃንሳኮ አሴ ከቲዳታ ሺን ኢዚካ ቱሙ ማርካቲዳስ።

34 ታ ሃይሳ ጊዛይ አንቴ አታና ማላ አቲን ታስ ሃራ ማርካቲል ኮሺዳ ገሻስ ጊዳና።

35 ዮሃንሲ ኤዲዲ ፖኢሲዛ ፖኦ ማላ። አንቴካ ጉላ ዋዴ ኢዛ ፖኦን ኡፋዬታና ኮዪዳታ።

36 ታስ ጊዲኮ ዮሃንሳ ማርካቲዳፌ አፂዛ ማርካይ ዴስ። ታ ማርካይካ ታ አዋይ ታስ ኢሚዳ ኦሶ። ሄሲካ ታ አሊዛ ኦሶይ ታ አዋይ ታና ከቲዳይሳ ታስ ማርካቲስ።

37 ታና ከቲዳ ታ አዋይካ ባ ሁኤራ ታስ ማርካቲዳስ። አንቴ ጊዲኮ ኢዛ ቃላ ገሪስ ሙሌካ ሲዬቤኬታ፤ ኢዛስ ሜፋካ ሙሌራ ቤዬቤኬታ።

38 ኢዚ ከቲዳዴን አንቴ አማኖንታ ገሻስ ኢዛ ቃላይ አንቴ አቻን ዴና።

39 አንቴስ ጌሻ ማጸፋታፔ ሜርና ዴኦ ዴማናስ ሚሳቲን ማጸፋታ ፒልጌታ፤ ማጸፋቲካ ታ ገሻስ ማርካቲቲስ።

40 ጊዶ አቲን አንቴ ዴኦ ዴማናስ ታኮ ሃ ያና ኮዬኬታ።

41 «ታኒ አሳፔ ቦንቾ ኮይኬ።

42 ታ አንቴና ኤራይስ፤ ጸሳ ሲቆይ አንቴናን ባይንዳይሳካ ኤራይስ።

43 ታኒ ታ አዋ ሱንላን ያዲስ ሺን አንቴ ታና ሞኪ ኤኪቤኬታ። ሃራ አሲ ቃሴ ባ ሱንላን ዪኮ አንቴ ኢዛ ሞኪ ኤኬታ።

44 አንቴ አንቴ ጊዶን ኢሶይ ኢሳፌ ቦንቾ ኮይዛይቶ! ኢሲ ጸሳፌ ቤቲዛ ቦንቾ ኮዮንታይቶ አንቴ ዋኒዲ ታና አማናና ዳንዳይቲ?

45 ታ አዋ ሱንላን አንቴና ሞታናይ አንቴስ ታና ሚሳቶፖ፤ አንቴና ሞታናይ አንቴ ኢዛ ሂዶታ አሊዛ ሙሴ።

46 ሙሴይ ታ ገሻስ ጸፊዳይሳ አማኒዳኮ አንቴ ታና አማናና።

47 ኢዚ ጸፊዳይሳ ኢንቴ ኣማኖንታ ኣጊኮ ቃሴ ታ ቃላ ኢንቴ ዋኒ ኣማናኔ?» ጊዴስ።

6

ዮሱሲ ሚዚዳ ኢቻሹ ሺ ኣሳ

(ማቶ 14:13-21፤ ማር 6:30-44፤ ሉቃ 9:10-17)

1 ሃሳፌ ጉዬ ዮሱሲ ጸቢራዶሴ ጌቴቴዛሶ ጋሊላ ኣባፌ ሄ ፒንላ ፒኒዴስ።

2 ዮሱሲ ሃርጋንቻታ ፓሊዳ ማላታ ቤኢዳ ጊሻስ ዳሮ ኣሳይ ኢዛ ካሊዴስ።

3 ዮሱሲ ባና ካሊዛይታራ ፑዴ ዙማ ቦላ ኬዚ ኡቴዴስ።

4 ሄ ዋዴ ኣይሁዳታ ፓዚጋ ባኣሌይ ማቲ ኡቴዴስ።

5 ሄ ዋዴ ዳሮ ዴሬይ ኢዛኮ ዪዛይሳ ዮሱሲ ቶቁ ጊ ዴሊዲ ፒሊጶሳ፡ «ሃይሳ ዴራስ ጊዳና ቁማ ኣዋፔ ሻማና ዳንዳይዞኒ?» ጊዴስ።

6 ዮሱሲ ፒሊጶሳ ሄሳሉ ኦይቺዳይ ኢዛ ፓጫናስ ጊዲፔ ኣቲን ኢዚ ባ ኦላናይሳ ኤሬስ።

7 ፒሊጶሲካ ኢዛስ፡ «ኢሳዴስ ኢሳዴስ ኢሲ ባርስ ጊዲዛ ካላ ሻሚዛኮካ ናምኡ ጴቱ ዲናሬን ሻሚዳ ካሊካ ሃይሳስ ጊዴና» ጊዴስ።

8 ዮሱሳ ካሊዛይታፔ ኢሶይ ሲሞና ጴጽሮሳ ኢሻ ኢንዲራሲ፡

9 «ኢቻሹ ባንጋ ኡኬሊኔ ናምኡ ሞሌ ኦይኪዳ ኢሲ ናይ ሃይሳን ዴስ። ጊዶ ኣቲን ሃና ሃይሳ ሃ ዴሬዛስ ኣይ ጊዳኔ?» ጊዴስ።

10 ዮሱሲካ ዛሪዲ፡ «ኣሳ ኡባ ኡቴሲቴ» ጊዴስ፤ ሄን ዳሮ ማታይ ዲዛ ጊሻስ ኣሳይ ኡቴዴስ፤ ኣሳ ቆዳይካ ኢቻሹ ሺ ጊዲዛዛ።

11 ሃሳፌ ጉዬ ዮሱሲ ኡኬላ ኤኪዲ ጋላታ ዋሳ ዋሲዲ ኡቴዳ ኣሳስ ጊሺዴስ። ሞሌዛካ ሄሳሉካ ጊሹቺዴስ። ኣሳይ ዉሪካ ባስ ጊዲዛዛ ዴሚዴስ።

12 ኣሳይ ዉሪካ ካሊ ሚን ዮሱሲ ባና ካሊዛይታ፡ «ማዳን ኣቲዳ ካላ ኢሲኖካ ኣሾንታ ሺሺቴ» ጊዴስ።

13 ኢሰቲካ ኣሳይ ሚሺን ኢቻሹ ኡኬላፌ ኣቲዳ ታማኔ ናምኡ ሌማቴ ኩሜላ ሺሺዳ።

14 ኣሳቲካ ዮሱሲ ኦሊዳ ማላታ ቤኢዲ፡ «ሃይሳዴይ ቱማፔ ሃ ኣላሜ ያና ናቤዛኮ!» ጊዳ።

15 አሳይ ቃሴ ዋልቃራ ዩሱሳ ካዋፋና ቆፒዳይሳ ዩሱሲ ኤሪዲ ቃሴካ ኢስታፊ ሃኪ ቢዲ ዙማ ቦላ ኬዚደሰ።

አባ ቦላራ ዩሱሳ ሄሜል

(ማቶ 14:22-27፤ ማር 6:45-52)

16 ጋዴይ ቃሚሺን ዩሱሳ ካሊዛይቲ ዲጌ አባኮ ዋጂዳ።

17 ዋጎሎን ጌሊዲ ቂፊርናሆሜ ባና ኬዚዳ። ኢስቲ ኬዚሺን ጋዴይ ጁሚደሰ። ዩሱሲ ሄሳ ጋካናሰካ ኢስታኮ ዪቤና።

18 ዋልቃማ ጫርኮይ ጫርኪዛ ጊሻሰ አባይ ከሄ ቃጸደሰ።

19 ኢዛ ካሊዛይቲ ባጋ ሳቲ ኦጌ ማላ ዋጎሎዛ ላጊዳፔ ጉዩ ዩሱሲ አባ ቦላራ ቶሆራ ሄሜቲ ዋጎሎዛኮ ማቲሺን ዴሚዲ ባቢዳ።

20 ኢዚካ ኢስታሰ፡ «ታናኮ! ባቦፍቲ!» ጊደሰ።

21 ኢስቲካ ኢዛ ኡፋይሳራ ጌዴ ዋጎሎዛ ጊዶ ኤካና ኮዪዳ። ሄራካ ዋጎሎዚካ ኢስቲ ባናሶ ጋኪደሰ።

ዩሱሲ አሳሰ ዴኦ ቁማ

22 አባፌ ሄ ፒንፋን ኦቲዳ አሳይ ዋንቴፋ ጋላሰ አባ ቦላ ኢሲ ዋጎሎይ ጸላ ዲዛር ቤዪደሰ። ዩሱሳ ካሊዛይቲ ካሴ ባርካ ቢዳይሳኔ ዩሱሲ ኢስታራ ዋጎሎን ጌሎንታይሳ ኤሪዳ።

23 ጊዶ ኦቲን ሃንኮ ዋጎሎቲ ጸቢራዶሴፔ ዴንዲዲ ዩሱሲ ጋላታ ዋሳ ዋሲን አሳይ ካል ሚዳሶ ዪዳ።

24 አሳቲካ ዩሱሲ ዋይኮ ኢዛ ካሊዛይቲ ሄን ባይንዳይሳ ቤኢዲ ሄ ዋጎሎታን ጌሊዲ ዩሱሳ ኮሽ ቂፊርናሆሜ ቢዳ።

25 አባፌ ሄ ፒንፋን ኢዛ ዴሚዲ፡ «ኦስታማሬ! ኔ አይዴ ሃይሳ ያዲ?» ጊዳ።

26 ዩሱሲካ ኢስታሰ፡ «ታ ኢንቴሰ ቱማ ጋይሰ፤ ኢንቴ ታና ኮይዛይ ካል ሚ ካሊዳ ጊሻሰ ኦቲን ማላታ ቤኢዳ ጊሻሰ ጊደና።

27 ጳያና ካላሰ ኦሶፍቲ። ጊዶ ኦቲን ሄሳፌ አሊዲ ጸሳይ አዋይ አማንሊዛ ማታሜ ኢዛ ቦላ ሾጪዳ ጊሻሰ አሳ ናይ ኢንቴሰ አሚዛ ሜርና ዴኦሰ ጊዲዛ ካላሰ ኦሊቴ» ጊደሰ።

28 ኢስቲካ ኢዛሰ፡ «ሂሰቲን ጸሳ ኦሶ ኦላናሰ ኑ አይ ኦሊኖ?» ጊዳ።

29 ዩሱሲካ፡ «ጸሳ ኦሶይ ጸሲ ኪቲዳ ኢዛ ናዛን አማኖ» ጊዲ ኢስታሰ ዛሪደሰ።

30 ኢስቲካ ኢዛሰ፡ «ኑ ቤኢዲ ኔና አማናና ማላ ኔ ኑና አይ ማላታ ቤሳኔ? ቃሴካ አይ ኦላኔ?

31 ‹ኢስቲ ማና ማላ ኢስታስ ቁማ ሳሎፔ አሚዴስ› ጌቲቲ ጸፊቲዳ ማላ ካሴ ኑ አዋቲ ባዞ ቢታን ማና ጌቲቲዛ ካል ሚዳ» ጊዳ።

32 ዬሱሲ ኢስታስ፡ «ታ አንቴስ ቱሙ ጋይስ፤ ሳሎፔ ዎዲዳ ቁማ አንቴስ አሚዳይ ሙሴ ጊዳና። ቱሙ ቁማ ሳሎፔ አንቴስ አሚዳይ ታ አዋ።

33 ጋሶይካ ጸሳ ቁማይ ሳሎፔ ዎዲዳ አላሜስ ዴኦ አሚዳይሳ» ጊዳስ።

34 ሄሳ ጊሻስ አሳይ፡ «ጎዶ፡ ሄሳ ማላ ቁማ ኑስ ኡባ ዎዴ አማርኪ!» ጊዳስ።

35 ዬሱሲካ ኢስታስ፡ «ዴኦ ቁማይ ታና፤ ታኮ ዪዛ አሲ ሙሌካ ጋፊቲና፤ ታና አማኒዛዴይ ኣይዴካ ሳሜቲና።

36 ካሴ ታ አንቴስ ጊዳ ማላ አንቴ ታና ቤዪዴታ ሺን አማኒቤኬታ።

37 ታ አዋይ ታስ አሚዳይ ወሪካ ታኮ ያና፤ ታኮ ዪዛዴ ታ ካሬ ጎዲኬ።

38 ጋሶይካ ታኒ ሳሎፔ ዎዲዳይ ታና ኪቲዳይሳ ሸኔ ኦፋናስ አቲን ታ ሸኔ ኦፋናስ ጊዳና።

39 ታና ኪቲዳይሳ ሸኔይ ታስ አሚዳይታፔ አሳዴካ ዳይሶንታ ወርሴሳ ጋላስ ታ ዴንፋና።

40 ኤ ታ ሸኔይ ናዛ ቤኢዲ ኢዛ አማኒዛዴይ ወሪ ሜርና ዴኦ ዴማናሳ። ታኒካ ወርሴሳ ጋላስ ኢዛ ሃይቆፔ ዴንፋና» ጊዳስ።

41 ሄሳ ጊሻስ ዬሱሲ፡ «ሳሎፔ ዎዲዳ ቁማይ ታና» ጊዳ ጊሻስ ኣይሁዳቲ ኢዛ ቦላ ዙዙሜቲዳ።

42 «ሃይሲ ዮሴፌ ና ዬሱሳ ጊዴኔ? ኢዛ አዋኔ ኢዛ አዮ ኑ ኤርኮኒ? ሂስቲን ሃኢ ኢዚ፡ ‹ሳሎፔ ዎዲዳስ› ዋኒ ጊዜ?» ጊዳ።

43 ዬሱሲካ ኢስታስ፡ «አንቴ አንቴ ጊዶን ዙዙሜታ።

44 ታና ኪቲዳ ታ አዋይ ዴይጊዳዴፌ አቲን ታኮ ያና ዴንዳይዛዴይ ኦኒካ ዴና። ባርካ ታኮ ያና ዴንዳይዛይ ኦኒካ ዴና፤ ታኮ ዪዛዴካ ወርሴሳ ጋላስ ታ ኢዛ ሃይቆፔ ዴንፋና።

45 ናቤታ ማጸፋታን አሳይ ወሪ ጸሳፌ ታማርዳዴ ጊዳና ጌቲቲ ጸፊቲዴስ። ሄሳ ጊሻስ አዋፔ ሲዪዲ ታማርዳ ኣሲ ወሪ ታኮ ያና።

46 ሄሳ ጉሲ አዋ ቤኢዳ ኣሲ ዴስ ጉስ ጊዴና፤ አዋ ቤኢዳይ ጸሳ ኣቻፌ ዪዳይሳ ጸላ።

47 ታ ኢንቴስ ቱማ ጋይስ፤ ታናን አማኒዳ አሳስ ሜርና ዴይይ ዴስ።

48 ታኒ ዴኦ ቁማ።

49 ካሴ ኢንቴ አዋቲ ባዙ ቢታን ማና ሚዳ፤ ጊዶ አቲን ወሪካ ሃይቂዳ።

50 ሳሎፔ ዋዲዳ ቁማይ ሃይሳ፤ ሃይሳ ሚዛዴይ ሙሌካ ሃይቆና።

51 ሳሎፔ ዋዲዳ ዴኦ ቁማይ ታና፤ ሃይሳ ሃ ቁማፔ ሚዛዴይ ወሪካ ሜርናስ ዳና። አላሜስ ዴኦ ጊዳና ማላ ታ ኢሚዛ ቁማይ ታ አሾዛ» ጊዴስ።

52 ሄ ዋዴ አይሁዳቲ፥ «ሃይሲ አዴዚ ኑ ኢዛ አሾ ማና ማላ ኢዚ ኑስ ዋስቲ አማኔ?» ጊዲ ባ ጊዶን ፓላሜቲዳ።

53 ሄሳ ጊሻስ ዬሱሲ ኢስታ፥ «ታ ኢንቴስ ቱሙ ጋይስ፤ አሳ ና አሾ ኢንቴ ሞንታ አጊኮ፥ ኢዛ ሱሊካ ኡዮንታ አጊኮ ኢንቴስ ዴኦይ ዴና።

54 ታ አሾ ሚዛዴሲኔ ታ ሱሐ ኡዩዛዴስ ኡባስ ሜርና ዴይይ ዴስ፤ ታኒካ ኢዛዴ ወርሴሳ ጋላስ ሃይቆፔ ዴንፋና።

55 ጋሶይካ ታ አሾይ ቱሙ ቁማ፤ ታ ሱሊካ ቱሙ ኡሻ።

56 ታ አሾ ሚዛይኔ ታ ሱሐ ኡዩዛይ ወሪ ታናን ዳና፤ ታኒካ ኢዛዴን ዳና።

57 ዴኦ አዋይ ታና ከቲዳ ማላኔ ታኒካ ኢዛን ዴኦን ዲዛ ማላ ሄሳሐካ ታ አሾ ሚዛዴይ ወሪ ታናን ዴኦን ዳና።

58 ሄሳ ጊሻስ ሳሎፔ ዋዲዳ ቁማይ ሃይሳ፤ ኢዚካ ካሴ ኢንቴ አዋቲ ሚዳይሳ ማላ ጊዴና። ጋሶይካ ሄ ቁማ ሚዳይቲ ሃይቂዳ፤ ሃ ቁማ ሚዛይቲ ጊዲኮ ሜርናስ ዳና» ጊዴስ።

59 ዬሱሲ ሃይሳ ቂፊርናሆሜን አይሁዳታ ዋሳ ኬፋን ታማርሲዛ ዋዴ ዮቲዴስ።

ሜርና ዴኦ ቃላ

60 ኢዛ ካሊዛይታፔ ዳሪዛይቲ ሄሳ ሲዩዲ፥ «ሃይሲ ዮኦዚ ዴጾ፤ ሃይሳ ኦኒ ኤካና ዳንዳይዜ?» ጊዳ።

61 ዬሱሲካ ኢዛ ካሊዛይቲ ሄሳ ዮኦዛ ጊሻስ ዙዙሜቲዳይሳ ባ ዋዚናን ኤሪዲ፥ «ሃይሲ ኢንቴና ዴጾዜ?

62 አሳ ናይ ኪርሰቶሲ ባ ዲዛሶ ሲሚ ኬዚሺን ቤይኮ ኢንቴ አይ ጋኔ?

63 አሳስ ዴኦ ኢሚዛይ ጸሳ አያናኮ! አሳ ዋልቃይ ቃሴ አይኮካ ጎኤና፤ ታ ኢንቴስ ዮቲዳ ቃላይ ዴኦ ኢሚዛ አያና።

64 ጊደ አቲን አንቴ ጊደን አሲ አሲ አማኖንታ አሳቲ ዴቲስ» ጊዴስ። ዩሱሲ አሰታስ ሄሳ ጊዳይ ኮይሮፔ ዶሚዲ አሰታ ጊደን አማኖንታይቲ ኦናንታኮ ቃሴ አዛ አላ አማናዴይካ ኦናኮ ኤሪዛ ጊሻሳ።

65 ካሌላዲካ ዩሱሲ፥ «አዋ ሸኔይ ባይንዳ ታኮ ሃ ያና ዳንዳይዛዴይ ዴና ጋዳ ታ አንቴስ የቲዳይ ሄሳሳ» ጊዴስ።

66 ሄሳፌ ዴንዲዳይሳን አዛ ካሊዛይታፔ ዳሮቲ ጉዬ ሲሚዳ። ሄ ጋላሳፌ ዶሚዲ ዩሱሳ ካሎ አጊዳ።

67 ሄሳ ጊሻሰ ዩሱሲ ባና ካሊዛ ታማኔ ናምአታ፥ «አንቴካ ባና ኮዬቲ?» ጊዴስ።

68 ሄ ዎዴ ሲሞና ጌቲቲዛ ጴጽሮሲ፥ «ሳዶ፥ ኔስ ሜርና ዴኦ ቃላይ ዲሺን ኦ ኦናኮ ባኔ?

69 ኔ ጌሻ ጸሳ ና ጊዲዳይሳ ኤሪዲ ኦኒ አማኒዶስ» ጊዴስ።

70 ዩሱሲካ አሰታስ፥ «ታ አንቴና ታማኔ ናምአታ ዶራቤኪና? ሂስቲን አንቴፌ አሲይ ጸላኤ» ጊዴስ።

71 አዚ ሄሳ ጊዳይ ሲሞና ና አሰቆሮንቶ ዩሁዳ ጊሻሳ። አይስ ጊኮ ዩሁዳይ ታማኔ ናምአታፔ አሳ ጊዲኮካ ዩሱሳ አላ አማናይ አዛ ጊዲዳ ጊሻሳ።

7

ዳሴ ባኣሌስ ዩሩሳላሜ ዩሱሳ ቡስ

1 ሄሳፌ ጉዬ ዩሱሲ ጋሊላ ጊደን ዩዬቲዴስ፤ ጊደ አቲን ዩሁዳን ዩያናስ ኮዬቤና። ጋሶይካ አይሁዳቲ አዛ ዎጳና ኮይዛ ጊሻሳ።

2 ሄ ዎዴ አይሁዳታ ዳሴ ባኣሌይ ማቲ ኡቲዴስ።

3 ሄሳ ጊሻሰ ዩሱሳ አሻቲ አዛኮ ሸቂዲ፥ «ኔና ካሊዛይቲ ኔ አላዛ ኦሶዛ ቤያና ማላ ኔ ሃይሳፌ ዴንዳዳ ዩሁዳ ዴሬ ባ።

4 ጋሶይካ ቆንጮን ኤሬታና ኮይዛዴይ ባ ኦሶ ጌማን ኦፊና። ኔካ ሃይታንታ ዉርሳ ኦላሽ ኔና ኣላሜን ቆንጪሳና ኮሽስ» ጊዳ።

5 አሲቲ ሄሳ ጊዳ ጋሶይካ አዛ አሻታካ ጊዲን አዛን አማኖንታይታ ጊዲዳ ጊሻሳ።

6 ዩሱሲካ አሰታስ፥ «ታ ዎዴይ ቡሮ ጋኪቤና፤ አንቴ ዎዴይ ጊዲኮ ኡባ ዎዴ አንቴስ ጊጋኮ።

7 ዴሬይ አንቴና አጸና ዳንዳዬና፤ ታና ጊዲኮ አዴስ፤ ጋሶይካ ታኒ ኣላሜ ኦሶይ አታ ጊዲዳይሳ አዛስ ማርካቲዛ ጊሻሳ።

8 ሃኒ አንቴ ባኣሌዛሶ ቤቲ፤ ታስ ዎዴይ ጋኮንታ ጊሻሰ ሃይሳ ሃ ባኣሌዛሶ ታ ቢኬ» ጊዴስ።

9 ሄሳ ጊዲ ዩሱሲ ጋሊላን ኣቲዴሰ።

ዳሴ ባኣሌሶን ዩሱሳ ቤቶ

10 ጊደ ኣቲን ኢዛ ኢሻቲ ባኣሌዛሶ ቢዳፔ ጉዬ ዩሱሲ ቆንጩራ ጊደንታ ቆታራ ባኣሌዛሶ ቢዴሰ።

11 ኣይሁዳቲ፥ «ኢዚ ኣዋን ዲዜ?» ጊሼ ባኣሌዛሶን ኮዪዳ።

12 ዴሬይካ ኢዛ ጊሻሰ ጋርሳራ ሳሱኪ ሃሳዬቲዴሰ። ኢሲ ኢሲ ኣሳቲ፥ «ኢዚ ሎኦ ኣሳ» ጊሼን ባጋይ ቃሴ፥ «ሎኦ ጊዴና፤ ኢዚ ዴሬ ባሌሐሰ» ጊዳ።

13 ጊደ ኣቲን ኣይሁዳታ ዳናታሰ ባቢዛ ጊሻሰ ኦኒካ ኢዛ ጊሻሰ ቆንጩን ሃሳይቤና።

14 ባኣሌዚ ዉራና ባጋ ጋኪሺን ዩሱሲ ጸሳ ኬሐ ቢዲ ታማርሶ ኦይኪዴሰ።

15 ኣይሁዳቲ፥ «ሃይሲ ኣዴዚ ታማርንታ ዲሼ ሃይሳ ዉርሲ ዎስቲ ኤሪዴ?» ጊዲ ማላሌቲዳ።

16 ሄሳ ጊሻሰ ዩሱሲ፥ «ታ ታማርሲዛ ቲሚርቲይ ታና ከቲዳ ታ ኣዋፔ ታሰ ኢሜቲዴሰ ኣቲን ታፔ ጊዴና።

17 ታና ከቲዳይሳ ሼኔ ኦፋና ኮይዛዴይ ዲኮ ሃይሲ ሃ ቲሚርቲይ ጸሳፌ ቤቲዳይሳ ዎይኮ ታ ታፔ ሃሳይዳይሳ ጊዲኮካ ኤራና።

18 ባፔ ሃሳይዛዴይ ባ ቦንቾ ኮዬሰ። ከቲዳዴ ቦንቾ ኮይዛዴይ ጊዲኮ ኢዚ ቱማንቻ፤ ዎርዶይ ኢዛ ቦላ ዴና።

19 ሙሴይ ኢንቴሰ ዎጋ ኢሚዴሰ ጊዴኔ? ጊዲኮካ ኢንቴ ጊደን ዎጋ ናጊ ፖሊዳዴይ ኦኒካ ዴና። ኢንቴ ኣዛሰ ታና ዎቆና ኮዬቲ?» ጊዴሰ።

20 ዴሬይካ ኢዛ፥ «ኔ ቦላ ዳይዳንሊ* ዴሰ! ኔና ዎቆና ኮይዛይ ኦኔ?» ጊዴሰ።

21 ዩሱሲካ ኢሰታሰ፥ «ታ ኢሲ ኦሶ ኦፋዲሰ፤ ኢንቴ ዉሪካ ሃና ሃ ኦሶይን ማላሌቲታ።

22 ሙሴይ ኢንቴሰ ቃጸራ ዎጋ ኢሚዴሰ፤ ሄ ዎጋይካ ኢሜቲዳይ ካሴ ኣዋታፔ ቤቲዴሰ ኣቲን ሙሴፔ ጊዴና። ሂሰቲን ሄኮ ኢንቴካ ሳዎባታ ጋላሲካ ኣሰ ቃጸሬታ።

23 ሂሰቲኮ ሙሴ ዎጋይ ሻሬቶንታ ማላ ኣሲ ሳዎባታ ጋላሰ ቃጸሬቲዛዝ ጊዲኮ ሂሰቲን ታ ሳዎባታ ጋላሰ ኣሳሰ ኩሜፋ ኣሳቴላ ፓሊን ኣዛሰ ታ ቦላ ሃንቄቲቲ?

* 7:20 ዳይዳንላ፡ ዳይዳንላ ጉሲ ጸላኤ ኦሳንቻታ ጉሳ።

7:22 ሌዌ 12:3፤

ሜጴ 17:10 7:23 ጥሃ 5:9

24 ሱሬ ፒርዳ ፒርዳቱ ኣቲን ኣሳ ኣይፌሶ ጸሊዲ ማዶ ፒርዳ ፒርዶፍቲ» ጊ ዛሪዴስ።

ከርሰቶሳ ጊሻስ ዴንዲዳ ፓላማ

25 ዩሩሳላሜ ኣሳፔ ኢሲ ኢሲ ኣሳቲ፡ «ኢሰቲ ዎቓና ኮይዛ ኣዳዚ ሃይሳ ጊዴኔ?»

26 ሄኮ ኢዚ ቆንጩን ሃሳዬስ ሺን ኢሰቲ ኢዛ ኣይኮዛ ጊቤቲና። ሃይሲ ጸሲ ከቲዳዴ ጊዲዳይሳ ዳናቲ ቱሙ ኤሪዘሻ?

27 ሂሰቲን ሃይሲ ኣዳዚ ኣዋ ኣሳኮ ኑ ኤርሰ። ጸሲ ከቲዳዴይ ዩሺን ቃሴ ኢዚ ኣዋፔኮ ኤሪዛዴይ ኦኒካ ዴና» ጊዳ።

28 ሄሳ ጊሻስ ዩሱሲ ጸሳ ኬፋን ታማርሲሼ ባ ቃላ ቶቁ ሂሰቲዲ፡ «ኢንቲ ታና ቱሙ ኤሪታ፤ ታ ኣዋፔ ዩዳኮ ኢንቲ ኤሪታ። ቃሴ ታኒ ታ ሺኔን ያቤኬ፤ ታና ከቲዳይሲ ኢዚ ቱማንቻ፤ ጊዶ ኣቲን ኢንቲ ቃሴ ኢዛ ኤሪኬታ።

29 ታ ጊዲኮ ኢዛ ኣቻፌ ዩዳ ጊሻሲኔ ኢዚ ታና ከቲዳ ጊሻስ ታ ኢዛ ኤሪይስ» ጊዴስ።

30 ሄ ዎዴ ኢዛ ኦይካናስ ኮዩዳ፤ ጊዶ ኣቲን ቡር ዎዴይ ጋኪቤና ጊሻስ ኦኒካ ኢዛ ኦይኪቤና።

31 ጊዲኮዛ ዴሬዛፔ ዳርይ ኢዛን ኣማኒዴስ፤ ኣሳይ፡ «ጸሲ ከቲዳዴይ ዩዛ ዎዴ ሃይሲ ኣዳዚ ኦሶ ማላታፔ ቦላራ ሃራ ኦላኔ?» ጊዴስ።

ዩሱሳ ኦይካና ዎታዳራታ ከቲቲል

32 ኣሳይ ዩሱሳ ጊሻስ ጋርሳራ ሳሱኬቲ ሃሳዬቲሺን ፋርሳዌቲ ሲዩዳ። ሄሳ ጊሻስ ቄሴታ ሃላቃቲኔ ፋርሳዌቲ ዩሱሳ ኦይካናስ ጸሳ ኬፋ ፔንጌ ናጊዛይታ ዩዲዳ።

33 ሄ ዎዴ ዩሱሲ፡ «ታ ኢንቲናራ ጉፋ ዎዴ ዳሻና፤ ሄሳፌ ጉዬ ታና ከቲዳይሳኮ ታ ሲማ ባና።

34 ኢንቲ ታና ኮያና ሺን ዴማኬታ፤ ኢንቲ ታ ዲዛሶ ያናስ ዳንዳዬኬታ» ጊዴስ።

35 ሄሳ ጊሻስ ኣይሁዳታ ዳናቲ ባ ጊዶን ኢሶይ ኢሳራ፡ «ሃይሲ ኣዳዚ ኑ ዴሞንታ ማላ ኣዋ ባኔሻ? ኦኔ ኤሪዛይ ጊሪኬታ ጊዶን ላሊቲ ዲዛ ኣይሁዳታኮ ቢዲ ጊሪኬታ ታማርሳኔሻ?

36 ኢዚ፡ «ኢንቲ ታና ኮያና ሺን ዴማኬታ፤ ታ ዲዛሶ ኢንቲ ያናስ ዳንዳዬኬታ» ጊሺን ሄሲ ኣይ ጉሴ?» ጊዳ።

ዴኦ ሃል

37 ጌታ ባኣሌዛ ወርሱላ ጋላሰ ዩሱሲ ዴንዲ ኤቂዲ ባ ቃላ ቆቁ ሂሰቲዲ፥ «ሃላ ሳማቲዳዴይ ዲኮ ሃ ታኮ ዩዲ ኡዮ።

38 ጌሻ ማጸፋይ ጌዳ ማላ ታና ኣማኒዛዴፌ ዴኦ ሃላ ፑልቶይ ፑልታና» ጌዴሰ።

39 ኢዚ ሄሳ ጌዳይ ኢዛን ኣማኒዛይቲ ቡሮፔ ኤካና ጸሎ ኢያና ጌሻሳ፤ ጋሶይካ ዩሱሲ ቦንቹቲዛ ዎዴይ ቡሮ ጋኮንታ ጌሻሰ ጸሎ ኢያናይ ኢማቲቤና።

ዴሬዛ ጌዶን ማጽደቅ ሻኬቲሳ

40 ሄሳ ጌሻሰ ዴሬዛፔ ኢሲ ኢሲ ኣሳቲ ሄ ቃላ ሲዩዲ፥ «ያና ጌዛ ናቤይ ቱማፔ ሃይሳ» ጌዳ።

41 ሃራቲ፥ «ሃይሲ ጸሲ ከቲዳዴ» ጌዳ፤ ባጋይቲ ቃሴ፥ «ጸሲ ከቲዳዴይ ጋሊላፔ ዋኒ ያኔ?

42 ጸሲ ከቲዳዴይ ዳዊቲ ዜሬላፌ ዩሌታናይሳኔ ዳዊቲ ካታማ ቤቲሊሃማፔ ያናይሲ ካሴ ጌሻ ማጸፋን ጸፊቲቤኔ?» ጌዳ።

43 ሄሳ ጌሻሰ ኢዛ ጋሶን ዴሬይ ባ ጌዶን ሻኬቲ ዎጺዴሰ።

44 ኢሰታፌ ኢሲ ኢሲ ኣሳቲ ኢዛ ኦይካና ኮዩዳ፤ ጌዶ ኣቲን ኦኒካ ኢዛ ኦይከቤና።

ኣይሁዳታ ዳናቲ ኣማኒቤቲና

45 ሄሳፌ ጉዬ ጸሳ ከሌ ናጊዛይቲ ቄሴታ ሃላቃታኮኔ ፋርሳዊታኮ ሲሚ ቢዳ። ኢሰቲካ፥ «ኣዛሰ ኢዛ ኤኮንታ ዩዴቲ?» ጌዳ።

46 ዎታዳራቲካ ዛሪዲ፥ «ሃ ኣዴዚ ሃሳይዛይሳ ማላ ኣይ ኣሲካ ሃሳዩ ኤሬና» ጌዳ።

47 ፋርሳዊቲ ኢሰታ፥ «ኢንቲካ ባሌቲዴቲ?

48 ዳናታፔ ዎይኮ ፋርሳዊታፔ ኢዛ ኣማኒዳይቲ ዲዞሻ?

49 ሃይሲ ሙሴ ዎጋ ኤሮንታ ዴሬይ ቱማፔ ቃንጌቲዳይሳ» ጌዳ።

50 ሃይሳፌ ካሴ ዩሱሳኮ ቢዳ ፋርሳዊታፔ ኢሳ ጌዲዳ ኒቆዲሞሲ ኢሰታሰ።

51 «ኑ ዎጋን ኢሲ ሞቲቲዛዴይ ባ ሞቶሰ ዛሮ ኣሚን ሲዮንታኔ ኢዚ ኣይ ኦሒዳኮ ኤሬቶንታ ዲሺን ፒርዳይ ፒርዴቲ ኤሬዜ?» ጌዴሰ።

52 ኢሰቲካ፥ «ኔካ ጋሊላ ኣሴ? ጋሊላፔ ናቤይ ዴንዶንታይሳ ፒልጋዳ ጋካ ኤራ» ጌዳ።

53 ሄሳፌ ጉዬ ኢሶይ ኢሶይ ባሶ ቢዴስ። †

8

ላይማን ኦይኬቲዳ ማጫሳዮ

1 ሄሳፌ ጉዬ ዬሱሲ ዳብራዛይቲ ቢዴስ።

2 ዋንቴላ ጋላስ ማላዶ ዋንታራ ጸሳ ኬፍ ሲሚ ዩዴስ።
ዴሬይካ ወሪ ኢዛኮ ዩን ኢዚ ኡቲዲ ኢስታ ታማርሶ ኦይኪዴስ።

3 ሙሴ ዋጋ ታማርሲዛይቲኔ ፋርሳዌቲ ኢሲ ላይማታሼ
ኦይኬቲዳ ማጫስ ዲዛሮ ኤኪ ዩዲ ዴሬ ሲንላን ኤሲዳ።

4 ዬሱሳካ፡ «ኣስታማሬ! ሄኮ ሃና ማጫሳያ ላይማታሼ
ኦይኬታዲስ።

5 ሃኒ ማላ ማጫሲ ሹቻን ጫዴታ ሃይቃና ማላ ሙሴይ ኦ
ዋጋን ኦና ኣዛዚዴስ፤ ኔኒች ሃኒ ገሻስ ኣይ ጋይ?» ገዳ።

6 ኢስቲ ኢዛ ሄሳ ገዳይ ኢዛ ቦላ ዋቶስ ገዲዛ ጋሶ ዴማናሲኔ
ኢዛ ፓጫና ኮዪዳ ገሻሳ። ገዶ ኣቲን ዬሱሲ ሆኪዲ ቢታ ቦላ
ባ ቢራዴራ ጻፎ ኦይኪዴስ።

7 ኢስቲ ኢዛ ዛሪ ዛሪ ኦይቺን ቆቁ ገዲ፡ «ኣንቲ ገዶፌ
ናጋራይ ባይንዳ ኣሲ ኮይሮ ሹች ኢዚ ቦላ ኦሎ» ገዴስ።

8 ሄሳፌ ቃሴካ ሆኪዲ ቢታ ቦላ ጻፊዴስ።

9-10 ኢስቲካ ሄሳ ሲዩዲ ጨማታፔ ዶሚዲ ወሪካ ኢሶይ
ኢሶይ ቢዳ፤ ሄሳ ገሻስ ዬሱሲ ሄን ኤቁዳ ማጫሳይራ ጸላ
ኣቲዴስ። «ኔና ሞቲዛይቲ ኣዋን ዲዞ? ኔ ቦላ ፒርዲዳይ ኦኒካ
ዴኔ?» ገዴስ።

11 ኢዛካ፡ «ጎዶ ኦኒካ ባ» ጋዲስ። ዬሱሲካ፡ «ታኒካ ኔ ቦላ
ፒርዲኬ፤ ባ! ናሞኣንሶ ናጋራ ኦሶፋ» ገዴስ። *

ዬሱሲ ኣላሚስ ፖኦ

12 ቃሴ ዬሱሲ፡ «ታኒ ኣላሚስ ፖኦ። ታና ካሊዛዴይ ወሪ ዴኦ
ፖኦ ዴማና። ቆማን ሲሚሬቲና» ገዲ ኢስታስ ዮቲዴስ።

† 7:53 ሄሳፌ ጉዬ ኢሶይ ኢሶይ ባሶ ቢዴስ ገዛይሳ ኢሲ ኢሲ ገሻ ማጸፋታን
ጻፈቲቤና። 8:5 ሉዌ 20:10፤ ዛሬ 22:22-24 * 8:11 ዳር ማጸፋቲኔ ቤኒ

ዋዴ ገሻ ማጸፋታ ቢርሼላቲ ሼምፖ 7:53፤ ሼምፖ 8:11 ጋካናስ ዲዛ ቆፋታ ጉጄቲና፤
ኢሶቲ ኢሶቲ የሃኒሳ ሚሺራች ማጸፋን ሼምፖ 21:34ፔ ጉዬራ ጌልሴቲስ፤ ሃራቲ ቃሴ
ሉቃሳ ሚሺራች ሼምፖ 21:38ፔ ጉዬራ ጌልሴቲስ፤ ኢሲ ኢሲ ገሻ ማጸፋቲ ቃሴካ
የሃኒሳ 7:36ፔ ጉዬራ ጌልሴቲስ። 8:12 ማቶ 5:14፤ የሃ 9:5

13 ፋርሳዊቲ፡ «ኔኒ ኔ ገሻሰ ማርካታሳ፤ ኔ ማርካይ ቱሙ ገደና» ገደ።

14 ዬሱሲካ ኢሰታሰ፡ «ታኒ ታ ገሻሰ አይ ማርካቲኮካ ታ አዋፔ ዪዳኮ ቃሴ ታኒ አዋ ባናኮ ታ ኤሪዛ ገሻሰ ታ ማርካቴላ ቱማ። አንቴ ገደኮ ታ አዋፔ ዪዳኮኔ ቃሴ አዋ ባናኮ ኤሬኬታ።

15 አንቴ አሾ ቆፋ ማላ ፒርዴታ፤ ታኒ ገደኮ ኦና ቦላካ ፒርዲኬ።

16 ታ ፒርዲኮካ ታ ፒርዳይ ቱሙ ፒርዳ። ጋሶይካ ታኒ ታርካ ፒርዲኬ፤ ታና ከቲዳ ታ አዋይካ ታናራ ደሰ።

17 ናምኡ አሳታ ማርካይ ቱሙ ገደዳይሲ አንቴ ዋጋን ጸፊቲደሰ።

18 ሄሳ ገሻሰ ታኒ ታ ገሻሰ ማርካታይሰ፤ ታና ከቲዳ ታ አዋይካ ታሰ ማርካቴሰ» ገ ዛሬደሰ።

19 ኢሰቲካ፡ «ኔ አዋይ አዋን ዲዜ?» ገዲ ኢዛ ኦይቺዳ። ዬሱሲካ ኢሰታሰ፡ «ታና ገደን ታ አዋካ ገደን አንቴ ኤሬኬታ፤ አንቴ ታና ኤሪዛኮ ታ አዋካ ኤራናኮሺን» ገዲ ኢሰታሰ ዛሬደሰ።

20 ዬሱሲ ሄሳ ኢሰታሰ የቲዳይ ጸሳ ኬላ ገቤን ሚሼ ዋሊዛ ሳጺኔ አቻን ታማርሲሼ የቲደሰ፤ ገዶ አቲን ኢዛሰ ኦይኬቲዛ ዋይይ ጋኮንታ ገሻሰ ኦኒካ ኢዛ ኦይኪቤና።

21 ዬሱሲ ቃሴካ፡ «ታ ባናሺን አንቴ ታና ኮያናኔ አንቴ አንቴ ናጋራን ሃይቃና አቲን ታ ቢዛሶ ባና ዳንዳዬኬታ» ገደሰ።

22 አይሁዳቲካ ባ ገደን ኢሶይ ኢሳራ ኢዚ፡ « ታ ቢዛሶ አንቴ ባና ዳንዳዬኬታ ገዛይ ባርካ ባና ዋቆናሴሻ?» ጌቲቲዳ።

23 ኢዚ ቃሴ ኢሰታ፡ «አንቴ ጋርሳ አሳ፤ ታኒ ቦላ አሳ፤ አንቴ ሃይሳ አላሜ አሳ፤ ታኒ ሃ አላሜፔ ገዲኬ።

24 አንቴ ታ ኦናኮ ኤሪዲ አማኖንታ አገኮ አንቴ አንቴ ናጋራን ሃይቃና ገሻሰ ታ አንቴ አንቴ ናጋራን ሃይቃና ገዳይ ሄሳ ገሻሳ» ገደሰ።

25 ኢሰቲካ ኢዛ፡ «ኔ ኦኔ?» ገደ። ዬሱሲካ ኢሰታሰ፡ «ሃኢ ጋካናሰ ታ አንቴሰ ኢዛ ገሻሰ የቲዛይይ ታና።

26 ታ አንቴ ቦላ ሃሳያናይሰኔ ፒርዲዛ የኦይ ዳርይ ደሰ። ገዶ አቲን ታና ከቲዳይይ አማኔቲዳዴ፤ ታኒካ ኢዛፔ ሲዪዳይሳ ሃ አላሜዛሰ የታይሰ» ገደሰ።

27 ኢዚ ኢሰታሰ አዋ ገሻሰ የቲዛይሳ ኦኬኪቤቴና።

28 ሄሳ ገሻሽ ይሱሲ፡ «አንቲ አሳ ና ቶቄ ሂሰቲዲ ካቂዳ ዋዴ ታኒ ኢዛ ገዲዳይሳ አንቲ ኤራና፤ አዋይ ታና ታማርሲዳይሳ የታዲሰ አቲን ታኒ ታ ሼኔ ማላ አይኮካ አላንታይሳ አንቲ አኬካና።

29 ታና ከቲዳይሲ ኢዚ ታናራ ዴሰ። አይ ዋዴካ ታ ኡፋይሲዛዝ ኦላዛ ገሻሽ ኢዚ ታና ጸላላ ይገ አገቤና» ገዴሰ።

30 ኢዚ ሄሳ የቲዳ ማላ ዳሮ አሳይ ኢዛን አማኒዴሰ።

ፖኦ ናይታ

31 ይሱሲ ባና አማኒዳ አይሁዳታ፡ «አንቲ ቱሙ ታ ቃላን ዲኮ አንቲ ቱማፔ ታና ካሊዛይታ ገዴና።

32 ቱማይ አዛኮ አንቲ ኤራናኔ ቱማይካ አንቲና ዋዛና» ገዴሰ።

33 ኢሰቲካ ኢዛሰ ዛሪዲ፡ «ኑኒ አብራሃሜ ናይታኮ! ኑ ኦናሰካ አይሌቲ ኤሮኮ፤ ሂሰቲን ኔ ኑና ዋናዳ አንቲ ዋዜታና ጋይ?» ገዴ።

34 ይሱሲካ ኢሰታሰ፡ «ታ አንቲሰ ቱሙ ጋይሰ፤ ናጋራ ኦላዛዴይ ዉሪ ናጋራሰ አይሌ፤

35 አይ ዋዴካ አይሌይ ሶን ሉጺ ዴኤና። ይሎይ ገዲኮ አይዴካ ሶን ዴሰ።

36 ሂሰቲኮ ናዚ አንቲና ዋዚኮ አንቲ ዋዜቲዳይታ ገዴና።

37 አንቲ አብራሃሜ ናይታ ገዲዳይሳ ታ ኤራይሰ፤ ገዶ አቲን ታ ቃላ አንቲ ኤሮ ገ ኤኮንታ ገሻሽ ታና ዋዳናሰ ኮዬታ።

38 ታኒ ታ አዋ አቻን ቤኢዳይሳ አንቲሰ የታይሰ፤ አንቲ ቃሴ አንቲ አዋፔ ሲዬዳይሳ ኦላታ» ገዴሰ።

39 ኢሰቲካ ኢዛሰ፡ «ኑ አዋይ አብራሃሜ» ገዲ ዛሪ የቲን ይሱሲ ኢሰታሰ፡ «አንቲ አብራሃሜ ና ገዲዳኮ አብራሃሜሶ ኦፋና።

40 አንቲ ገዲኮ ታኒ ጸሳፌ ሲዬዳ ቱማ አንቲሰ የቲን ታና ዋዳናሰ ገጺ ዴንዲዴታ። ገዶ አቲን አብራሃሜይ ሄሳሶ ኦላቤና።

41 አንቲ አንቲ አዋሶ ኦላታ» ገዴሰ። ኢሰቲካ ዛሪዲ፡ «ኑ ላይማን ይሌቲዳ ና ገዶኮ፤ ኑ አዋይ ኢሲ ጸሳ ጸላ» ገዲ ኢዛሰ ዛሪዲ።

ጸላኤ ናይታ

42 ይሱሲ ኢሰታሰ፡ «አንቲ አዋይ ጸሳ ገዲዳኮ ታኒካ ጸሳፌ ኬዛ ዬዳ ገሻሽ አንቲ ታና ዶሳናኮሺን፤ ታና ኢዚ ከቲዴሰ አቲን ታ ታርካ ታ ሼኔን ያቤኬ።

43 ታ የቲዛይሳ አይሰ ዩሺ ቆፔኬቲ? ጋሶይካ አንቲ ታ ቃላ ሲያና ኮኾንታ ገሻሳ።

44 አንቲ አንቲ አዋ ጸላኤ ናይታ፤ አንቲ አዋ አዋ ፖላና ኮዬታ፤
ኢዚ ካሴካ ሸምፖ ዋጂዳዴ። ኢዛ አቻን ቱማይ ዶንታ ገሻሰ
ኢዚ ቱማን ኤቂቤና፤ ኢዚ ባ ሁኤሰ ዋርዳንቻኔ ዋርዶ አዋ
ጊዲዳ ገሻሰ ኢዚ ዋርዶ ሃሳያ ባፔ ሜጂ ኤኪዲ ሃሳዬሰ።

45 ታ ቃሴ ቱሙ ሃሳይዛ ገሻሰ አንቲ ታና አማኔኬታ።

46 አንቲ ጊዶፌ ታና፡ ሳ ሃኖ ናጋራ ኦሳዳሳ፣ ጊዲ ማርካራ
ላላናሰ ሞታና ዳንዳይዛዴይ ዲዜ? ታ ቱሙ ሃሳይዛዴ ጊዲኮ
ሂሰቲን አዛሰ ታና አማኔኬቲ?

47 ጸሳፌ ጊዲዳ አሲ ጸሲ ጊዛ ሲዬሰ፤ አንቲ ጊዲኮ ጸሳፌ
ጊዶንታ ገሻሰ ጸሳ ቃላ ሲዬኬታ» ጊዴሰ።

ዬሱሲ ባ ገሻሰ ሃሳይዴሰ

48 አይሁዳቲካ ዛሪዲ፡ «ኑ ኔና ኔ፡ ሳማሪያ አሳ፤ ኔ ቦላ
ዳይዳንሊ ዴሰ፣ ጊዳይሲ ቱሙ ዴኔ?» ጊዳ።

49 ዬሱሲ ኢሰታሰ፡ «ታኒ ታ አዋ ቦንቻይሰ አቲን ዳይዳንሊ
ታ ቦላ ባ። አንቲ ጊዲኮ ታና ካወሸታ።

50 ታኒ ታሰ ቦንቸ ኮይኬ። ታ ቦንቸታና ማላ ኮይዛዴይ ቃሴ
ዴሰ። ኢዚካ ፒርዳ ፒርዳናዴ።

51 ታ አንቲሰ ቱሙ ጋይሰ፤ ኦኒካ ታ ቃላ ናጊኮ ሃይቆ ሙሌካ
ሃይቆና» ጊ ዛሪዴሰ።

52 አይሁዳቲ ኢዛ፡ «ኔ ቦላ ዳይዳንሊ ዲዛይሳ ሃኒ ኦኒ
ኤሪዶሰ። አብራሃሜይ ሃይቂዴሰ፤ ናቤቲካ ኢዛሶ ሃይቂዳ። ኔ
ቃሴ፡ ሳኒካ ሙሌ ሃይቆ ቤዬና፣ ጋ ዮታሳ።

53 ኔ ኑ አዋ አብራሃሜይ አጃይ? ኢዚ ሃይቂዴሰ፤ ናቤቲካ
ሃይቂዳ፤ ሂሰቲን ኔ ኔና ኦና ጋና ኮያዲ?» ጊዳ።

54 ዬሱሲካ ኢሰታሰ፡ «ታ ታርካ ታና ቦንቸኮ ታ ቦንቸይ ሃዳ።
ታና ቦንቸዛዴይ ጊዲኮ አንቲ፡ ሳኒካ ኑ ጸሳ፣ ጊዛይሲ ታ አዋ።

55 አንቲ ኢዛ ኤርንታ ኦጊኮካ ታ ኢዛ ኤሪዶሰ። ታ ኢዛ ኤሪኬ
ጊኮ ታኒካ አንቲ ማላ ዋርዳንቻ ጊዳይሰ፤ ታ ቃሴ ኢዛ ኤሪዶሰ፤
ኢዛ ቃላካ ናጋይሰ።

56 አንቲ አዋ አብራሃሜይ ታ ጋላሰ ቤያናሰ አሞቲዲ ቤዬዴሲኔ
ኡፋዬቲዴሰ» ጊዴሰ።

57 አይሁዳቲ ቃሴ፡ «ኔሰ ቡሮ ኢቻሹ ታሙ ላይሰ ኩሞንታ
ኔኒ አብራሃሜ ቤያዲ?» ጊዳ።

58 ዬሱሲካ፡ «ታ አንቲሰ ቱሙ ጋይሰ፤ አብራሃሜይ ዬሌታናፔ
ካሴካ ታኒ ዳይሰ» ጊዴሰ።

59 አይሁዳቲ ሄራካ ኢዛ ጫዳናሰ ወሪ ሹቾ ዴንሊዳ፤ ጊዶ
አቲን ዬሱሲ ኢሰታ ማታፔ ቆቲቲዲ ጸሳ ኬላፌ ኬዚ ቢዴሰ።

9

ዩሱሲ ፓሊዳ ቆቄ አዳዛ

¹ ዩሱሲ ኦጌራ አፏ ቢሼ ባ አዩይ ኡሎፔ ዩሌቶሶፌ አይፌ ቆቄዳዳ ቤዪዳስ።

² ኢዛ ካሊዛይቲ ኢዛ፥ «አስታማሬ! ሃይሲ አዳዚ ቆቄ ጊዲ ዩሌታና ማላ ናጋራ ኦሊዳይ ኦኔ? ኢዛ ዩሊዳይቲ ኦሊዳዬ? ኢዚ ኦሊዳዬ?» ጊዲ ዩሱሳ ኦይቺዳ።

³ ዩሱሲካ ኢስታስ፥ «ኢዛ ጊዲኒካ ኢዛ ዩሊዳይቲካ ናጋራ ኦሊቤቲና፥ ኢዚ ሄሳላ ሃኒዳይ ጸሳ ኦሶይ ኢዛ ቦላ ቆንጫናሳ።

⁴ ጋላሳራ ታና ኪቲዳዳ ኦሶ ኦላናስ ታስ ቤሴስ። ቡሮ ኦኒካ ኦላናስ ዳንዳዮንታ ቃማይ ያና።

⁵ ሃ ቢታ ቦላ ዲዛ ዎዴ ሃ ቢታስ ፖኦይ ታና» ጊዳስ።

⁶ ሄሳ ጊ ሲሚዲ ቢታ ቦላ ጩቾ ጩቲዲ ባ ጩቻን ኡርቃ ሹጊሲዲ አዳዛ አይፌዛ ሄ ኡርቃ ቲይዲ፥

⁷ «ባዳ ሴሊሆሜን አሳይ ጸማቄቲዛሰን ሜጩታ» ጊዳስ። ሴሊሆሜ ጉሲ ኪቲቲዳይሳ ጉሳ። አዳዚካ ቢዲ ሜጩቲዲ ጸሊሼ ሲሚ ዪዳስ።

⁸ ኢዛ ዶላቲኔ ካሴ ኢዚ ሄን ዎሲሺን ቤኡዳ አሳይ፥ «ሃይሳዳይ ካሴ ኡቲዲ ዎሲዛ አዳዛ ዳኔ?» ጊዳ።

⁹ ኢስታፌ ኢሲ ኢሲ አሳቲ፥ «ኤ ኢዛኮ» ጊዳ። ባጋይቲ፥ «ኢዛ ዳና» ጊዳ። ኢዚ ቃሴ፥ «ታ ኢዛኮ» ጊዳስ።

¹⁰ ኢስቲካ፥ «ሂስቲን ኔ አይፌይ ዋኒ ጸሊዳ?» ጊ ኦይቺዳ።

¹¹ ኢዚካ ዛሪዲ፥ «ዩሱሳ ጌቲቲዛ አሲ ቢታ ሙኑቂዲ ታ አይፌዛ ሄ ኡርቃ ቲይዲ ታና፥ ባዳ ሴሊሆሜን ሜጩታ» ጊ ዮቲን ታ ባዳ ሜጩታዳ ጸላናስ ዳንዳያዲስ» ጊዳስ።

¹² ኢስቲካ፥ «ሂስቲን ሄሳዳይ ሃኢ አዋን ዲዜ?» ጊዳ፤ ኢዚካ፥ «ታ ኤሪኬ» ጊዳስ።

ፋርሳዌቲ አዳዚ ዋኒ ፓጺዳኮ ቆሮ አይኪዳ

¹³ ኢስቲካ ሄ ካሴ አይፌ ቆቄ አዳዛ ፋርሳዌታኮ ኤፌዳ።

¹⁴ ዩሱሲ ኡርቃ ሙኑቂዲ አዳዛ አይፌ ፓሊዳ ጋላሳይ አይሁዳታ ሳሞባታ ጋላሳ።

¹⁵ ሄሳ ጊሻስ ፋርሳዌቲ አዳዛ ኢዚ ዎስቲ ጸሊዳኮ ኢዛ ኦይቺዳ። አዳዚካ ዛሪዲ፥ «ኢዚ ታ አይፌን ኡርቃ ቲይዳስ፤ ታኒካ ሜጩታዲስ፤ ሄኮ ሃኢ ጸላዲስ» ጊዳስ።

¹⁶ ፋርሳዌታፔ ኢሲ ኢሲ አሳቲ፥ «ሃይሲ አዳዚ ሳሞባታ ቦንቾንታዳ ጊዲዳ ጊሻስ ኢዚ ጸላፌ ጊዳና» ጊዳ። ባጋይቲ

ቃሴ፡ «ናጋራንቻይ ሃይሳ ማላ ማላታ ዋኒ ኦላና ዳንዳይዜ?»
ጌዳ፡ ሄሳ ገሻሰ ኢስታ ጌዳን ፓላማይ ሜዴቲዳስ፡

17 ሂስቲን ካሴ አይፌ ቆቄ አዳዛኮ ሲሚዲ፡ «ሃ ኔ አይፌ
ፓሊዳ አዳዛ ገሻሰ ኔ አይ ጋይ?» ጌዳ፡ አዳዚ ዛሪዲ፡ «ኢዚ
ናቤኮ!» ጌዳስ፡

18 አይሁዳቲ አዳዛ ዬሊዳ አይይራኔ አዋራ ዳይገሲ ኤሂሳና
ጋካናሰ አዳዚ ካሴ ቆቄ ጌዲዳይሳ አማኒቤቲና፡

19 ኢስቲካ ዬሊዳይታ፡ «ኢንቲ፡ ሱስ ቆቄ ናይ ዬሌቲዳስ» ጌዛ
ናዚ ሃይሴ? ሂስቲን ሃኢ ዋኒዲ ዳላና ዳንዳይዳ?» ጌዳ፡

20 ዬሊዳይቲካ ሂዝጊ ዛሪዳ፡ «ኢዚ ኦ ና ጌዲዳይሳኔ ቆቄ
ጌዲ ዬሌቲዳይሳ ኤርሰ፡

21 ሃኢ ቃሴ ኢዚ ዋኒ ዳላና ዳንዳይዳኮኔ ኢዛ አይፌ ኦኒ
ፖጊዳኮ ኦ ኤርኮ፡ ኢዚ ባና ዳንዳይዳይ ጌዲዳ ገሻሰ ኢዚ ባ
ገሻሰ ዮታናሰ ዳንዳይሰ ኢዛ ኦይቺቲ» ጌዳ፡

22 ኢዛ ዬሊዳይቲ ሂሳላ ጌዲይ ኦኒካ ዬሱሳ ኢዚ ከርሰቶሳ
ጌዲ ማርካቲዳይ ዉሪ አይሁዳታ ዋሳ ከላፌ ጎዴታና ማላ
አይሁዳቲ ካሴ ሴራ ኦሊዳ ገሻሰ አይሁዳታሰ ባቢዲ ጌዳ፡

23 ሄሳ ገሻሰ፡ «ኢዛ ዬሊዳይቲ ኢዚ ባና ዳንዳይዳይ ጌዲዳ
ገሻሰ ኢዛ ኦይቺቲ» ጌዳ፡

24 ካሴ ቆቄ አዳዛ ቃሴካ ዳይጌዲ፡ «ሃይሶ ኔ ቱማዮ ዮታዳ
ጸሳ ቦንቻ፡ ሃይሴ አዳዚ ናጋራንቻ ጌዲዳይሳ ኦ ኤርሰ» ጌዳ፡

25 ኢዚካ፡ «ኢዚ ናጋራንቻ ጌዲን ታ ኤሪኬ፡ ጌዶ ኦቲን ታ
ካሴ ቆቄ ጌዲዳሮኔ ቃሴ ሃኢ ታ ዳሊዛሮ ሃኖ ጸላ ኤራይሰ»
ጌዳስ፡

26 ኢስቲ ቃሴ ኢዛ፡ «ኢዚ ኔሰ አይ ኦሊዳ? ኔ አይፌዛ
ዋስቲ ፖጊዳ?» ጌዲ ኦይቺዳ

27 ኢዚካ፡ «ታ ኢንቲስ ካሴ ዮቲን ዋዚናን ዋሊ ሲዩቤኬታ
ሸን ሃኢ ቃሴ ኦዛሰ ዛሬሊ ሲያና ኮዬቲ? ኢንቲካ ኢዛ ካሊዛይታ
ጌዳና ኮዬቲ?» ጌዳስ፡

28 ሄሳፌ ጉዬ ኢዛሰ፡ «ኦ ሙሴ ካሊዛዴንታ፤ ኔ ኢዛ ካሊዛዴ
ጌዳ፡

29 ካሴ ጸሲ ሙሴራ ሃሳዬቲዳይሳ ኦ ኤርሰ፤ ሃይሴ አዳዚ
አዋፔ ዩዳኮ ኦ ኤርኮ» ጌዳ፡

30 አዳዚካ ኢስታሰ፡ «ኢዚ አዋፔኮን ኢንቲ ኤርንታይሲ
ማላሊሴስ፤ ጌዶ ኦቲን ታ አይፌ ዳሊሲዳይዴ ኢዛ፡

31 ጸሲ ባሰ ያዩዛዴሲኔ ኢዛ ሽኔ ኦሊዛዴሰ ኦቲን ናጋራንቻ
ኦሰ ሲዮንታይሳ ኦ ኤርሰ፡

32 አይፌ ቆቂዲ ዩሌቲዳዴ አይፌ ዴሊዴሰ ገዛይሳ አላማይ ማይቆቶሶፔ ኦኒካ ሲዪ ኤሬና።

33 ሃይሳዴይ ጸሳፌ ገደንታኮ ሃይሳ ኦላናሰ ዳንዳዬና» ገዛሬዴሰ።

34 ኢሰቲካ ኢዛ፥ «ኔኒ ኔሰ ሙሌ አሳቴላይ ናጋራን ሙኑቄቲን ዩሌቲዳይሲ ኦና ታማርሳና ዋና ጸላዲ?» ገዲ ኢዛ ጎዲዳ።

አያና ዮኦይ ቋሚዳዴ

35 አዴዛ ጎዲዳይሳ ዩሱሲ ሲዪዴሰ። ኢዛ ዴሚዲ፥ «ኔ አሳ ናን አማናይ?» ገዴሰ።

36 አዴዚካ፥ «ጎዶ! ታ ኢዛን አማናና ማላ ኢዚ ኦኔ?» ገዴቹዴሰ።

37 ዩሱሲካ፥ «ኔ ኢዛ ቤያዳሳ፤ ሃኢ ኔናራ ሃሳይዛይ ኢዛኮ!» ገዴሰ።

38 አዴዚካ፥ «ጎዶ! ኢዛ አማናዲሰ» ገዲ ኢዛሰ ሆኪ ጎይኒዴሰ።

39 ዩሱሲካ፥ «ቆቄቲ ዴላና ማላኔ ዴሊዛይቲ ቆቃና ማላ ፒርዳናሰ ታ ሃይሳ ሃ አላማ ያዲሰ» ገዴሰ።

40 ኢዛራ ዲዛ ፋርሳዊታፔ ኢሲ ኢሲ አሳቲ ሄሳ ሲዪዲ፥ «ሄሲ አይ ጉሴ? ሂሰቲን ኦኒካ ቆቄ?» ገዴ።

41 ዩሱሲካ ኢሰታ፥ «ኢንቴ ቆቄታ ገዲዳኮ ኢንቴሰ ናጋራ ገዴናሽን ኢንቴ ሃኢ፥ ኩ ዴሎሰ» ገዛ ገሻሰ ኢንቴ ናጋራንቻ ገዲዳ ማላ ዳና» ገዴሰ።

10

ሎኦ ሄንላንቻ

1 ዩሱሲ፥ «ታ ኢንቴሰ ቱሙ ጋይሰ፤ ዶርሳታ ዪሬን ፔንጌራፔ ኣቲን ሃራ ባጋራ ጉፔ ጌሊዛይ ካይሶኔ ቦንቁዛዴ።

2 ፔንጌራ ጌሊዛዴይ ኢዚ ዶርሳታ ሄሚዛዴ።

3 ፔንጌ ናገዛዴይ ኢዛሰ ፔንጌዛ ዶዬሰ። ዶርሳቲካ ኢዛ ቃላ ሲዬቴሰ፤ ባ ዶርሳታ ሱንላራ ሱንላራ ዴይጊ ኬሴሰ።

4 ባይታ ኡባ ኬሲዳፔ ጉዬ ኢሰታ ሲንሐ ኣጁዲ ካሌፌሰ፤ ዶርሳቲካ ኢዛ ቃላ ኤሪዛ ገሻሰ ኢዛ ካሌቴሰ።

5 ኢማላ አሳ ቃላ ኤርንታ ገሻሰ ኢዛፔ ባቃቴቴሰ ኣቲን ሙሊካ ኢዛ ካሌቴና» ገዴሰ።

6 ዩሱሲ ሄሳ ለሚሶዛ ኢሰታሰ ዮቲዴሰ ሽን ኢሰቲ ቃሴ ኢዚ ኢሰታሰ ዮቲዳይሳ ኣይኮካ ኤሪቤቴና።

7 ሃሳ ገሻሰ ዩሱሲ ቃሴካ ኢሰታስ፡ «ታ ኢንቴስ ቱሙ ጋይሰ፤ ደርሳታ ፔንጌይ ታና።

8 ታፔ ካሴ ዩዳይቲ ወሪ ካይሶኔ ቦንቂዛይታ። ደርሳቲ ገዲኮ ኢሰቲ ገዛ ሲዩቤቴና።

9 ፔንጌይ ታና፤ ታ ባጋራ ጌሊዛዴይ ወሪ አታና፤ ጌላናኔ ኬዛና፤ ሄሜቲዛሶካ ዴማና።

10 ካይሶይ ካይሶታና፤ ዋዳናሲኔ ዳይሳናስ ጸላ ዩሰ። ታኒ ገዲኮ ኢንቴስ ዴኦይ ዳና ማላኔ ኢንቴስ ኬሂ ዳራና ማላ ያዲሰ።

11 «ታኒ ሎኦ ሄንላንቻ፤ ሎኦ ሄንላንቻይ ባ ሼምፖ ባ ደርሳታ ገሻሰ አሊ አሜሰ።

12 ሚሼራ ቃጸሬቲዲ ሄሚዛዴይ ገዲኮ ደርሳቲ ኢዛስ ገደንታ ገሻሰ ካና ሱይቴይ ዩዛ ዋዴ ደርሳታ ዩጌዲ ባስ ባቃቴስ። ካና ሱይቴይካ ደርሳታ ዳፊ ዳፊ ሜሲኔ ላሌሰ።

13 ባቃቴዛዴይ ሚሻን ቃጸሬቲዳዴ ገዲዳ ገሻሲኔ ደርሳታስ ሚሼቶንታ ገሻሳ።

14 «ሎኦ ሄንላንቻይ ታና፤ ታኒ ታ ደርሳታ ኤራይሰ፤ ኢሰቲካ ታና ኤሬቴስ።

15 ሄሲካ አዋይ ታና ኤሪዛይሳ ማላ ታኒ ታ ሼምፖ ደርሳታ ገሻሰ አላ አማና።

16 ሃይሳ ሃ ደርሳ ዩሬን ጌሎንታይቲ ታስ ሃራ ደርሳቲ ዴቴስ፤ ታ ኢስታካ ሃ ኤሃናስ ታስ ቤሴስ፤ ኢሰቲካ ታ ቃላ ሲያናኔ ኢሲ ሜሄ ገዳና። ሄሚዛይሲካ ኢሳዴ ገዳና።

17 ታ ዛራዳ ዴንላናስ ታ ሼምፖ አላ አሚዛ ገሻሰ ታ አዋይ ታና ዶሴስ።

18 ታኒ ታ ሼምፖ ታ ደሳራ አላ አማዲስ አቲን ኦኒካ ታፔ ዋሊ ኤኬና፤ ታ አላ አማናስ ገዲን ዋይኮ ዛራ ዴንላናስ ገዲን ሼኔይ ታሳ፤ ሃሳ ሄ አዛዘዛ ታኒ ታ አዋፔ ኤካዲስ» ገዴስ።

19 ሃሳ ሄ ቃላፔ ዴንዲዳይሳን ኣይሁዳታ ገደን ቃሴካ ሻኬቴሊ ሜጴቲዴስ።

20 ዳሮ አሳይ፡ «ኢዛ ቦላ ዳይዳንሊ ዲዛ ገሻሲኔ ኢዚ ጎሽ ገዲዳ ገሻሰ ኢንቴ ኢዚ ገዛይሳ ኣይሰ ሲዩቴ?» ገዳ።

21 ባጋይቲ ቃሴ፡ «ዳይዳንሊ ዲዛዴይ ሃይሳ ማላ ዴና፤ ዳይዳንሊ ቆቂዳ ኣይፊ ፓሊ ኤሪዜ?» ገዳ።

ኣይሁዳቲ አማኖንታ ኢዲዳ

22 ዩሩሳሌምን ጸሓ ኩላ ኦራሶ ባኣሌ ቦንቸ ዋዴይ ጋኪዴሰ፤
ሄ ዋዴይካ ባልጎ።

23 ዩሱሲ ጸሓ ኩላ ጊቤ ጊዶን ሶሎሞኔ ሲሜሬቴላሶራ
አዲሽጎ።

24 አይሁዳቲ ኢዛ ጊዶ አሊዲ፤ «ኔ አይዴ ጋካናስ ኑ ዋዚና
ሂርጋን ጋሞኢሳኔ? ኔ ጸሲ ከቲዳዴ ጊዲኮ ኑስ ቆንጨሳ ዮታ»
ጊዳ።

25 ዩሱሲካ ኢስታስ፤ «ታ ኢንቴስ ዮታዲስኮሽን ኢንቴ ጊዲኮ
አማኒቤኬታ። ታ አዋ ሱንላን ታ ኦሊዛ ማላታቲ ታ ጊሻስ
ዮቴቴስ።

26 ኢንቴ ቃሴ ታ ዶርሳታ ጊዶንታ ጊሻስ ታና አማኔኬታ።

27 ታ ዶርሳቲ ታ ቃላ ሲዬቴስ። ታኒካ ኢስታ ኤራይስ፤ ኢስቲካ
ታና ካሌቴስ።

28 ታ ኢስታስ ሜርና ዴኦ አማና፤ ሙሌካ ኢስቲ ዳዬቴና፤
ኢስታ ታ ኩሼፔ ዋሊ ኤካናስ ዳንዳያናዴይ ኦኒካ ዴና።

29 ታስ ኢስታ አሚዳ ታ አዋይ ኡባፌ አዴስ፤ ታ አዋ ኩሼፔ
ኢስታ ኦኒካ ቦንቃናስ ዳንዳዬና።

30 ታኒኔ ታ አዋይ ኑ ኢሲኖ» ጊዴስ።

31 አይሁዳቲ ኢዛ ጫዳናስ ቃሴካ ሹቾ ዴንሊዳ።

32 ዩሱሲካ፤ «አዋፔ ጊዲዳ ዳሮ ጊታ ማላታታ ታ ኢንቴና
ቤሳዲስ። ሂስቲን ሃ ታ ቤሲዳይታፔ አዋሪ ጊሻስ ታና ሹቻራ
ጫዴቲ?» ጊዴስ።

33 አይሁዳቲካ፤ «ኑ ኔና ሹቻራ ጫዲዛይ ኔ አስ ጊዳ ኡታዳ
ኔና ኔርካ ጸስ ኬሳዳ ጫሻ ቃላ ኔ ሃሳይዳ ጊሻሳፌ አቲን ኔ ሎኦ
ኦሊዳይሳ ጊሻስ ዴና» ጊዲ ኢዛስ ዛሪዳ።

34 ዩሱሲካ ኢስታስ፤ «ኢንቴ ዋጋ ጊዶን፤ ታ ኢንቴና ጸሳታ
ጋዲስ» ጌቴቲ ዳፌቲቤኔ?

35 ጸሓ ቃላይ ኢስታስ ዪዳ አሳታ፤ «ጸሲ ጊኮ ማጻፋይ
ሻሬታናስ ዳንዳዮንታ ጊዲኮ»

36 ሂስቲን፤ «ታ ጸሓ ና» ጊዳ ጊሻስ አዋይ ባ ሻኪ
ዳማሲዳይሳኔ ሃ ዲጌ አላሜ ከቲዳይሳ ኢንቴ፤ «ኔ ጫዳሳ»
ጊዲ ታና ዋርዶራ ኣዛስ ሞቴቲ?

37 ታ አዋይ ኦሊዛይሳ ታ ኦሶንታ አጊኮ ታናን አማኖፒቴ።

38 ታ ኢዛሶ ኦሊዛ ጊዲኮ ኢንቴ ታና አማኖንታ አጊኮካ ታ
አዋይ ታናን ዲዛይሳ ታኒካ ኢዛን ዲዛይሳ ኢንቴ ኤራና ማላኔ
ዩሺ ቆፓና ማላ ኢዚ ኦሊዳ ማላታን አማኒቴ» ጊዴስ።

39 ቃሴካ ኢስቲ ኢዛ ኦይካናሰ ኮዬዳ ሺን ኢዚ ኢስታ ኩሼፔ ኬሲ ኤኪ ቢዴሰ።

40 ሄሳፌ ጉዬ ዬሱሲ፡ የሃኒሲ ካሴ ጸማቂዛሶ የርዳናሴፔ ሄ ፒንሰ ሲሚዲ ሄን ጋምኢዴሰ።

41 ዳሮ አሳይ ኢዛኮ ዬዴሰ፤ ኢስቲ ቃሴ፡ «የሃኒሲ ኢሲ ማላታካ ኦሲቤና፤ ጊዶ አቲን ሃይሳ አዴዛ ጊሻሰ ኢዚ የቲዳይሲ ወሪካ ቱሙኮ» ጊዳ።

42 ሄንካ ዳሮ አሳይ ዬሱሳን አማኒዴሰ።

11

አላዛሬ ሃይቆ

1 ቢታኒያ ጌቲቲዛሶን ማራማኔ ማርታይ ዲዛ ጉታን አላዛሬ ጌቲቲዛይይ ሳኬቲዴሰ።

2 ኢዚ ኢሻ አላዛሬይ ሳኬቲዳ ማራማ ካሴ ዬሱሳ ቶሆ ቦላ ሺቶ ጉሳዳ ዬሱሳ ቶሆ ባ ሁኤ ቢናናን ቁጨዳሮኮ።

3 ሚቼቲካ፡ «ጎዶ! ኔ ዶሲዛይሲ ሳኬቲዴሰ» ጊዲ አሰ ዬሱሳኮ ከቲዳ።

4 ዬሱሲ ሄሳ ሲዬዲ፡ «ሃ ሳኮይ ጸሳ ናይ ኢዛን ቦንቼታና ማላኔ ጸሲ ቦንቼታናሳፌ አቲን ኢዛ ሃይቆሰ ጋሊዛዝ ዴና» ጊዴሰ።

5 ዬሱሲ ማርታ ኢዚ ሚቼዮ ማራሞኔ አላዛሬ ሲቁሰ።

6 ጊዶ አቲን አላዛሬይ ሳኬቲዳይሳ ሲዬዲ ሄን ባ ዲዛሶን ናምኡ ጋላሰ ጋምኢዴሰ።

7 ሄሳፌ ጉዬ ባና ካሊዛይታ፡ «አኔ ዩሁዳ ቢታ ሲሚ ቦሰ» ጊዴሰ።

8 ኢስቲካ፡ «አስታማሬ! ጉላ ዋዴፔ ካሴ አሳይ ኔና ሹቻራ ጫዳና ኮዬቲሰኮሺን፤ ኔ ቃሴ ሃኢ ሄ ሲማ ባኔ?» ጊዳ።

9 ዬሱሲ ኢስታሰ፡ «ኢሲ ጋላሳን ታማኔ ናምኡ ሳቲይ ዴሰ ዴኔ? ጋላሳራ ሄማቲዛ አሲ ሃ አላማዛ ፖኦን ሲማሬቲዛ ጊሻሰ ቆዴቲና።

10 ቆዴቲዛዴይ ጊዲኮ ኢዚ ቃማራ ሄማቲዛዴ። ጋሶይካ ፖኦይ ባይንዳ ጊሻሳ» ጊዴሰ።

11 ሄሳ ኢስታሰ የቲዳፔ ጉዬ፡ «ኮ ላጌ አላዛሬይ ቋሰኪዴሰ፤ ታኒካ ኢዛ ቋሰኪፌ ዴንፋና ባይሰ» ጊዴሰ።

12 ኢዛ ካሊዛይቲ ኢዛ፡ «ጎዶ! ኢዚ ቋሰኪዳ ጊዲኮ ዴንዳና» ጊዳ።

13 ዬሱሲ ኢስታስ ሄሳ የቲዳይ አላዛሬ ሃይቆ ገሻሳ፤ ጊዶ አቲን ኢዛ ካሊዛይታስ ቃሴ ጳስኮ ገሻስ የቲዳ ሚሳቲዳስ።

14 ሄሳ ገሻስ ቆንጩራ ኢስታስ፡ «አላዛሬይ ሃይቁዳስ።

15 አንቲ አማናና ማላ ታ ሄን ዶንታ አጊዳይሲ አንቲ ገሻስ ታና ኡፋይሴስ፤ ሃኢ ጊዳኮ አኔ ጌዴ ኢዛኮ ሶስ» ጊዳስ።

16 ቃሴ ዲዲሞሳ * ጌቲቲዛ ቶማሲ ሃንኮ ዬሱሳ ካሊዛይታ፡ «አኔ ኮኒካ ቢዲ ኢዛራ ኢሲፌ ሃይቆስ» ጊዳስ።

ዬሱሲ አላዛሬ ሚቹታ ሚንፌሊዳስ

17 ዬሱሲ ቢ ንኪሺን አላዛሬይ ሃይቁ ሞጌቲን ኦይዱ ጋላስ ጊዲዳስ።

18 ቢታኒያይ ዬሩሳላሜፔ ባጋ ሳቲ ኦጌ ሃኬስ።

19 ኢስታ አሻይ ሃይቁዳ ገሻስ ማራሞኔ ማርታ ሚንፌላናስ ዳሮ አይሁዳ አሳይ ኢስታኮ ሸቁዳስ።

20 ዬሱሳ ዩሳ ማርታይ ሲያዳ ኢዛ ሞካ ኤካና ባዱስ፤ ማራማ ጊዳኮ ሶን ኡታዱስ።

21 ማርታይ ዬሱሳ፡ «ጎዶ! ኔ ሃን ዲዛኮ ታ አሻይ ሃይቁናኮሺን።

22 ሃኢካ ጊዳኮ ኔ ዎሲዳ ኡባ ጸሲ ኔስ አማናይሳ ታ ኤራይስ» ጋዱስ።

23 ዬሱሲካ ኢዚስ፡ «ኔ አሻይ ዴንዳና» ጊዳስ።

24 ማርታይ ቃሴ፡ «ጩሴላን ዴንላ ዎዴ ኢዚ ዴንዳናይሳ ታኒካ ኤራይስ» ጋዱስ።

25 ዬሱሲካ ኢዚስ፡ «ዴንዶይኔ ዴኦይ ታና፤ ታና አማኒዛዴይ ሃይቁኮካ ፓጸ ዳና።

26 ታናን ዲዛዴይኔ ታና አማኒዛዴይ ሙሌካ ሃይቁና፤ ሄሳ ኔ አማናይ?» ጊዳስ።

27 ኢዛካ ዛራዳ፡ «ኤ ጎዶ! ኔኒ ዱጌ ሃ አላሜዛ ኪቲቲዳ ጸሳ ና ጊዲዳይሳ ታ አማናይስ» ጋዱስ።

28 ሄሳ ጋዳኔ ሲማ ባ ሚቹዮ ማራሞ ዲማ ጸይጋ ኬሳዳ፡ «አስታማሬይ ኔና ኮዬስ» ጋዱስ።

29 ማራማካ ሄሳ ሲዬዳ ኤሌላ ዴንዳዳ ኢዛኮ ባዱስ።

30 ሄሳ ጋካናስ ዬሱሲ ማርታራ ጋጊዳሶሆን ዴስ አቲን ጌዴ ጉታ ጊዶ ጌሊቤና

* 11:16 ዲዲሞሳ፡ ዲዲሞሳ ጉሲ ሜንቲ ጉሳ።

31 ማራሞ ሚንፊሊሽ ኢዚራ ሶን ዲዛ አይሁዳቲካ ማራማ ፑሱኩ ጋ ዴንዳ ኤቃዳ ኬዚዳይሳ ቤኢዲ ኢዛ አላዛሬ ዱፎ አቻን ዩካና ቢዛ ሚሳቲን ኢዞ ካሊዳ።

32 ማራማ ዩሱሲ ዲዛሶ ጋካ ኢዛ ዴሚዳ ማላ ኢዛ ቶሆ ቦላ ጉፋናዳ፡ «ጎዶ! ኔ ሃን ዲዛኮ ታ አሻይ ሃይቁናኮሺን» ጋዱሰ።

33 ኢዛኔ ኢዞ ካሊ ዩዳ አይሁዳቲ ዩኪዛይሳ ዩሱሲ ቤዪ ዳሮ ሚሽቲዲ፡

34 «ኢዛ አዋን ሞጊዳቲ?» ጊ ኦይቺዴሰ፤ ኢሰቲካ፡ «ጎዶ! ሃ ያዳ ቤያ» ጊዳ።

35 ዩሱሲካ አፋንጺዴሰ።

36 አይሁዳቲካ፡ «ኢዚ ኢዛ አይ ማላ ሲቂዛኮ ቤኢቲ» ጊዳ።

37 ኢስታ ጊዶፌ ኢሲ ኢሲ አሳቲ፡ «ሃይሲ ቆቄ ኣዴዛ አይፌ ፖግዳይሲ ሃይሳዴይ ሃይቆንታ ማላ ኦላናሰ ዳንዳዬ?» ጊዳ።

ዩሱሲ አላዛሬ ሃይቆፔ ዴንፊዴሰ

38 ዩሱሲ ኢዛ ዎዚናይ ሚሽቲን ጌዴ ዱፎዛኮ ቢዴሰ፤ ዱፎዚካ ሹቻራ ጎርደቲዳ ጎንጎሎ።

39 ኢዚካ ኢሰታ፡ «ሹቻ ዴንፊቲ!» ጊዴሰ፤ ሃይቂዳይሳ ሚቺያ ማርታይ፡ «ጎዶ! ኢዚ ሃይቂን ሃኙ ኦይዱ ጋላሰ ጊዲዳ ጊሻሰ ጸንቃናኮ!» ጋዱሰ።

40 ዩሱሲካ፡ «ኔ አማኒዛ ጊዲኮ ጸሳ ቦንቾ ቤያንዳሳ ጋዳ ኔሰ ታ ዮታቤኪና?» ጊዴሰ።

41 ሄሳ ጊሻሰ ሹቻ ዴንፊዳ፤ ዩሱሲካ ፑዴ ሳሎ ጸሊዲ፡ «ታ አዋዉ! ኔ ታ ጊዛዝ ሲዩዳ ጊሻሰ ታ ኔና ጋላታይሰ።

42 ኔ ኡባ ጋላሰ ታ ጊዛዝ ሲዩዳይሳ ታ ኤራይሰ፤ ጊዶ አቲን ታ ሄሳ ጊዳይ ሃይሳን ኤቂዳ አሳቲ ኔ ታና ኪቲዳይሳ አማናና ማላሳ» ጊዴሰ።

43 ዩሱሲ ሄሳ ጊዳፔ ጉዬ ካሌፊዲ ቃላ ቶቄ ሂሰቲዲ፡ «አላዛሬ! ሃ ኬዛ!» ጊዲ ጴይጊዴሰ።

44 ሃይቂዳ አላዛሬይካ ኩሜሳ አሳቲላይ ሞሳ ማይኦን ጸጾቲዳ ማላ ዱፎዛፔ ኬዚዴሰ። ዩሱሲካ፡ «ቢርሺ ዩዲቲ ቦ!» ጊዴሰ።

አሳይ ዩሱሳ ዎቋናሰ ጌማን ዞሬቲስ

(ማቶ 26:1-5፤ ማር 14:1-2፤ ሉቃ 22:1-2)

45 ሄሳ ጊሻሰ ማራሞ ሚንፊላና ዩዳ አይሁዳታፔ ዳሮ አሳይ ዩሱሲ ኦፊዳይሳ ቤኢዲ ኢዛን አማኒዴሰ።

46 ኢስታፌ ባጋይቲ ቢዲ ዩሱሲ ኦፊዳይሳ ፋርሳዌታሰ ዮቲዳ።

47 ሄሳ ቄሴታ ሃላቃቲኔ ፋርሳዌቲ አይሁዳታ ዱላታ ሺቃና ማላ ጾይጊዲ፡ «ሃ አዴዚ ዳሮ ዱማ ዱማ ማላታታ ኦሊዳይ ጊዲዳ ገሻሰ ኑ አይ ኦሊኮ ሎኦ?

48 ኑ ጮኡ ገኮ አሲ ወሪ ኢዛን አማናና ኦሮሜ አሲካ ዪዲ ሃይሳ ኑ ቢታኔ ኑ አሳ ኑፔ ኤካና» ጊዳ፡፡

49 ኢሰታ ጊዶፌ ኢሳዴይ ሄ ላይሰ ቄሴታሰ ዋና ሃላቃ ቃያፋይ፡ «ኢንቴ አይኮካ ኤሬኬታ፡፡

50 ዴሬይ ወሪ ጳያናፔ ዴሬ ገሻሰ ኢሲ አሲ ሃይቂኮ ሎኦ ጊዳና ገሻሰ ዩሺ ቆፔኬቲ?» ጊዴሰ፡፡

51 ኢዚ ሄሳ ባፔ ጊደንታ ሄ ላይሰ ኢዚ ቄሴታሰ ሃላቃ ጊዲዳ ገሻሰ ዬሱሲ አይሁዳ ዴሬ ገሻሰ ሲንፋፌ ሃይቃናይሳ ዮቲዴሰ፡፡

52 ኢዚ ሃይቃናይ ሄ ዴሬ አሳሰ ጸላ ጊደንታ ካሴ ላሌቲዳ ጸሳ ናይታካ ኢሲ ቦላ ሺሻናሳ፡፡

53 ሄ ጋላሳፌ ሃ ሲሚን ኢዛ ዎጳናሰ ማቂቲዳ፡፡

54 ሄሳ ገሻሰ ዬሱሲ ሄ ጋላሳፌ ሃ ሲሚን አይሁዳታ ጊደን ቆንጮራ ሲሜሬቲቤና፡፡ ጊዶ አቲን ዱጌ ባዘ ቢታ ማታን ዲዛ ኤፍሬሜ ጌቴቲዛ ካታማይ ዲዛሶ ቢዲ ባና ካሊዛይታራ ሄን ታኪዴሰ፡፡

55 አይሁዳቲ ፓዚጋ ባኣሌይ ማቲዳ ማላ ባኣሌይ ጋካናፔ ካሴ ጌሾ ዎጋ ኦፋናሰ ዳሮ አሳይ ዱማ ዱማ ዴሬፔ ዬሩሳላሚ ዪዴሰ፡፡

56 አሳይ ዬሱሳ ኮዪሼ ጸሳ ኬላን ኤቂዲ ባ ጊደን ኢሶይ ኢሳራ፡ «ኢንቴሰ አይ ሚሳቲዜ? ባኣሌዛሰ ዬኔሻ?» ጊዴሰ፡፡

57 ቄሴታ ሃላቃቲኔ ፋርሳዌቲ ቃሴ ዬሱሳ ኦይካናሰ ኢዚ አዋን ዲዛኮ ኤሪዛዴይ ኢሰታሰ ማላታና ማላ ካሴ አዛዚ ዎሊዳ፡፡

12

ዬሱሳ ሺቶ ቲይዳ ማጫሳዮ

(ማቶ 26:6-13፤ ማር 14:3-9)

1 ፓዚጋ ባኣሌሰ ቡሮ ኡሱፑን ጋላሲ አቲሺን ዬሱሲ ሃይቆፔ ዴንሊዳ አላዛሬይ ዲዛሶ ቢታኒያ ቢዴሰ፡፡

2 ሄን ዬሱሳሰ ካዎ ካሊዲ ማርታይ ኢዛ ካዎ ሚዚሺን ኢዛራ ኢሲፌ ማዳን ኡቲዳይታፔ ኢሶይ አላዛሬ፡፡

3 ማራማ ዳር አልኦ ዋጋራ ሻሚቲዳ ባጋ ሊቲሮ ጊዲዛ ጌሻ ናርዶሴ ሺቶ ኤካ ያዳ ዬሱሳ ቶሆ ቦላ ጉሳዳ ቶሆዛ ባ ሁኤ ቢናናራ ቁጫዴሰ፡፡ ኬላካ ሺቶ ሳዎይ ኩሚዴሰ፡፡

4 ዬሱሳ ካሊዛይታፔ ኢሶይ ዬሱሳ አሊ ኢማና ኣስቆርንቶ ዩሁዳይ፥

5 «ሃይሲ ሺቶዚ ሄዡ ጾቱ ዲናሬስ ባይዘቲዲ ሚሻይ አዛስ ማንቆታስ ኢማቲቤኔ?» ጌዴስ።

6 ኢዚ ሄሳ ጌዳይ ሚሽ ሺሺዛ ካራጺቱ ኦይኪዛዴይ ኢዛ ጌዲዳ ጌሻስ ሺቂዛ ሚሻፌ ባስ ሺሺዲ ጎኤቲዛዴ ጌዲዳ ጌሻሳ አቲን ማንቆታስ ሚሼቲዲ ጌዴና።

7 ዬሱሲ ቃሴ፥ «ሃይሲ ሺቶዚ ታስ ሞሳ ጋላሳስ ቆፊቲዳዝ ጌዲዳ ጌሻስ ሄ ዎዴ ጋካናስ ኢዛ ባ አቻን ናጉ፥ ቦቾፍቴ።

8 ማንቆቲ አይ ዎዴካ ኢንቴናራ ዴቴስ። ጌዶ አቲን ኢንቴ ታና ኡባ ዎዴ ዴማኬታ» ጌዴስ።

9 ሄ ዎዴ ዳር አይሁዳ አሳቲ ዬሱሲ ሄን ዲዛይሳ ኤሪዲ ኢዛኮ ዪዳ፤ ዪዳይቲካ ዬሱሳ ጸላላ ኮሽ ጌዶንታ ዬሱሲ ሃይቆፔ ዴንፊዳ አላዛሬካ ቤያናሳ።

10 ሄሳ ጌሻስ ቄሴታ ሃላቃቲ ዬሱሳራ አላዛሬካ ጋሊ ዎዳናስ ባ ጌዶን ዘሬቲዳ።

11 ሄሲካ አላዛሬ ጋሶን ዳር አይሁዳ አሳይ ዬሱሳኮ ቢ ቢዲ ኢዛ አማኒዛ ጌሻሳ።

ዬሱሲ ቦንቾን ዬሩሳሌም ጌሊዴስ

(ማቶ 21:1-11፤ ማር 11:1-11፤ ሉቃ 19:28-40)

12 ዎንቴላ ጋላስ ባአሌዛ ቦንቾና ዪዳ ዴሬይ ዬሱሲ ዬሩሳሌም ዪዛይሳ ሲዪዴስ።

13 ዛምባ ሃይሳ ኤኪዲ ዬሱሳ ሞካና ኬዚዴስ፤ ዴሬይ ቃላ ቶቄ ሂስቲዲ፥ «ሆሳኢና! ጎዳ ሱንፋን ዪዛ ኢስራኤሌ ካዎይ ኣንጃቲዳይሳ!» ጌዴስ።

14-15 ቤኒ፥ «ሃኔ!

ጲዮኔ ናዬ፥ ባቦፋ!

ሄኮ ኔ ካዎይ

ሃሬ ጉቱ ቶጌዲ ዬስ»

ጌቱቲ ጸፊቲዳ ማላ

ዬሱሲ ሃሬ ጉቱ

ዴሚዲ ቶጌዴስ።

16 ኢዛ ካሊዛይቲ ሄሳ ኡባ ኮይሮ ዎዚናን ዎሊቤቴና። ኢዛ ጌሻስ ጸፊቲዳይሳኔ ኢዛስ ኦሴቲዳ ሃኖካ ኡባ ዬሱሲ ሃይቆፔ ዴንዲዳፔ ጉዬ ኤሪዳ።

17 አላዛሬ ዱፎፔ ደይጊዲ ሃይቆፔ ዳንሒዳ ዋዴ ኢዛራ ኢሲፌ ዲዛ አሳይ ኢዛ ዳንሳ ገሻሰ ማርካቲዳ።

18 ዳሮ አሲካ ኢዚ ሄሳ ማላ ገታ ማላታ ኦሒዳይሳ ሲዱዲ ኢዛ ሞካና ኬዚዳሰ።

19 ሄሳ ገሻሰ ፋርሳዌቲ ባ ጊዶን ኢሶይ ኢሳ፡ «ሂሰቲን ኑኒ አይ ኦላና ዳንዳይዞኒ? ቤኢቲ! ኩሜላ ዴሬይ ኣቶንታ ኢዛ ካሌሰ» ገዳ።

ዬሱሲ ባ ሃይቃናይሳ ካሴቲ ዮቲዴሰ

20 ጎይናናሰ ባኣሌዛሰ ሸቂዳ አሳ ጊዶን ገሪኬ ዴሬ አሳቲካ ዴቴሰ።

21 ኢሰቲካ ጋሊላ ጊዶን ዲዛ ቤቴሳይዳ ጌቴቲዛ ዴሬ አሰ ፒሊጶሳ ጌቴቲዛዴኮ ቢዲ፡ «ጎዶ! ኑ ዬሱሳ ቤያና ኮዮሰ» ገዳ።

22 ፒሊጶሲካ ኢንዲራሳሰ ዮቲዴሰ። ኢንዲራሲኔ ፒሊጶሲ ቢዲ ዬሱሳሰ ዮቲዳ።

23 ዬሱሲካ ኢሰታሰ፡ «ሄኮ አሳ ናይ ቦንቴቲዛ ሳቴይ ጋኪዴሰ።

24 ታ ኢንቴሰ ቱሙ ጋይሰ፤ ገሰቴ አይፌይ ቢታን ዋዳዳ ሃይቆንታ ጮኡ ጋ ኡቲኮ ባርካ አታዉሰ። ኢዛ ሃይቂዛ ጊዲኮ ሃራ ዳሮ አይፋፋሰ።

25 ባ ሸምፖ ዶሲዛዴይ ዳይሴሰ። ሃይሳ ቢታ ቦላ ባ ሸምፖ ኢጲዛዴይ ጊዲኮ ሜርና ዴኦ ዴሜሰ።

26 ታሰ ኦላና ኮይዛዴይ ታና ካሎ፤ ታሰ ኦሒዛዴይ ታ ዲዛሶን ዳና፤ ታሰ ኦሒዛዴይ ታ አዋይ ኢዛ ቦንቻና» ገዴሰ።

ቡሮፔ ባና ጋካናይሳ ገሻሰ ዬሱሰ ዮቲዳ ቃላ

27 ቃሴካ ዬሱሲ፡ «ሄኮ ታ ሸምፖያ ሜቶታዲሰ፤ ተታ አዋዉ! ሃ ሳቴይፔ ታና አሻ ጎሻ?» ታ ሂዘጎንታ ማላ ታ ዩዳይ ሃሮ ሃ ሜቶ ሳቴይሳ።

28 «ታ አዋዉ! ኔ ሱንላ ቦንቻ» ገዴሰ። ሄሳፌ ካሊዲ፡ «ታኒ ታ ሱንላ ቦንቻዲሰ፤ ቃሴካ ጉጃ ቦንቻና» ገዛ ቃላይ ሳሎፔ ዩዴሰ።

29 ሄን ኤቂዳ አሳይ ሄሳ ሲዱዲ፡ «ዳዳይ ዳዳቴሰ» ገዳ። ባጋይቲ ቃሴ፡ «ኪታንቻኮ ሃሳይዛይ» ገዳ።

30 ዬሱሲ፡ «ሃይሲ ገሪሳይ ዩዳይ ኢንቴ ገሻሳ አቲን ታ ገሻሰ ገዴና።

31 ሃይሲ አላሜይ ፒርዴታና ዋዴይ ሃይሳ፤ ሃይሳ ዴሬዛ ሃሪዛ ጸላኤይ ሃኢ ጌዴ ካሬ ዬጌታና።

32 ታኒ ጶቂ ጋዳ ካቂቲዛ ዋዴ አሳ ዉርሳ ታኮ ዛራና» ገዴሰ።

33 ዩሱሲ ሄሳ የተዳይ ኢዚ አይ ማላ ሃይቆ ሃይቃናኮ ኤሪሳናሳ።

34 አሳይ ቃሴ፥ «ኑ ዋጋን ጸፊተዳይ፥ ሳሲ ከተዳዳይ ሚርናሰ ዳና ጌሰ፤ ሂሰቲን ኔ ቃሴ ዋናዳ፥ ሳሳ ናይ ቶቁ ጊ ካቄታና ቤሴሰ» ጋይ? ኔ ጊዛ አሳ ናይ አዋይሴ?» ጊ ኦይቹዳ።

35 ዩሱሲ ኢሰታሰ፥ «ሃኢ ጉላ ዋዴሰ ኢንቴናራ ፖኦይ ዴሰ፤ ጋዴይ ቋሞንታ ፖኦራ ሄሜቲቴ፤ ቃማራ ሄሜቲዛዴይ ኢዚ አዋ ቢዛኮ ኤሬና።

36 ኢንቴ ፖኦ ናይታ ጊዳና ማላ ፖኦይ ዲሺን ፖኦን አማኒቴ» ጊዴሰ። ዩሱሲ ሄሳ ጊዳፔ ጉዬ ቢዲ ኢሰታ አይፊፔ ጌሚዴሰ።

አይሁዳቲ አማኖ ፓጩ

37 ዩሱሲ ኢሰታሰ ሄሳ ማላ ማላታ ኢሰታ ሲንላን ኦሊንካ አይሁዳቲ ኢዛን አማኒቤቴና።

38 ሄሲ ሃኒዳይ ናቤ ኢሳያሲ፥

«ሳዶ! ኑ ማርካቴላ

አማኒዳይ ኦኔ?

ጸሳ ቃላይ

ኦናሰ ቆንጨዴ?» ጊዳ ማላ።

39 ሄሳ ጊሻሰ አማናናሰ

ዳንዳይቤቴና፤

ጋሶይካ ናቤ ኢሳያሲ ካሴ፥

40 «ኢሰቲ ባ አይፊን ቤኢዲ፥

ባ ዋዚናን ዩሺ ቆፒዲ፥

ሲሞንታ ማላኔ

ኢዚ ኢሰታ ፓሉንታ ማላ

ጸሲ ኢሰታ አይፊ ቆቂሲዴሰ፤

ኢሰታ ዋዚናካ ሙሚሲዴሰ»

ጊ ጸፊዳ ጊሻሳ።

41 ኢሳያሲ ሄሳ ጊዳይ ጸሲ ከተዳዴ ቦንቾ ቤኢዳ ጊሻሳ፤ ሄሳ ጊሻሰ ዩሱሲ የተዴሰ።

42 ጊዲኮካ አይሁዳታ ሃላቃታፔ ዳር አሳይ ዩሱሳ አማኒዴሰ። ጊዶ ኦቲን ኢሰታ አይሁዳታ ዋሳ ኬላፊ ሳዶንታ ማላ ፋርሳዊታሰ ባቢዲ ባ አማኖ ቆንጨን ማርካቲቤቴና።

43 ኢሰቲ ሄሳላ ሃኒዳይ ኢሰታሰ ጸሳፊ ኢሜቲዛ ቦንቾፊ ኦሊዲ አሳፔ ኢሜቲዛ ቦንቾ ዶሲዳ ጊሻሳ።

- 44 ዩሱሲ ባ ቃላ ጾቄ ሂስቲዲ፥ «ታና አማኒዛዴይ ታናን ጸላላ ጊደንታ ታና ከቲዳይሳንካ አማኔስ።
- 45 ታና ቤኢዳዴይ ታና ከቲዳይሳንካ ቤያና።
- 46 ታና አማኒዛይ ወሪ ጳማን ዶንታ ማላ ታኒ ፖኦ ጊዳዳ ሃይሳ ሃ አላሜዛ ያዲስ።
- 47 ታ ቃላ ሲዩዲ ኦሶንታዴ ቦላ ፒርዳናይ ታና ጊዲኬ። ጋሶይካ ታ ዩዳይ አላሜ አሻናስ አቲን አላሜ ቦላ ፒርዳናስ ጊዴና።
- 48 ታና ኮዮንታዴኔ ታ ቃላ ኤኮንታዴ ቦላ ፒርዳናዴይ ዴስ፤ ታ ኢዛስ ዮቲዳ ቃላይ ወርሴላ ጋላስ ኢዛ ቦላ ፒርዳና።
- 49 ጋሶይካ ታኒ ጮ ታ ሼኔን ዮታቤኬ፤ ታ ጊዛይሳኔ ታ ዮቲዛ አዛዞ ታስ አሚዳይ ታና ከቲዳ ታ አዋ።
- 50 ኢዛ አዛዛይ ሜርና ዴኦ ጊዲዳይሳ ታ ኤራይስ፤ ሄሳ ጊሻስ ታ ዮቲዛይ ወሪ አዋይ ታስ ዮቲዳይሳ» ጊዴስ።

13

ዩሱሲ ባና ካሊዛይታ ቶሆ ሜጪዴስ

- 1 ሄ ዋይይካ አይሁዳታ ፓዚጋ ባኣሌፔ ካሴ ዩሱሲ ሃይሳ አላሜዛ ዩዲዲ ባ አዋኮ ባና ሳቲይ ጋኪዳይሳ ኤሪዴስ፤ ሃይሳ አላሜዛን ዲዛ ባ ባጋታ ኡባ ሲቁዴስ። ወርሴላ ጋካናስካ ዶሲዴስ።
- 2 ዩሱሲኔ ኢዛ ካሊዛይቲ ኢሲፌ ካዎ ሚሺን ሲሞና ናይ አስቆርንቶ ዩሁዳይ ዩሱሳ ኣሊ ኢማና ማላ ጸላኤይ ኢዛ ዋዚናን ኢታ ቆፋ ጌልሊዴስ።
- 3 ዩሱሲ አዋይ ኢዛስ ኅዳቲላ ወርሲ ኢሚዳይሳኔ ኢዚ ጸሳ አቻፌ ኬዚዲ ዩዳይሳ፥ ቃሴ ሲሚዲ ጸሳኮ ባናይሳ ኤሪስ።
- 4 ሄሳ ጊሻስ ማዳ ቦላፌ ዴንዲዴኔ ማይኦ ቃሪ ዋሊዲ ፖጸ ኤኪዲ ጸሳን * ጊዲዴስ።
- 5 ቶሆ ሜጪዛ ጎንጌን ሃሌ ጉጂዲ ባና ካሊዛይታ ቶሆ ሜቹ አይኪዴስ፤ ባ ጊዲዳ ፖጸንካ ሜጪዳ ቶሆዛ ቁጪዴስ።
- 6 ዩሱሲ ሲሞና ጌቲቲዛ ጴጽሮሳኮ ሺቂን ሲሞና ጌቲቲዛ ጴጽሮሲ ኢዛ፥ «ጎዶ! ኔ ታ ቶሆ ሜጫኔ?» ጊዴስ።
- 7 ዩሱሲካ፥ «ታኒ ኦሊዛይሳ ኔ ሃኢ ኤራካ፤ ጉዬፔ ቃሴ ኔ ኤራንዳሳ» ጊዴስ።

* 13:4 ጴሳ፡ ጴሳ ጊዛይሳ ኢሲ ኢሲ ባጋ ጋሞላ ቃላን ዳባ ጌቲቲስ።

8 ጴጽሮሲካ፡ «ኔ ታ ቶሆ ሙሌካ ማጫካ» ጊደሰ። ዩሱሲ ቃሴ፡ «ታ ኔ ቶሆ ማጮንታ ኣጊኮ ኔሲኔ ታሰ ኢሲፌቴሉ ዳና» ጊደሰ።

9 ሲሞና ጌቴቲዛ ጴጽሮሲካ ዛሪዲ፡ «ጎዶ፡ ሄሳ ጊዲኮ ታሰ ቶሆ ጸላላ ጊደንታ ኩሼራ ሁኤራ ወርሳ ማጫ» ጊደሰ።

10 ዩሱሲ ቃሴ፡ «ባ ኣሳቴሉ ማጮቲዳደሰ ኩሜላ ቦላይ ጌሽ ጊዲዳ ጊሻሰ ኢዛሰ ቶሆ ማቻፌ ኣቲን ሃራ ኮሼና። ኢንቴ ጌሽ ሺን ኡባታ ዳኬታ» ጊደሰ።

11 ዩሱሲ፡ «ኢንቴ ኡባቲካ ጌሽ ዳኬታ» ጊዳይ ኢዛ ኣሉ ኢማናዴይ ኦናኮ ኤሪዛ ጊሻሳ።

12 ኢሰታ ቶሆ ማጪዳፔ ጉዬ ባ ማይኦ ኤኪ ማይኢዲ ካሴ ባ ኡቲዳሶሆን ሲሚ ኡቲዳሰ። ቃሴ ኢሰታሰ፡ «ታ ኢንቴሰ ኣይ ኦሉዳኮ ዋዚናን ዋሉዳቲ?»

13 ኢንቴ ታና ኣሰታማሬኔ ጎዳ ጌታ፤ ታ ቃሴ ኣሰታማሬኔ ጎዳ ጊዲዳ ጊሻሰ ኢንቴ ጉሳይ ቱሙኮ።

14 ሂሰቲኮ ታ ኢንቴሰ ጎዳኔ ኣሰታማሬ ጊዳሼ ኢንቴ ቶሆ ማጪዛ ጊዲኮ ኢንቴካ ኢንቴ ጊደን ኢሶይ ኢሳ ቶሆ ማጫና ቤሴሰ።

15 ታ ኢንቴሰ ኦሉዳይሳ ማላ ኢንቴካ ኦላና ማላ ታ ኢንቴሰ ለሚሶ ቤሳዲሰ።

16 ታ ኢንቴሰ ቱሙ ጋይሰ፤ ኣሸካራይ ጎዳፔ ኣጼና፤ ከቲቲዳዴይ ከቲዳዴፌ ኣጼና።

17 ኢንቴ ሃይሳ ኤሪዲ ኦሶን ፔይሺኮ ኢንቴ ኣንጃቲዳይታ።

18 «ታ ሃይሳ ጊዛይ ኢንቴ ኡባታ ጊሻሰ ዳና፤ ታኒ ታ ዶሪዳይታ ወርሳ ኤራይሰ፤ ጊዶ ኣቲን፡ ታ ካሐ ሚዳዴይ ታ ሞርኬ ጊዲዲ ታ ቦላ ዳንዲዳሰ» ጊዛ ማጸፋ ቃላይ ፖሌታናሰ ኮሼሰ።

19 ታ ሃይሳ ሃኢራ ኢንቴሰ ዮቲዛይ ኢዚ ፖሌቲዛ ዋዴ ታ ኦናኮ ኢንቴ ኣማናናሳ።

20 ታ ኢንቴሰ ቱሙ ጋይሰ፤ ታ ከቲዳዴ ኤኪዛዴይ ታና ኤኬሰ፤ ታና ኤኪዛዴይ ታና ከቲዳዴ ኤኬሰ» ጊደሰ።

ዩሱሲ ባና ኣሉ ኢማናዴይ ኦናኮ ካሴቲ ዮቲዳሰ
(ማቶ 26:20-25፤ ማር 14:17-21፤ ሉቃ 22:21-23)

21 ዩሱሲ ሄሳ ገ ሲሚዲ ከሄ ቆፋን ገሊዲ፡ «ታ አንቴስ ቱሙ፡ ጋይስ፤ አንቴ ገደፌ አሳዳይ ታና አሊ አማና» ገዲ ቆንጩን የተደሰ፡፡

22 አዛ ካሊዛይቲ ሄሳ አዚ ኦና ገሻስ ገዳኮ ኤርንታ ገሻስ ባ ገደን አሶይ አሳራ ጸሊቲዳ፡፡

23 አዛ ካሊዛይታ ገደፌ ዩሱሲ ሲቂዛ አሶይ ዩሱሳ አቻን ኡቲደስ፡፡

24 ሲሞና ጌቴቲዛ ጳጽሮሲ የሃኒሳ ሶሞኢ ቤሲዲ፡ «አዚ ኦና ገሻስ ገዛኮ አኔ አዛ ኦይቻ» ገደስ፡፡

25 ሄሳ ገሻስ አዚ ባ ቆጼ ጌዴ ዩሱሳ ሃይፋኮ ሺሺዲ፡ «ጎዶ! አዚ ኦኔ?» ገ ኦይቺደስ፡፡

26 ዩሱሲካ ዛሪዲ፡ «አዛዳይ ታ ሃኢ ቡዴና ወጾን ጳሞኢዳ ባርሲዛዴ» ገደስ፤ ሄሳ ገ ሲሚዲ ቡዴና ወጾን ጳሞኢ ኤኪዲ አስቆርንቶፌ ዩዳ ሲሞና ና ዩሁዳ ባርሲደስ፡፡

27 ዩሁዳይ አዛ ባጳዳ ማላ ሄራካ ጸላኤይ አዛን ገሊደስ፡፡ ዩሱሲካ ዩሁዳ፡ «ኔ ኦፋናስ ቆፒዳይሳ ኤሌላ ኦፋ» ገደስ፡፡

28 ዩሱሲ ሄሳ አዛስ ገዳኮ ማዳን ኡቲዳ አሳፔ የኦይ ገሊዳዳይ ኦኒካ ዴና፡፡

29 ዩሁዳይ ሚሽ ኦይኪዛዴ ገዲዳ ገሻስ ዩሱሳ ካሊዛይታፔ ባጋይቲ ዩሱሲ ዩሁዳ፡ «ባኦሌዛስ ኮሺዛይሳ ሻማ ወይኮ ማንቆታስ ሙጽዋታ አማ» ገዳ ሚሳቲደስ፡፡

30 ዩሁዳይካ ቡዴና ባጳዳ ማላ ሄራካ ከዚዲ ቢደስ፤ አዚ ቢሺን ጋዴይ ቃማኮ፡፡

ኦራፋ አዛዞ

31 ዩሁዳይ ከዚ ቢዳፔ ጉዬ ዩሱሲ፡ «አሳ ናይ ሃኢ ቦንቹቲደስ፤ አዛ ጋሶን ጸሲካ ቦንቹቲደስ፡፡

32 ጸሲ አዛ ጋሶን ቦንቹቲዛ ገዲኮ ጸሲካ አዛ ቦንቻና፤ ሄራካ ጋሞኦንታ ቦንቻና፡፡

33 ታ ናይቶ! ታ አንቴናራ ዳሮ ወዴ ጋሞኢኬ፤ አንቴ ታና ኮያና፤ ታ ካሴ አይሁዳታ ሃላቃታሰካ፡ ታ ቢዛሶ አንቴ ያና ዳንዳዬኬታ፡ ጋዳ የቲዳ ማላ ሃኢካ አንቴሰካ ሄሳፉ የታይስ፡፡

34 አንቴ አንቴ ገደን አሶይ አሳራ ሲቂታና ማላ ታ አንቴስ ኦራፋ አዛዞ አማይስ፡፡ ታ አንቴና ሲቂታና ማላ አንቴ አንቴ ገደን አሶይ አሳራ ሲቂቲቲ፡፡

35 አንቴ አንቴ ገደን ሲቂቲኮ አንቴ ታና ካሊዛይታ ገዲዳይሳ አሲ ዉሪ ኤራና» ገደስ፡፡

ጴጥሮሲ ኢዛ ካዳናይሳ ዬሱሲ ካሴቲዲ ዮቲዴስ
(ማቶ 26:31-35፤ ማር 14:27-31፤ ሉቃ 22:31-34)

³⁶ ሄሳፌ ጉዬ ሲሞና ጌቲቲዛ ጴጥሮሲ ዬሱሳ፡ «ጎዶ! ኔ አዋ ባኔ?» ጊ ኦይቺዴስ፡ ዬሱሲ ቃሴ፡ «ታ ቢዛሶ ኔ ሃኢ ታና ካላና ዳንዳያካ ሺን ጉዬ፤ ኔ ታና ካላና» ጊዴስ፡

³⁷ ጴጥሮሲ፡ «ጎዶ! ታ ኔና ሃኢ ካላናስ ኣይስ ዳንዳይኪና? ሃራይ ኣቶሺን ታኒ ታ ሸምፖካ ኔ ጊሻስ ኣላ ኢማና» ጊዴስ፡

³⁸ ዬሱሲካ ዛሪዲ፡ «ኔኒ ኔ ሸምፖ ታ ጊሻስ ኣላ ኢማኔ? ታ ኔስ ቱሙ ጋይስ፤ ሃቶ ኩቶይ ዋሳና፤ ካሴታዳ ኔ ታና ሄዙቶ ካዳና» ጊዴስ፡

14

ዬሱሲ አዋኮ ጋሊዛ ኦጌ

¹ ካሌሊዲካ ዬሱሲ፡ «ኢንቴ ዋዚናይ ሜቶቶፖ፤ ጸስ ኣማኒቴ፤ ታናካ ኣማኒቴ፡፡

² ታ አዋ ኣቻን ዳሮ ዲሳሶይ ዴስ፤ ሄሳ ጊዶንታኮ፡ «ኢንቴስ ዳናሶ ጊጊሳናስ ታ ባና» ጋና ሺን፡፡

³ ባዳ ታ ኢንቴስ ሶ ጊግሲዳ፤ ጉዬ ኢንቴ ታ ዲዛሶን ዳና ማላ ታ ሲማ ያዳ ኢንቴና ኤካና፡፡

⁴ ታ ቢዛ ኦጌ ኢንቴ ኤሬታ» ጊዴስ፡፡

⁵ ቶማሲ፡ «ጎዶ! ኔ አዋ ቢዛኮ ኦ ኤሮኮን፤ ሂስቲን ኦጌዛ ኦ ዋስቲ ኤራናስ ዳንዳይዘኒ?» ጊዴስ፡፡

⁶ ዬሱሲካ ኢዛስ፡ «ኦጌይኔ፡ ቱማይ፡ ዴይደካ ታና፤ ታ ባጋራ ጊዲኮፌ ኣቲን ኦኒካ አዋኮ ባና ኣሲ ዴና፡፡

⁷ ኢንቴ ታና ኤሪዛኮ ታ አዋካ ኤራናኮሺን፤ ሃኢ ሃይሳፌ ጉዬ ኢንቴ ኢዛ ኤራና፤ ኢዛ ቤኦካ ቤዪዴታ» ጊ ዛሪዴስ፡፡

⁸ ፒሊጶሲ፡ «ጎዶ! ኔ ኦና አዋ ቤሲኮ ኦስ ጊዳና» ጊዴስ፡፡

⁹ ዬሱሲካ ኢዛስ፡ «ፒሊጶሳ! ሃይሳ ጋካናስ ታ ኢንቴናራ ዴኢንካ ኔ ታና ኤርኪ? ታና ቤኢዳዴይ አዋካ ቤዪዴስ፤ ሂስቲን ኔኒ ዋናዳ፡ «ኦና አዋ ቤሳ» ጋይ?

¹⁰ ታኒ ታ አዋን፡ ታ አዋይካ ታናን ዲዛይሳ ኣማኒኪ? ታ ኢንቴስ ዮቲዛ ቃላ ዮቲዛይ ታ ሺኔ ማላ ዴና፤ ጊዶ ኣቲን ኦሶዛ ኡባ ኦሊዛይ ታናን ዲዛ ታ አዋ፡፡

¹¹ ታኒ አዋን ዲዛ ማላ፡ አዋይካ ታናን ዲዛይሳ ኢንቴ ኣማኒቴ፤ ኣካይ ጊኮ ታ ኦሊዛ ኦሶታ ጊሻሲካ ታና ኣማኒቴ፡፡

¹² ታ ኢንቴስ ቱሙ ጋይስ፤ ታና ኣማኒዛዴይ ታ ኦሊዛ ኦሶ ኦላና፤ ሄሳፌካ ኣሊ ኦላና፤ ጋሶይካ ታኒ አዋኮ ባና፡፡

13 አዋይ ናዛ ጋሶን ቦንቼታና ማላ ኢንቴ ታ ሱንላን ዋሲዳይሳ ታ ኢንቴሰ ወርሳ ኦላና።

14 ኢንቴ ኣይ ሚሺካ ታ ሱንላን ዋሲዳይሳ ታ ኡባ ኦላና።

ዬሱሲ ጸሎ ኣያና ጊሻሰ ኢሚዳ ሂዶታ

15 «ኢንቴ ታና ዶሲዛ ጊዲኮ ታ ኣዛዘዮ ናጊቴ።

16 ታኒ አዋ ዋሳና፤ ኢዚካ ኢንቴናራ ሚርናሰ ዳና ማላ ሃራ ኢንቴና ሚንፊላናዴ ኢንቴሰ ኢማና።

17 ሃይሲ ሚንፊላዛ ኣያናይ ዴሪ ኣሳይ ኢዛ ቤዪ ኤርንታ ጊሻሰ ኣላሚይ ኤካናሰ ዳንዳዮንታ ቱሙ ኣያና፤ ጊዶ ኣቲን ኢንቴ ኢዛ ኤሪታ፤ ጋሶይካ ኢዚ ኢንቴናራ ዲዛ ጊሻሲኔ ኢዚ ኢንቴ ጋላን ዲዛ ጊሻሳ።

18 «አዋይኔ ኣያ ባይንዳ ናይታ ማላ ታ ኢንቴና ጸላ ኣጊኬ፤ ታ ሲማዳ ሃ ኢንቴኮ ያና።

19 ጉላ ዋዴፔ ጉዬ ዴሪ ኣሳይ ታና ቤዬና፤ ኢንቴ ጊዲኮ ቤያንዴታ፤ ታኒ ዴኦን ዲዛ ጊሻሰ ኢንቴካ ዴኦን ዳንዴታ።

20 ታኒ ታ አዋን ዲዛ ማላ ኢንቴካ ታናን ዲዛይሳኔ ታኒካ ኢንቴናን ዲዛይሳ ኢንቴ ሄ ዋዴ ኤራንዴታ።

21 «ታ ኣዛዞ ኤሲዲ ኦሲዛዴይ ታና ዶሴሰ፤ ታና ዶሲዛዴካ ታ አዋይ ዶሴሰ፤ ታኒካ ኢዛ ዶሳና፤ ታናካ ኢዛዴሰ ቆንጨሳና» ጊዴሰ።

22 ኣሰቆርንቶ ዩሁዳ ጊዶንታ ሃንኮ ዩሁዳይ፡ «ጎዶ! ኔኒ ኣላሚ ኣሳሰ ጊዶንታ ኑሰ ዋሰታ ኔና ቆንጨሳኔ?» ጊዴሰ።

23 ዬሱሲካ ኢዛሰ፡ «ታና ሲቐዛዴይ ታ ቃላ ናገና፤ ታ አዋይካ ኢዛ ዶሳና፤ ኑኒ ኢዛኮ ያና፤ ዩዲካ ኢዛዴራ ኢሲፌ ዳና።

24 ታና ዶሶንታዴይ ታ ቃላ ናገና፤ ሃይሲ ኢንቴ ሲዩዛ ቃላይ ታና ከቲዳ ታ አዋ ቃላፔ ኣቲን ታ ቃላ ጊዴና።

25 «ታኒ ሃኢ ኢንቴናራ ዳሼ ሃይሳ ኢንቴሰ ዮታዲሰ።

26 አዋይ ታ ሱንላን ዬዳና ሚንፊላዛ ጸሎ ኣያናይ ቃሴ ሃኒዛ ኡባ ኢንቴና ታማርሳና፤ ታ ኢንቴሰ ዮቶይሳካ ኡባ ኢንቴ ዋዚናን ዋላና ማላ ማዳና።

27 «ታ ኢንቴሰ ሳሮቴላ ኣጋዳ ባይሰ፤ ታ ሳሮቴላካ ታ ኢንቴሰ ኢማና፤ ታ ኢንቴሰ ኢሚዛ ሳሮቴላ ኣላሚይ ኢሚዛ ሳሮቴላ ማላ ዴና፤ ኢንቴ ዋዚናይ ሂርጎፎኔ ባቦፎ።

28 « ታ ባና፤ ባዳካ ኢንቴኮ ሲማ ያና፤ ጋዳ ታ ኢንቴሰ ካሴ ዮቲዳይሳ ሲዩዴታ፤ ኢንቴ ታና ዶሲዛኮ ታኒ ታ አዋኮ ቢዛይሲ ኢንቴና ኡፋይሳናኮሺን። ጋሶይካ አዋይ ታፔ ኣዴሰ።

29 ሃይሲ ሃኒዛ ዋዴ ኢንቴ ኣማናና ማላ ሃይሳ ታ ኢንቴሰ ካሴታ ዮታዲሰ።

30 ሃይሳ አላሜዛ ሃሪዛ ጸላኤይ ዪዛ ዋዴይ ጋኪዳ ጊሻሰ ሃኢ ታ ኢንቴናራ ዳሮ ሃሳይኬ፤ ኢዚ ታ ቦላ አይኮካ ኦላናሰ ኢዛሰ ዋልቃይ ዴና።

31 ጊዶ አቲን ታኒ አዋ ዶሲዛይሳ አላሜይ ኤራና ማላ አዋይ ታና አዛዚዳይሳ ታ ኡባ ፖላና። እኔ ሃይሳፌ ቦሰ፤ ዴንዲቴ» ጊዴሰ።

15

ዬሱሲ ቱሙ ዋይኔ ሚላሰ አኖ

1 ቃሴካ ዬሱሲ፡ «ቱሙ ዋይኔ ሚላ አኖይ ታና፤ አታኪልቴዛ ኦሳንቻይ ታ አዋ።

2 ታ ቦላ ዲሼ አይፌ ኢሞንታ ሃጋ ኡባ ታ አዋይ ቃንጺ ዲጋና፤ አይፊዛ ሃጋ ጉጂ አይፋና ማላ ቂርጺ ጌሻና።

3 ታ ኢንቴሰ የቲዳ ቃላ ጋሶን ኢንቴ ሃኢ ጌሻታ።

4 ታናን ዲቴ፤ ታኒካ ኢንቴናን ዳና፤ ሃጋይ ዋይኔ አኖ ቦላ ዶንታ አጊኮ ባርካ አይፌ አይፋና ዴንዳዮንታይሳ ማላ ኢንቴካ ታናን ዶንታ አጊኮ አይፌ አይፋናሰ ዴንዳዬኬታ።

5 «ታኒ ዋይኔ ሚላሰ አኖ፤ ኢንቴ ቃሴ ሃጋታ፤ ዳሮ አይፌ አይፊዛዴይ ታናን ዲዛዴኔ ታኒካ ኢዛን ዲዛዴ፤ ጋሶይካ ታ ባይንዳ ኢንቴ አይኮካ ኦላናሰ ዴንዳዬኬታ።

6 ታናን ባይንዳዴይ ቃንጾቲዲ ዋራ ዬጌቲዳ ሃጋ ማላ ካሬ ዬጌቲዲ ሄን ሜላና፤ ሄይታ ማላ ሃጋቲ ኢሲ ቦላ ሺቂዲ ታማን ዬጌታናኔ ኤጸና።

7 ኢንቴ ታናን ዲኮ ታ ቃላይካ ኢንቴናን ዲኮ ኢንቴ ኮዪዳይሳ ኦይቺኮ ዴማና።

8 ዳሮ አይፌ ኢንቴ አይፊሺን ታ አዋይ ቦንቼቴሰ፤ ኢንቴ ታና ካሊዛይታ ጊዲዳይሲ ሄሳን ኤሬታና።

9 «አዋይ ታና ዶሲዳይሳ ታኒካ ኢንቴና ዶሳዲሰ፤ ሄሳ ጊሻሰ ኢንቴ ታ ሲቆን ዲቴ።

10 ታኒ ታ አዋ አዛዘ ፖላዳ ኢዛ ሲቆን ዲዳ ማላ ኢንቴካ ታ አዛዘ ፖሊኮ ታ ሲቆን ዳና።

11 ሃይሳ ታ ኢንቴሰ የቲዛይ ታ ኡፋይሲ ኢንቴናን ጊዳና ማላኔ ኢንቴ ኡፋይሲካ ኩሚል ጊዳናሳ።

12 ታ ኢንቴሰ አሚዛ አዛዘይ ታ ኢንቴና ሲቂዳ ማላ ኢንቴካ ኢንቴ ጊዶን ኢሶይ ኢሳራ ሲቂታናሳ።

13 አሲ ባ ላጌሰ ባ ሼምፖ አሊ አሞፔ አፂዛ ሲቆይ ዴና።

14 ታ ኢንቴና ኣዛዚዛይሳ ኡባ ኢንቴ ፖሊኮ ኢንቴ ታ ላጌታ።

15 ኣሸካራይ ጎዳይ ኦሊዛይሳ ኤሮንታ ጊሻስ ሃይሳፌ ጉዬ ታ ኢንቴና ኣሸካራታ ጊኬ። ጊዶ ኣቲን ታኒ ታ ኣዋፔ ሲዱዳይሳ ወርሳ ኢንቴስ ቆንጨሲዳ ጊሻስ ታ ኢንቴና ታ ላጌታ ጋዲስ።

16 ታ ኢንቴና ዶራዲስ ኣቲን ኢንቴ ታና ዶሪቤኬታ፤ ኢንቴ ቢዲ ዳሮ ኣይፌ ኣይፋና ማላ ኢንቴ ኣይፌይ ኤቂ ዳና ማላ ታ ኢንቴና ዋላዲስ፤ ሄሳ ጊሻስ ኢንቴ ታ ሱንፋን ዋሲዳይሳ ኡባ ታ ኣዋይ ኢንቴስ ኢማና።

17 ሄሳ ጊሻስ ኢንቴ ኢንቴ ጊዶን ኢሶይ ኢሳራ ሲቄታና ማላ ታ ኢንቴና ኣዛዛይሰ።

ዬሱሲ ባና ካሊዛይታ ኣላሜይ ኢጻናይሳ ዮቲዴስ

18 «ካሊሊዲካ ዬሱሲ ኢንቴና ኣላሜይ ኢጸኮ ኢንቴፌ ካሴ ታና ኢጸዳይሳ ኤሪቴ።

19 ኢንቴ ኣማኖንታ ኣላሜ ኣሳ ጊዲኮ ኣላሜ ኣሳይ ባ ባጋ ጊዲዳዴ ዶሴስ። ጊዶ ኣቲን ኢንቴ ኣላሜ ባጋ ጊዶንታ ጊሻስ ታ ኢንቴና ኣላሜፔ ሻካዳ ዶሪዳ ጊሻስ ዴሬይ ኢንቴና ኢጾስ።

20 «ኣሸካራይ ጎዳፔ ኣጼና፣ ጋዳ ታ ካሴ ኢንቴስ ዮቶይሳ ዩሺ ቆፐቴ፤ ኢሰቲ ታና ጎዲዛይቲ ኢንቴናካ ጎዳና፤ ኢሰቲ ታ ቃላ ናጊዛኮ ኢንቴ ቃላ ናጋና።

21 ኢሰቲ ታና ኪቲዳዴ ኤሮንታ ጊሻስ ታ ጋሶን ኢንቴ ቦላ ሄሳ ወርሲ ኦፋና።

22 ታ ያዳ ኢሰታስ ዮቶንታኮ ኢሰታስ ናጋራ ጊዴና። ሃኢ ቃሴ ኢሰታ ናጋራስ ሃኖ ጊዛ ጋሶይካ ባ።

23 ታና ኢጸዛዴይ ታ ኣዋካ ኢጾስ።

24 ሃራ ኣሲ ኦፋንታ ኦሶ ታ ኢሰታ ጊዶን ኦፋንታኮ ኢሰታስ ናጋራ ጊዴናሺን፤ ሃኢ ኢሰቲ ሄሳ ኡባ ቤኢዳፔ ጉዬ ታናካ ታ ኣዋካ ኢጸዳ።

25 ሄሲካ ሃኒዳይ ካሴ፥ «ታና ጋሶይካ ባይንዳ ዲሺን ኢጸዳ» ጌቴቲዲ ኢሰታ ዋጋን ጸፊቲዳ ቃላይ ፖሊታና።

26 «ጊዶ ኣቲን ኣዋፔ ኬዚዲ ያናይሲ፥ ታኒካ ታ ኣዋ ኣቻፌ ኢንቴስ ዬዳናይሲ ሚንፌሊዛ ቱማ ኣያናይ ዪዲ ኢዚ ታ ጊሻስ ማርካታና።

27 ኢንቴ ኮይሮፔካ ታናራ ዲዛ ጊሻስ ታስ ኢንቴካ ማርካታንዴታ» ጊዴስ።

16

1 ቃሴካ ዬሱሲ፡ «ሄኮ ሃይሳ ወርሳ ታ ኢንቴስ ኢንቴ ኣማኖይ ያርክ ያርኮፎ ጋዳ ዮታዲስ።

2 ኢስቲ ኢንቴና ባ ከላፌ ጎዳና፤ ሃራይ ኣቶሺን ኢንቴና ዎጲዛይይ ወሪ ጸሳስ ኦሊዛይ ሚሳቲዛ ዎዴይ ያና።

3 ኢስቲ ሄሳሶ ኦሊዛይ ታናካ፡ ታ ኣዋካ ኤርንታ ጊሻሳ።

4 ታ ሃይሳ ኢንቴስ ዮቲዛ ዎዴ ኢንቴ ታ ኢንቴስ ጊዳይሳ ቆፓናሳ» ጊዴስ። ካሌሊዲካ ዬሱሳ፡ «ሃይሳ ወርሳ ታ ኢንቴስ ዮቶንታ ኣጊዳይ ታ ኢንቴናራ ኢሲፌ ዲዛ ጊሻሳ።

ጸሎ ኣያና ኦሶ

5 «ሃኢ ቃሴ ታና ከቲዳይሳኮ ታ ባና ጋይስ፤ ጊዶ ኣቲን ኢንቴፌ ኦኒካ፡ «ኔ ኣዋ ባኔ?» ጊዲ ኦይቻናይ ባ።

6 ጊዶ ኣቲን ሃይሳ ወርሳ ታ ኢንቴስ ዮቲዳ ጊሻስ ኢንቴ ዎዚናይ ሙዝቴስ።

7 ታ ቃሴ ኢንቴስ ቱሙ ጋይስ፤ ታ ቡሲ ኢንቴስ ጎኣ ጊዳና፤ ጋሶይካ ታ ቦንታ ኣጊኮ ሚንሌሊዛ ኣያናይ ኢንቴኮ ዬና፤ ታ ቢዳፔ ጉዬ ኢዛ ኢንቴኮ ዬዳና።

8 ኢዚ ዬዲ ኣሳ ናጋራ ጊሻሲኔ ጸሎቴላ ጊሻስ ቃሴካ ፒርዳ ጊሻስ ኤሪሳና።

9 ኣሳ ናጋራ ጊሻስ ኢዚ ኤሪሳናይ ኣሳይ ታና ኣማኖንታ ጊሻሳ።

10 ጸሎቴላ ጊሻስ ኢዚ ኣሳ ኤሪሳናይ ታኒ ታ ኣዋኮ ቢዛ ጊሻሲኔ ቃሴ ናምኣንሶ ኢንቴ ታና ቤኦንታ ጊሻሳ።

11 ፒርዳ ጊሻስ ኢዚ ኤሪሳናይ ሃይሳ ኣላሜዛ ሃሪዛይሳ ቦላ ፒርዳቲዳ ጊሻሳ።

12 «ታ ኢንቴስ ቡሮ ዮታና ዳሮ ዮኦይ ዴስ፤ ጊዶ ኣቲን ሃኢ ኢንቴና ዴጸና።

13 ቱማ ኣያናይ ዬዲ ኢንቴና ቱማይ ዲዛሶ ካሌላና፤ ጋሶይካ ኢዚ ሲዩዳይሳ ዮታና ኣቲን ባፔ ጊዶንታ ጊሻስ ኢዚ ሲንላፌ ሃናና ዮኦታ ኢንቴስ ዮታና።

14 ታስ ዲዛይሳፌ ኤኪዲ ኢዚ ኢንቴስ ዮቲዛ ጊሻስ ታና ቦንቻና።

15 ኣዋስ ጊዲዳይ ወሪካ ታይሳ፡ «ታስ ጊዲዳይሳፌ ኤኪዲ ኢዚ ኢንቴስ ዮታና» ታ ጊዳይ ሄሳሳ» ጊዴስ።

ኢንቴ ሙዝቴሊ ኡፋይሳን ላሜታና

16 ዬሱሲ ጉጂዲ፡ «ጉላ ዎዴፔ ጉዬ ኢንቴ ታና ቤዬኬታ፤ ቃሴካ ጉላ ዎዴፔ ጉዬ ኢንቴ ታና ቤያና» ጊዴስ።

17 ኢዛ ካሊዛይታፔ ባጋቲ ባ ጊደን፥ « ሃይሲ ኑስ ጉላ ዋዴፔ ጉዬ ኢንቲ ታና ቤዬኬታ፤ ቃሴካ ጉላ ዋዴፔ ጉዬ ኢንቲ ታና ቤያና፤ ቃሴ ታ አዋኮ ባና ጉሲ ኣይ ጉሴ?» ጊዳ።

18 «ሂሰቲን ሃይሲ፥ ርጉላ ዋዴፔ ጉዬ ጊዛይሲ ኢዛ ኣዜ? ኢዛ ዮቲዛይሲ ኑስ ኤሬቴና» ጊዳ ባ ጊደን ዛሪ ዛሪ ኦይሼቲዳ።

19 ኢሰቲ ኢዛ ኦይቻናይሳ ዬሱሲ ኤሪዲ ኢሰታስ፥ «ኢንቲ ኢንቲ ጊደን ኢሶይ ኢሳራ ኦይሼቲዛይ ታ ኢንቲስ፥ ርጉላ ዋዴፔ ጉዬ ኢንቲ ታና ቤዬኬታ፤ ቃሴካ ጉላ ዋዴፔ ጉዬ ኢንቲ ታና ቤያና ጊዳ ጊሻሴ?

20 ታ ኢንቲስ ቱማ ጋይስ፤ ኢንቲ ዋሳና፤ ዬካናሺን ኣላሜይ ጊዲኮ ኡፋዬታና። ኢንቲ ሙዙቲሺን ኢንቲ ሙዙይ ኡፋይሳን ላሜታና።

21 ማጫሲ ዬሎ ዋዴይ ጋኪሺን ሚጸስ ሂርጋዉስ፤ ጊደ ኣቲን ና ዬላ ዬጊዳፔ ጉዬ ቢታ ቦላ ናይ ዬሌቲዳ ጊሻስ ኡፋይሳፌ ዴንዲዳይሳን ካሴ ባ ዋይዳይሳ ዛራ ቆፑኩ።

22 ሂሳላ ኢንቲካ ሃኢ ሙዙቲታ፤ ቃሴ ታ ኢንቲና ቤያና ኢንቲ ዋዚናይካ ኡፋዬታና፤ ኢንቲ ኡፋይሳ ዛሪ ኤካናዴይ ዴና።

23 «ኢንቲ ሄ ዋዴ ታፔ ኣይኮካ ዋሴኬታ፤ ታ ኢንቲስ ቱሙ ጋይስ፤ ታ ሱንላን ታ ኣዋ ዋሲኮ ኢዛ ኢንቲስ ኡባካ ኢማና።

24 ሃኖ ጋካናስ ኢንቲ ታ ሱንላን ኣይኮካ ዋሲ ኤሬኬታ፤ ዋሲቲ ኢንቲ ኤካና፤ ኢንቲ ኡፋይሳይካ ኩሜል ጊዳና።

25 «ሃኢ ጋካናስ ታ ኢንቲስ ሌሚሶራ ዮታዲስ፤ ሃይሳፌ ጉዬ ታ ሌሚሶራ ዮቶንታ ዋዴይ ያና። ጊደ ኣቲን ኣዋ ጊሻስ ታ ኢንቲስ ኡባ ቆንጪሳ ዮታና።

26 ሄ ዋዴ ኢንቲ ታ ሱንላን ዋሳና፤ ታኒካ፥ ሓዋ ኢንቲ ጊሻስ ዋሳና ጊኬ።

27 ጋሶይካ ኣዋይ ባ ባጋራ ኢንቲና ዶሲዛ ጊሻሳ፤ ኣዋይ ኢንቲና ዶሲዛይ ኢንቲ ታና ዶሲዛ ጊሻሲኔ ታኒ ጸሳ ኣቻፌ ዩዳይሳ ኢንቲ ኣማኒዳ ጊሻሳ።

28 ታኒ ኣዋ ኣቻፌ ኬዛዳ ሃይሳ ሃ ኣላሜ ያዲሲኔ ቃሴካ ሃ ኣላሜዛ ኣጋዳ ኣዋኮ ሲማ ባና» ጊዴስ።

29 ኢዛ ካሊዛይቲ፥ «ሄኮ ኔ ሃኢ ሌሚሶ ጊደንታ ኑስ ቆንጩራ ዮታዳሳ።

30 ኔ ዉርሳ ኤሪዛ ማላኔ ኦኒካ ኔና ኦይቻናስ ኮሾንታይሳ ሃኢ ኑ ኤሪዶስ፤ ሄሳ ጊሻስ ኔ ጸሳ ኣቻፌ ኬዚዳይሳ ኑ ኣማኖስ» ጊዳ።

31 ዬሱሲ ኢሰታስ፥ «ኢንቲ ሃኢ ኣማኒዴታ፤

32 ጌዶ አቲን አንቴ አንቴ ባጋራ ባጋራ ላሌቲዲ ታና ጸላ አጋና ዋዴይ ጋኪዴሰ፤ ሄ ሳቴያካ ሃኢ ጋካዴሰ። ጌዶ አቲን አዋይ ታናራ ጌዲዳ ገሻሰ ታ ታርካ ዲኬ።

33 ታ ሃይሳ አንቴሰ የቲዛይ አንቴ ታናን ዴኢን አንቴሰ ሳርቴላ ዳና ማላ ጋዳ የታይሰ። አንቴ ሃ አላሜን ዲሺን አንቴሰ ዋዴይ ዴሰ፤ ጌዶ አቲን አይኮይ ባ፤ ታ አላሜ ጸናዲሰ» ጌዴሰ።

17

ዬሱሳ ዋሳ

1 ዬሱሲ ሄሳ ጌዳፔ ጉዬ ፑዴ ሳሎ ጶቁ ጌ ጴሊዲ፥ «ታ አዋዉ! ሄኮ ሃኢ ሳቴይ ጋኪዴሰ፤ ኔ ናይ ኔና ቦንቻና ማላ ኔኒ ኔ ናዛ ቦንቻ።

2 ኔ ቦንቻናይካ ኔ ኢዛሰ አሚዳይታሰ ኢዚ ሜርና ዴኦ አማና ማላ ኔ ኢዛሰ አሳ ኡባ ቦላ ጎዳቴሰ አሚዳ ገሻሳ።

3 ሜርና ዴኦይካ ኔ ጸላ ቱሙ ጸሳኔ ኔ ኪቲዳ ዬሱሰ ኪርሰቶሳ ኤሮ ጉሳ።

4 ኔ ታሰ አሚዳ ኦሶ ታኒ ወርሳዳ ሃ ቢታ ቦላ ኔና ቦንቻዲሰ።

5 ታ አዋዉ! አላሜይ ሜዴታናፔ ካሴ ታሰ ኔናራ ዲዛ ቦንቻን ሃኢካ ታና ኔ አቻን ቦንቻርኪ!

6 «ሃይሳ አላሜ አሳፔ ኔ ታሰ ዶራዳ አሚዳ አሳታሰ ኔ ኦናኮ ታ ኢሰታሰ ኔና ቆንጨሳዲሰ፤ ኢሰቲ ካሴካ ኔይታ ሺን ኔ ታሰ አማዳሳ፤ ኢሰቲካ ኔ ቃላ ናጌዳ።

7 ኔ ታሰ አሚዳይሲ ወሪካ ኔፔ ጌዲዳይሳ ኢሰቲ ሃኢ ኤሪዳ።

8 ኔ ታሰ አሚዳ ቃላታካ ታ ኢሰታሰ አማዲሰ፤ ኢሰቲካ ኤኪዳ፤ ታ ኔ አቻፌ ዩዳይሳ ኢሰቲ ቱማፔ ኤሪዳ፤ ኔ ታና ኪቲዳይሳካ ኢሰቲ አማኒዳ።

9 «ታ ኢሰታሰ ዋሳይሰ፤ ሄይቲ ኔ ታሰ አሚዳይቲ ኢሰቲ ኔይታ ጌዲዳ ገሻሰ ታ ኢሰታሰ ዋሳይሰ፤ ጌዶ አቲን ሃንኮ አላሜ አሳሰ ዋሲኬ።

10 ታሰ ጌዲዳይ ወሪካ ኔይሳ፤ ኔይሲ ወሪካ ታይሳ፤ ታኒካ ኢሰታን ቦንቹታና።

11 ሃይሳፌ ጉዬ ታኒ ሃይሳ አላሜ ቦላ ዲኬ፤ ኢሰቲ ጌዲኮ ሃ አላሜዛ ቦላ ዴቴሰ፤ ሃኢ ታ ኔኮ ባይሰ፤ ታ አዋ ጌሻዞ! ሃይታ

ኔ ታስ አሚዳይታ አስቲ ኑ ማላ ባ ጊደን አሲኖ ጊዳና ማላ ኔ ታስ አሚዳ ኔ ሱንፋን አስታ ናጋ። *

12 ታ አስታራ አሲፌ ዳሼ ኔ ታስ አሚዳ ኔ ሱንፋን ታ አስታ ናጋዲስ፤ ሄሳ ገሻስ ካሴ ጸፊቲዳ ገሻ ማጻፋ ቃላይ ፖሌታና ማላ አዚ ካሴካ ጳዮስ ዲዛ ናዛፔ አቲን አስታፌ ኦኒካ ጳይቤና።

13 ታ ቃሴ ሃኢ ኔኮ ባይስ፤ ታ ሃ አላሜዛ ቦላ ዳሼ ሃይሳ ዮቲዛይ ታ ኡፋይሲ አስታን ፖሌታና ማላ ጋዳ ዮታይስ።

14 ታኒ ኔ ቃላ አስታስ አማዲስ፤ ታኒ ሃይሳ አላሜዛ አስ ጊደንታይሳ ማላ አስቲካ ሃ አላሜ አስ ጊዳቴና፤ ሄሳ ገሻስ ሃ አላሜ አሳይ አስታ አዲዳስ።

15 ኔ አስታ አታፔ ናጋና ማላ ታ ኔና ዋሳይስ አቲን ኔ አስታ ሃ አላሜፔ ዴንፋ ኤፋና ማላ ታ ኔና ዋሲኬ።

16 ታኒ አላሜ አስ ጊደንታይሳ ማላ አስቲካ ሃ አላሜ አስ ጊዳቴና።

17 ኔ አስታ ኔ ቱማን ኔስ ሻካ፤ ኔ ቃላይካ ቱሙ ቃላ።

18 ኔ ታና ሃ አላሜ ኪቶይሳላ ታኒካ አስታ አላሜ ቦላ ኪታዲስ።

19 አስቲ ቱማፔ ኔስ ዱማ አስ ጊዲዳ ማላ ታኒካ ታና አስታ ገሻስ ዲማሳይስ።

20 «አስታ ቃላ ማርካቴፋን ታና አማናናይታ ገሻሳራ ታ ኔና ዋሳይስ አቲን ታ ኔና አስታ ገሻስ ጸላ ዋሲኬ።

21 ታ ዋሲዛይ አስቲ ወሪካ አሲኖ ጊዳና ማላሳ። ታ አዋዉ! ቃሴካ ኔ ታናን ዲዛ ማላ አስቲካ ኑናን ጊዳና ማላኔ ኔ ታና ኪቲዳይሳ ሃ አላሜይ አማናና ማላ ታ ኔና ዋሳይስ።

22 ኦኒ ኑ ጊደን አሲኖ ጊዲዳ ማላ አስቲካ ባ ጊደን አሲኖ ጊዳና ማላ ኔ ታስ አሚዳ ቦንቸዛ ታኒካ አስታስ አማዲስ።

23 ታ ኔና ዋሲዛይ ታ አስታን፤ ኔካ ታናን ጊዲዳ ማላ አስቲካ ኩማል አሲኖ ጊዳና ማላሳ። ቃሴካ ኔኒ ታና ኪቲዳ ማላኔ ታና ኔ ሰቂዳ ማላ አስታካ ኔ ሰቂዳይሳ አላሜ አሳይ ኤራናሳ።

24 «ታ አዋዉ! ኔ ታና ሃይሲ አላሜይ ሜጼታናፔ ካሴ ዶሲዳ ገሻስ ኔ ታስ አሚዳ ታ ቦንቸዛ አስቲ ቤያና ማላ ሃይቲ ኔ ታስ አሚዳይቲካ ታ ዲዛሶን ታናራ ዳና ማላ ዳሳይስ።

25 ጲሎ ጊዲዳ ታ አዋዉ! ኔና አላሜይ ኤሪቤና፤ ታ ጊዲኮ ኔና ኤራይስ፤ ሃይቲካ ኔ ታና ኪቲዳይሳ ኤሪዳ።

* 17:11 ኔ ታስ አሚዳ ሱንፋን አስታ ናጋ ገዛይሳ አሲ አሲ ገሻ ማጻፋቲ ኔ ታስ አሚዳ ኡባ ኔ ሱንፋን ናጋ ገቱስ።

26 ኔ ታና ሲቋይ ሲቋይ ኢስታን ጊዳና ማላኔ ታኒካ ኢስታን ጊዳና ማላ ኢስቲካ ኔና ኤራና ማላ ኦላዲስ። ቃሴካ ኢስቲ ኤራና ማላ ታ ኦላና» ጊዴስ።

18

ሞርኬታ ኩሼን አጲ ዬሱሳ እሚቴል

(ማቶ 26:47-56፤ ማር 14:43-50፤ ሉቃ 22:47-53)

1 ሄሳ ኡባ ዮቲዳፔ ጉዬ ዬሱሲ ባና ካሊዛይታራ ቄዲሮኔ ጌቴቲዛ ሾባ * ፒኒዲ አታኪልቴ ጊዳ ጌሊዴስ።

2 ዬሱሲኔ ኢዛ ካሊዛይቲ ካሴካ ሄ ጋዴዪን ዳሮ ዎዴ ኢሲፌ ሸቂዛ ጊሻስ ዬሱሳ አሏ እሚዳ ዩሁዳይ ሄ ጋዴዮ ካሴካ ኤሬስ።

3 ሄሳ ጊሻስ ዩሁዳይ ዎታዳራታ፡ ቄሴታ ሃላቃታኔ ፋርሳዌታፔ ከቴቲ ዬዳ አሸካራታ ወርሲ ካሌሊ ኤኪዲ ሄ ኢስቲ ሸቂዛሶ ዩዴስ። ኢዛራ ዬዳ አሳይ ፓኖሴ፡ ጸሞፔ፡ ማሻኔ ቶራ ኦይኪዲ ዩዴስ።

4 ዬሱሲ ባ ቦላ ጋካናይሳ ኡባ ኤሪዲ ዬዳ አሳኮ ቢዲ፡ «ኦና ኮዬቲ?» ጊዴስ።

5 ኢስቲ ቃሴ፡ «ናዚሬቴ ዬሱሳ ኮዮስ» ጊዳ። ኢዚካ ኢስታስ፡ «ታኒ ኢዛኮ» ጊዴስ። ኢስታስ አሏ እሚዳ ዩሁዳይ ኢስታራ ኢሲፌ ኤቂዴስ።

6 ዬሱሲ፡ «ታኒ ኢዛኮ» ጊዳ ማላ አሳቲ ጉዬ ጋንዲጋርዲ ቢታ ቦላ ኩንዲዳ።

7 ዬሱሲ ሃኢካ፡ «ኦና ኮዬቲ?» ጊ ኦይቺን ኢስቲ ዛሪዲ፡ «ናዚሬቴ ዬሱሳ ኮዮስ» ጊዳ።

8 ኢዚካ ዛሪዲ፡ «ታኒ ኢዛኮ፤ ሂስቲን ኢንቴ ኮይዛይ ታና ጊዲኮ ሃይቲ ቤቶ ቦቾፍቴ» ጊዴስ።

9 ሂሲ ሃኒዳይ፡ «ታ አዋዉ! ኔ ታስ እሚዳይታፔ ኢሳዴካ ታ ጳይሳቤኬ» ጊዳ ቃላይ ፖሌታና ማላሳ።

10 ሲሞና ጌቴቲዛ ጴጽሮሲ ጊላ ማሻ ኦይኪዳ ጊሻስ ማሻ ኮሆፔ † ሾዲዲ ኢሲ ቄሴታ ሃላቃ አሸካራ ዲዛይሳ ሃይል ማሻራ ቃንጺ ዩጊዴስ፤ ሄ አሸካራዛ ሱንሏ፡ «ማልኮሳ» ጌቴቴስ።

11 ዬሱሲ ቃሴ ጴጽሮሳ፡ «ኔ ማሻዛ ኮሆን ዛራ ጌልላ። አዋይ ታስ እሚዳ ዋዬ ኡሻ ታ ኡዮንታ ኣጋና ሚሳቲዜ?» ጊዴስ።

* **18:1** ሾባ፡ ሾባ ጊዛይሳ ኢሲ ኢሲ ባጋ ጋሞላ ቃላን ዙሊ ጌቴስ። † **18:10** ኮሆፔ፡ ኮሆፔ ጊዛይሳ ኢሲ ኢሲ ባጋ ጋሞላ ቃላን ሾሆፔ ጌቴስ። **18:11** ማቶ 26:39፤ ማር 14:36፤ ሉቃ 22:42

ቄሴታ ሃላቃ ሃና ሲንሐ ዩሱሳ ሺቆ

12 ሄሳፌ ጉዬ ዋታዳራቲ፥ ኢስታ ኣዘዚዛይሲኔ ኣይሁዳታ ኣሸካራቲ ዩሱሳ ኦይኪዲ ቃቹዳ።

13 ኮይሮ ሄ ላይላን ቄሴታስ ሃላቃ ቃያፋ ቦሎ ሃናኮ ኤፊዳ።

14 ቃያፋይ፥ «ዳሬ ገሻስ ኢሳዳይ ሃይቂኮ ሎኦ» ገዲ ኣይሁዳታ ዳናታ ካሴ ዘሪዳዳ።

ጴጽሮሲ ዩሱሳ ካዲዴስ

(ማቶ 26:69-70፤ ማር 14:66-68፤ ሉቃ 22:55-57)

15 ሲሞና ጌቲቲዛ ጴጽሮሲኔ ዩሱሳ ካሊዛይታፔ ኢሳዳይ ዩሱሳ ካሊዳ፤ ሄሳዳይ ቄሴታ ሃላቃ ኣቻን ኬሂ ኤሬቲዳዳ። ሄሳ ገሻስ ዩሱሳራ ኢሲፌ ቄሴታ ሃላቃዛ ጊቤ ጌሊዴስ።

16 ጴጽሮሲ ገዲኮ ፔንጌፌ ካሬ ባጋራ ኤቂዴስ፤ ቄሴታ ሃላቃ ኣቻን ኬሂ ኤሬቲዳዲ ዩሱሳ ካሊዛይሲ ዩዲ ፔንጌን ዲዛ ጋራዴያ ጴጽሮሳ ጊቤ ገደ ጌልላና ማላ ዮቲዲ ጴጽሮሳ ኤኪ ጌሊዴስ።

17 ፔንጌ ናጊዛ ጋራዴያ ጴጽሮሳ፥ «ኔካ ሄሳ ኣዴዛ ካሊዛ ኣሳታፔ ኢሳ ዲኪ?» ጋዲስ፤ ኢዚ ቃሴ፥ «ታኒ ኢዛ ካሊዛዴ ገዲኬ» ገዴስ።

18 ዋዴይ ሜጊዛ ዋዴ ገዲዳ ገሻስ ኦሳንቻቲኔ ኣሸካራቲ ታማ ኤሌዲ ኤቂ ሆኤቴስ። ጴጽሮሲካ ኢስታራ ኤቂዲ ሆኤስ።

ቄሴታ ሃላቃዛፔ ዩሱሳስ ሺቂዳ ኦይሾ

(ማቶ 26:59-66፤ ማር 14:55-64፤ ሉቃ 22:66-71)

19 ሄ ዋዴ ቄሴታ ሃላቃይ ዩሱሳ ኢዛ ካሊዛይታ ገሻሲኔ ኢዚ ታማርሲዳ ቲሚርቲ ገሻስ ኦይቹዴስ።

20 ዩሱሲካ ኢዛስ፥ «ታ ኣሳ ኡባስ ቆንጩን ዮታዲስ፤ ኣይሁዳቲ ሺቂዛ ኢስታ ዋሳ ኬላን ገዲንካ ጸሳ ኬላን ታማርሳዲስ፤ ታ ቆታን ሃሳይዳዚ ኣይኮይካ ዴና።

21 ሂስቲን ኔ ታና ኦይቹዛይ ኣዜ? ታ ዮቲሺን ሲዬዳይታ ኦይቻ፤ ታ ዮቲዳይሳ ኢስቲ ኤሬቴስ» ገዴስ።

22 ዩሱሲ ሄሳ ገዳ ማላ ሄን ኤቂዳ ኣሸካራታፔ ኢሶይ፥ «ቄሴታ ሃላቃስ ሃይሳሶ ዋስታ ዛራይ?» ገሼ ዩሱሳ ሻጋላን ባቃ ሻዬዴስ።

23 ዩሱሲካ ዛሪዲ፥ «ታ ኢታ ሃሳይዳ ገዲኮ ኣኔ ታ ጎይሳ ኔ ማርካታ፤ ታ ዮቲዳይ ሊኬ ገዲኮ ታና ኣዛስ ባቃይ?» ገዴስ።

24 ሄሳፌ ጉዬ ሃናይ ዬሱሳ ቃቺዳ ማላ ቄሴታ ሃላቃ ቃያፋኮ ዬዲዴሰ።

ጴጽሮሲ ዬሱሳ ዛሪዲ ካዲዴሰ

(ማቶ 26:71-75፤ ማር 14:69-72፤ ሉቃ 22:58-62)

25 ሄ ዋዴ ሲሞና ጌቴቲዛ ጴጽሮሲ ኤቂዲ ታማ ሆኢሺን ሃንኮ አሳይ ኢዛ፤ «ሃይሶ! ኔ ዬሱሳ ካሊዛይታፔ ኢሳ ዲኪ?» ጌዲ። ኢዚካ ዛሪዲ፤ «ታ ኢዛ ካሊዛዴ ዲኬ» ጌዲ ካዲዴሰ።

26 ካሴ ጴጽሮሲ ኢዛ ሃይሳ ቃንጺዲይሳ ዳቦይ ቄሴታ ሃላቃ አሽካራታፔ ኢሶይ፤ «ዋና ታ ኔና ኣታኪልቴሶን ኢሰታራ ዲሺን ቤያቤኪና?» ጌዴሰ።

27 ጴጽሮሲ ቃሴካ ካዲዴሰ፤ ሄራካ ኩቶይ ዋሲዴሰ።

ጲላጶሳ ሲንሐ ዬሱሳ ሺቆ

(ማቶ 27:1-2፤ 11-14፤ ማር 15:1-5፤ ሉቃ 23:1-5)

28 ሄሳፌ ጉዬ ዬሱሳ ቃያፋ ኬላፌ ዴፌ አይሲዛ ካዋዛ ጊቤ ማላዶ ዋንታራ ኤኪ ቢዳ። አይሁዳ አሳሰ ፓዚጋ † ባኣሌ ዶርሳ አሾ ሚዛ ዋዴ ጊዲዳ ጊሻሰ ባና ቱኒሶንታ ማላ ጊዲ ማላዶራ ዴፌ አይሲዛይሳ ጊቤ ጊዶ ጌሊቤቴና።

29 ሄሳ ጊሻሰ ጲላጶሲ ኢሰታኮ ኬዚዲ፤ «ሃይሳ አዴዛ ኢንቴ አዛሰ ሞቴቲ?» ጌዲ ኦይቺዴሰ።

30 ኢሰቲ ቃሴ፤ «ሃይሲ አዴዚ ኢታ ኦፋንታዴ ጊዲዳኮ ኑ ኢዛ ኔሰ አሏ ኢሞኮሺን» ጌዲ።

31 ጲላጶሲካ፤ «ኢንቴ ኢዛ ኤኪ ቢዲ ኢንቴ ዋጋ ማላ ፒርዲቴ» ጌዴሰ። አይሁዳታ አይሲዛይቲ ቃሴ ዛሪዲ፤ «ኑኒ አሰ ዋጳና ማላ ኑሰ ፒቃዴይ ኢሚቴቤና» ጌዲ።

32 ሄሲካ ሃኒዳይ ዬሱሲ ካሴ ኢሰታሰ ኢዚ ዋኒ ሃይቃናኮ ዮቲዳ ቃላይ ፖሌታና ጊሻሳ።

33 ጲላጶሲ ቃሴካ ጉዬ ጊቤ ጊዶ ጌሊዲ ዬሱሳ ጴይጊሲዲ፤ «ኔ አይሁዳታ ካዋ?» ጌዲ ኦይቺዴሰ።

34 ዬሱሲካ ዛሪዲ፤ «ኔ ሄሳ ጊዛይ ኔፔዬ? ዋይኮ ሃራ አሳቲ ታ ጊሻሰ ኔሰ ዮቲዶ?» ጌዴሰ።

35 ጲላጶሲካ፤ «ታ አይሁዳ አሴ? ኔና ታሰ አሏ ኢሚዳይቲ ኔ ባጋታኔ ቄሴታ ሃላቃታኮ፤ ኔ አይ ኦላዲ?» ጌዴሰ።

† 18:28 ፓዚጋ፡ ፓዚጋ ጊዛይሲ ጶሳ ኪታንቻይ ኢሰራኤሌ አሳታ ዋጶንታ ኣሺን ጊብጼ ኣሳ ኪታንቻይ ዋጲዳ ጋሶን ኢሰራኤሌ አሳይ ጶሳ ቦንቾ ጊሻሰ ቦንቹዛ ባኣሌ።

36 ዩሱሲካ፡ «ታ ካዎቴሊ ሃይሳ ሃ አላሜ ቦላ ጊዴና። ታ ካዎቴሊ ሃይሳ ሃ አላሜ ቦላ ጊዴዳኮ አይሁዳታ ዳናታ ኩሼን ታ ኩንደንታ ማላ ታ አሽካራቲ ታ ጊሻሰ ኮሌታናኮሺን ታ ካዎቴሊ ጊዴኮ ሃ አላሜ ቦላ ጊዴና» ጊዴሰ።

37 ጲላጸሲካ፡ «ሂሰቲን ኔ ካዎ?» ጊዴሰ፤ ዩሱሲ ቃሴ፡ «ታኒ ኔ ጊዴይሳ ማላ ኤ ካዎ፤ ታ ዩሌቲዳይኔ ሃ ቢታ ዩዳይ ቱማ ጊሻሰ ማርካታናሳ፤ ቱማፔ ጊዴዳይ ዉሪ ታ ቃላ ሲዩሰ» ጊዴሰ።

38 ጲላጸሲካ፡ «ቱማይ አዜ?» ጊዴሰ፤ ሄሳፌ ጉዬ ጲላጸሲ ናሞእንላ አይሁዳታኮ ኬዚዲ፡ «ታ ኢዛ ቦላ አይኮ ባላካ ቤያቤኬ።

39 ጊዴ አቲን ካሴካ ታ ኢንቴሰ ፓዚጋ ባኣሌ ጋላሰ ኢሲ ቃሾ አሰ ቢርሺዛ ማላ ሃይሳ አይሁዳታ ካዎ ኢንቴሰ ቢርሻና ማላ ኮዬቲ?» ጊዴሰ።

40 ኢሰቲ ጊዴኮ፡ «ኑሰ ባርባኔ ቢርሻ አቲን ሃይሳ ዴና!» ጊዴ ዋሲዳ፤ ባርባኔይ ባ ሁኤሰ ፓንጋ።

19

ዩሱሳ ቦላ ዎታዳራታ ቂጂ
(ማቶ 27:27-32፤ ማር 15:15-21)

1 ሄሳፌ ጉዬ ጲላጸሲ ዩሱሳ ኤፌዲ ጋራፊሲዴሰ።

2 ዎታዳራቲካ እጉንላ ዛዉዴ ጸጺዲ ዩሱሳ ሁኤን ዎሊዳ፤ ዘኦ ካባካ ማይዚዳ።

3 ኢዛኮ ሽቂ ሽቂዲ፡ «አይሁዳ ካዎ ሳር! ሳር!» ጊ ጊዴ ኢዛ ሻጋላን ባቂዳ።

4 ጲላጸሲ ቃሴካ ካሬ ኬሲዲ፡ «ሂኮ ታ ኢዛ ቦላ አይኮ ሞርካ ዴሞንታይሳ ኢንቴ ኤራና ማላ ታ ኢዛ ኢንቴሰ ሃ ካሬ ኬሳና» ጊዴሰ።

5 ሄሳ ጊሻሰ ዩሱሲ እጉንላ ዛዉዴ ሁኤን ዎሊ ኤኪዲ ዘኦ ካባ ማይኢዲ ካሬ ኬዚዴሰ። ጲላጸሲካ ኢሰታሰ፡ «ሂኮ አዴዚ ሃይሲቶ!» ጊዴሰ።

6 ቂሴታ ሃላቃቲኔ ኢሰታ አሽካራቲ ዩሱሳ ቤኢዲ፡ «ኔ ኢዛ ካቃ! ካቃ!» ጊሼ ዋሲዳ።

ጲላጸሲ ቃሴ፡ «ታኒ ታ ባጋራ ኢዛ ቦላ ኢሲ ሞርካ ዴማቤኬ፤ ኮይኮ ኢንቴ ኤፌዲ ካቂቲ» ጊዴሰ።

7 አይሁዳ አሳቲ ቃሴ፡ «ኑሰ ዎጋይ ዴሰ፤ ሃይሲ አዴዚ ባና ጸሳ ና ጊዛ ጊሻሰ ኑ ዎጋ ማላ ኢዛሰ ሃይቆይ ቤሴስ» ጊዴ።

8 ጲላጸሲ ሄሳ ኢሰቲ ጊዛይሳ ሲዩዲ ዳር ባቢዴሰ።

9 ጌዴ ጊቤ ጌሊዲ ዬሱሳ፥ «ኔ አዋፔ ያዲ?» ጊ ኦይቺዴስ።
ዬሱሱ ቃሴ ኢዛስ አይ ዛርካ ኢሚቤና።

10 ሄሳ ጊሻስ ጰላጸሲ፥ «ኔ ታስ ዮቲኪ? ታ ኔና ካቃናስ
ዎይኮ ቢርሻ ዬዳናስ ጎዳቴሊ ታስ ዲዛይሳ ኤርኪ?» ጊዴስ።

11 ዬሱሱካ ኢዛስ ዛሪዲ፥ «ሼኔይ ኔስ ጸሳፌ አሜቶንታኮ ኔስ
ታ ቦላ አይ ጎዳቴሊካ ዴናሺን፤ ጊዶ አቲን ታና ኔስ አሊ ኢሚዳዴ
ቦላ ጊታ ናጋራይ ዴስ» ጊዴስ።

ዬሱሳ ቦላ ፒርዴቲዳ ሃይቆ ፒርዳ

(ማቶ 27:15-31፤ ማር 15:6-20፤ ሉቃ 23:13-25)

12 ጰላጸሲ ሄሳ ዬሱሳ ሃሳያ ሲዱዳፔ ጉዬ ኢዛ ቢርሺ ዬዳና
ኮዱዴስ ሺን አይሁዳታስ ባቢዳ ጊሻስ ኢስቲ፥ «ኔ ሃይሳ አዴዛ
ቢርሺኮ ኦሮሜ ካዎ ቄሳፌ ባጋ ጊዳካ፤ ጋሶይካ ባና ባርካ
ካዎሊዛዴይ ወሪ ቄሳፌስ ሞርኬ» ጊሼ ወሪካ ዋሲዳ።

13 ጰላጸሲ ሄሳ ሲዱዳ ማላ ዬሱሳ ካሬ ኬሲዲ፥ «ሎቻ ሹች»
ጌቲቲዛሶን ፒርዳ ዎምቦራን ኡቲዴስ። ሄ ፒርዳሶይ አይሁዳታ
ቃላራ፥ «ጋባታ» ጌቲቲስ።

14 ሄ ዎዴ ጋዴይ አሲ ፓዚጋ ባአሌስ ጊጌቲዛ ጋላሳ። ዎዴይካ
ጋላሳፌ ኡሱፑን ሳቲ ማላ ጊዲዴስ፤ ሄ ዎዴ ጰላጸሲ አይሁዳታ፥
«ሄኮ አንቲ ካዎይ ሃይሲች!» ጊዴስ።

15 ጊዶ አቲን ኢስቲ ቃሴ፥ «ጌዴ ዲጋ! ጌዴ ዲጋ! ካቃ!»
ጊሼ ዋሲዳ። ጰላጸሲካ፥ «ታ አንቲ ካዎ ካቆ?» ጊዴስ። ቄሴታ
ሃላቃቲ ዛሪዲ፥ «ኡስ ቄሳፌፔ ሃራ ካዎይ ዴና» ጊዳ።

16 ሄሳፌ ሲሚዲ ጰላጸሲ ዬሱሳ ካቃና ማላ ኢስታስ አሊ
አሚዴስ። ኢስቲካ ዬሱሳ ኦይኪ ኤኪ ኤፊዳ።

ዬሱሳ ካቂቲሳ

17 ሄሳፌ ጉዬ ዬሱሲ ባ ካቂታና ማስቃሌዛ ቶኪዲ፥ «አሳ
ሁኤ ጉኔ» ጌቲቲዛሶ ኬዚዴስ። ሄ ሶሆይ አይሁዳታ ቃላራ፥
«ጎልጎታ» ጌቲቲስ።

18 ኢዛ ሄን ካቂዳ። ዬሱሳ ጊዶ ጌልሊዲ ሃራ ናምኡ አሳታ
ኢዛዳ ሃዲርሳራኔ ኡሻቻራ ካቂዳ።

19 ጰላጸሲ፥ «ናዚሬቲ ዬሱሲ አይሁዳታ ካዎ» ጊዛ ቃላ
ጸፊዲ ኢዛ ማስቃሌ ቦላ ኢዛስ ሁኤሶራ ቃጰዴስ።

20 ዬሱሲ ካቂቲዳሶይ ካታማስ ማታ ጊዲዳ ጊሻስ ዳር
አይሁዳ አሳይ ጰላጸሲ ጸፊዳይሳ ናባቢዴስ፤ ጸፊቲዳይሲካ
አይሁዳታ ቃላራ፥ ላቲኔ ቃላራኔ ጊሪኬ ቃላራ።

21 አይሁዳታ ቁሴታ ሃላቃቲ ጲላጸሳ፡ «ኔ ኢዛ አይሁዳታ ካዎ» ጋዳ ጸፎ፡፡ ጊዶ አቲን፡ «ሃይሲ አዳዚ ባና ታ አይሁዳታ ካዎ» ጊዳሰ ጋዳ ጸፋ» ጊዳ፡፡

22 ጲላጸሲ ቃሴ፡ «ታ ጸፊዳይሳ ጸፋዲሰ» ጊዳሰ፡፡

23 ዋታዳራቲ ዩሱሳ ካቂዳፔ ጉዬ ኢዛ ማይኦዛ ኤኪዲ ዋታዳራታ ኢሳ ኢሳ ጋካና ማላ ኦይዲ ኬሲ ሻኬሬሊዳ፡፡ ጋርሳራ ማይኢዛ ማይኦዛካ ሄሳሶ ሻኬሬሊዳ፡፡ ጊዶ አቲን ጋርሳራ ማይኢዛ ማይኦዚ ሲኬቶንታ ፑዴፔ ዱጌ ጋካናሰ ጮ ዩዳ ዴሰ፡፡

24 ሄሳ ጊሻሰ ዋታዳራቲ ባ ጊዶን፡ «ጊሻን እና ጋካናኮ ኤራና ማላ ኢዛ ቦላ ሳማ ዩጋና አቲን ዳኮኮ» ጊዳ፤ ሄሲካ ሃኒዳይ ካሴ፡፡

«ታ ማይኦ ኢሰቲ ጊሼቲ ኤኪዳ፤

ታኒ ቦላራ ማይኢዛ ማይኦዛ ቦላ ሳማ ዩጊዳ»

ጌቲቲዳ ጌሻ ማጸፋ ቃላይ ፖሌታና ማላሳ፡፡ ዋታዳራቲካ ሄሳ ኦሊዳ፡፡

25 ዩሱሳ ማሰቃሌ አቻን ኢዛ አዬያኔ አዬይ ሚቹያ ቃሊዮጳ ማቻ ማራማኔ ማግዳሌ ጌቲቲዛሶፔ ዩዳ ማራማ ሄን ኤቂዳ፡፡

26 ዩሱሲ ባ አዬዮኔ ኢዚ ሲቂዛ ኢዛ ካሊዛይሲ ባ አቻን ኤቂዳይታ ቤኢዲ ባ አዬዮ፡ «አዬ! ኔ ናዛ ሄሳ ቤያ» ጊዳሰ፡፡

27 ሄሳፌ ካሌሊዲ ባና ካሊዛይሳ፡ «ኔ አዮ ሂኖ ቤያ» ጊዳሰ፡፡ ሂኖ ሄ ሳቴይፔ ሲሚን ኢዛ ካሊዛይሲ አዬዮ ባሶ ኤፊዴሰ፡፡

ዩሱሳ ሃይቆ

(ማቶ 27:45-56፤ ማር 15:33-41፤ ሉቃ 23:44-49)

28 ሄሳፌ ጉዬ ዩሱሲ ሃኢ ዉሪካ ፖሌቲዳይሳ ኤሪዲ ጌሻ ማጸፋን ጸፊቲዳይሲ ፖሌታና ማላ፡ «ታና ሳሚሰ» ጊዳሰ፡፡

29 ሄን ጫላ ጳንቂዳ ኡሺ ኩሚ ኡቲዳ ኢሲ ጸር ማላይ ዴሰ፡፡ ሄሳ ጊሻሰ ሄን ዲዛይቲ ሄ ጫላ ኡሻ ዛንዛ ሚሳቲዛ ሳፊኔጌ ጌቲቲዛይሳራ ሂሶጴ ጌቲቲዛ ሚላ ጴራን ቃጲዲ ኢዛ ዶናኮ ሺሺዳ፡፡

30 ዩሱሲ ሄ ጫላ ኡሻ ጵንጺ ጴሊዲ፡ «ፖሌቲዴሰ!» ጊዳሰ፡፡ ባ ሁኤ ዱጌ ዚቂሲዲ ሺምፖ ኬዚዴሰ፡፡

31 ሄሳፌ ጉዬ አይሁዳታ ዳናቲ ካቂቲዳ አሳታ ሜቄሰ ዋዲራፔ ሚንሊዲ ኢሰቲ ኢዛ ማሰቃሌ ቦላፌ ዋላና ማላ ጲላጸሳ ዋሲዳ፡፡ ኢሰቲ ሄሳ ኦሊዳይ አይሁዳቲ ሳምባታሰ ጊጌቲዛ ጋላሰ ጊዲዳ

ገሻሲኔ ሄ ሳምባታይካ ዳር ጌታ ባኣሌ ጌዲዳ ገሻሰ ሳምባታ ጋላሰ እሃይ ማሰቃሌ ቦላ ጋምኦንታ ማላ ኮዪዳ ገሻሳ።

³² ሄሳ ገሻሰ ዋታዳራቲ ቢዲ ዩሱሳራ ካቄቲዳ አሳታ ሜቄል ዋዲራፔ ዋዲራፔ ሜንሲዳ።

³³ ኢሰቲ ዩሱሳኮ ቢን ኢዚ ካሰቲ ሃይቂዳይሳ ቤኢዲ ኢዛ ዋዲራ ሜቄል ሜንሲቤቲና።

³⁴ ጌዶ እቲን ዋታዳራታ ጌዶፌ ኢሳዴይ ቶራራ ኢዛ ሚሌን ጫዲን ሄራካ ሱሊኔ ሃሊ ጉኪዴሰ።

³⁵ ሄሳ ቤኢዳዴይ ኢንቲ ኢዛን አማናና ማላ ማርካቲዴሰ፤ ኢዛ ማርካቲልካ ቱማ። ኢዚ ዮቲዛይካ ቱሙ ጌዲዳይሳ ኢዚ ኤሬሰ።

³⁶ ሄሲካ ሃኒዳይ፥ «ኢዛ ሜቄላፌ ኢሲናካ ሜቄኩ» ጌቲቲዳ ጌሻ ማጻፋ ቃላይ ፖሌታናሳ።

³⁷ ቃሴካ ጌሻ ማጻፋን ሃራሶን፥ «ኢሰቲ ባና ጫዲዳይ ቤያና» ጌሰ።

ዩሱሳ ሞጌቲል

(ማቶ 27:57-61፤ ማር 15:42-47፤ ሉቃ 23:50-56)

³⁸ አይሁዳታ ዳናታ ባቢዲ ቆታን ዩሱሳ ካሊዛ አርማቲያሴ ጌቲቲዛሶፔ ዪዳ ዮሴፌይ ዩሱሳ እሃ ኤካናሰ ጰላጾሳ ዋሲን ጰላጾሲካ ኢዛሰ ኤር ጌዴሰ። ሄሳ ገሻሰ ዮሴፌይ ቢዲ ዩሱሳ እሃ ኤኪዴሰ።

³⁹ ካሴ ዩሱሳኮ ቃማራ ዪዳ ኒቆዲሞሲካ ባጋ ከሎ ጌዲዛ ካርቤኔ ጎዳሬ ኡላራ ዋላኬቲዳ ሺቶ ኤኪ ዪዴሰ።

⁴⁰ ሄ ናምኡ አሳቲ ዩሱሳ እሃዛ ኤኪዲ አይሁዳቲ እሃ ጸጸዛ ማላ ሺቶ ፑኪዲ ለኤ ማይኦራ ጸጸዳ።

⁴¹ ዩሱሲ ካቄቲዳሶሆን ኢሲ አታኪልቲሶይ ዴሰ። ሄ አታኪልቲዛሶን ኦኒካ ሞጌቶንታ ኦራላ ዲፎይ ዴሰ።

⁴² አይሁዳታ ሳምባታሰ ገጌቲዛ ጋላሰ ጌዲዳ ገሻሲኔ ዲፎይካ ማታን ዲዛ ገሻሰ ዩሱሳ እሃ ሄን ሞጌዳ።

20

ሃይቆፔ ዩሱሳ ዴንል

(ማቶ 28:1-10፤ ማር 16:1-8፤ ሉቃ 24:1-12)

¹ ዋጋ ጋላሰ ዋንታ ማላዶ ቡር ባዞይ ዞኢሺን ማግዳሌ ማራማ ዩሱሳ ዲፎኮ ባዲሰ። ኢዛ ሄ ጋኪሺን ካሴ ዩሱሳ

ዱፎ ኢዛራ ጎርዲዳ ሹቻይ ዱፎዛ ዶናፔ ዳንዲዲ ጌንዴዳይሳ በያዱስ።

² ሄሳ ጊሻሰ ኢዛ ዬሱሳ ካሊዛይታፔ ሲሞና ጌቲቲዛ ጴጽሮሳኮ ዬሱሲ ዶሲዛ ሃንኮ ኢዛ ካሊዛይሳኮ ዋጸ ባዳ፣ «ጎዳ ዱፎፔ ኬሲ ኤኪዲ አዋን ዋሊዳኮ ኑ ኤርኮ» ጋዱስ።

³ ሄራካ ጴጽሮሲኔ ዬሱሳ ካሊዛይታፔ ኢሶይ ኬዚዲ ዱፎይ ዲዛሶ ቢዳ።

⁴ ናሞኦይካ ኢሲፌ ዋጺዳ፤ ጌዶ አቲን ዬሱሳ ካሊዛ ሃንኮይሲ ጴጽሮሳፔ ፕላቲ ዋጺዲ ካሴቲ ዱፎይ ዲዛሶ ጋኪዳስ።

⁵ ዱፎዛ ሆኪ ጴሊዲ አሃይ ኢዛን ጸጾቲዳ ማይኦይ ጸላ ዲዛይሳ በዪዳስ፤ ጌዶ አቲን ጌዴ ዱፎዛ ጌዶ ጌሊቤና።

⁶ ሲሞና ጌቲቲዛ ጴጽሮሲካ ኢዛ ካሊ ጋኪዲ ዱፎዛ ጌዶ ጌሊዳስ፤ አሃይ ኢዛን ጸጾቲዳ ጫርቃይ ሄን ዲዛይሳ በዪዳስ።

⁷ ዬሱሳ ሁኤይ ጸጾቲዳ ጫርቃይ ሃንኮ ጸላ ጫርቃታራ ጌዶንታ ዱማ ሃራሶን ጸጾቲ ዲዛይሳ በዪዳስ።

⁸ ኮይሮቲ ጋኪዳ ዬሱሳ ካሊዛይሲካ ዱፎዛ ጌዶ ጌሊ በኢዲ አማኒዳስ።

⁹ ጋሶይካ፣ «ኢዚ ሃይቆፔ ዳንዳና በሴስ» ጊዛ ማጸፋ ቃላ ኢስቲ ቡሮ ሃሳኢቤቴና።

¹⁰ ሄሳፌ ጉዬ ናሞአቲካ ሲሚዲ ባሶ ባሶ ቢዳ።

ማግዳሌ ማራማ ዬሱሳ በያዱስ

(ማር 16:9-11)

¹¹ ማግዳሌ ማራማ ዬካሼ ዬሱሳ ዱፎፔ ካሬራ ኤቃዳ ሆካ ዱፎዛ ጌዶ ጴላዱስ።

¹² ዬሱሳ አሃይ ዲዛሶን ቦፋ ማይኦ ማይኢዳ ናሞኦ ኪታንቻታፔ ኢሶይ ሁኤሶን ኢሶይ ቶሆሶን ኡቲዳይታ በያዱስ።

¹³ ኢስቲካ ማራሞ፣ «ሃኔ ማጫሳዬ! አዛስ ዬካይ?» ጌዳ። ኢዛካ፣ «ኢስቲ ታ ጎዳ ኤፊዲ አዋን ዋሊዳኮ ታ ኤሪኬ» ጋዱስ።

¹⁴ ኢዛ ሂኖ ጋዳ ጉዬ ዩዩሺን ዬሱሲ ኤቂዳይሳ ዳማዱስ ሺን ኢዚ ዬሱሳ ጌዲዳይሳ ኤራቤኩ።

¹⁵ ዬሱሲ ኢዛ፣ «ሃኔ ማጫሳዬ! አዛስ ዬካይ? ቃሴ ኦና ኮያይ?» ጌዳስ፤ ኢዚካ ኢዚስ አታኪልቴ ናጊዛዴ ሚሳቲን፣ «ጎዳ! ኔ ኤኪዳ ጌዲኮ ኔ ዋሊዳሶ ታስ ዮተርኪ! ታ ኢዛ ታስ ኤካና» ጋዱስ።

¹⁶ ዬሱሲ ኢዛ፣ «ማራሚ!» ጌዳስ፤ ኢዛካ ጌዴ ኢዛኮ ሲማዳ አይሁዳታ ቃላራ፣ «ኤሬቡኔ!» ጋዱስ፤ ሄሳ ቢርሼሊ፣ «አስታማሬ!» ጉሳ።

17 ዩሱሲ ቃሴ፡ «ታ ቡሮ ፑዴ ታ አዋኮ ኬዛቤኬ፤ ታና ቦቾፋ፤ ጌዶ አቲን ኔ ሃኢ ታ አሻታኮ ባዳ፤ ታኒ ታ አዋኮኔ አንቴ አዋኮ፤ ታ ጸሳኮኔ አንቴ ጸሳኮ ኬዛና ጌዴሰ» ጋዳ ኢሰታሰ የታ» ጌዴሰ።

18 ሄሳ ጊሻሰ ማግዳሌ ማራማ ዩሱሳ ካሊዛይታኮ ባዳ ኢዛ ዩሱሳ በኢዳይሳኔ ኢዚ ኢዚሰ የቲዳይሳ ኢሰታሰ የታዱሰ።

ዩሱሲ ባና ካሊዛይታሰ በቲዴሰ

(ማቶ 28:16-20፤ ማር 16:14-18፤ ሉቃ 24:36-49)

19 ሄ ጋላሰ ዋጋ አማርሰ ዩሱሳ ካሊዛይቲ አይሁዳታ ዳናታሰ ባቢዲ ካሬ ባ ቦላ ጎርዲዲ ኬፋ ጌዶን ሺቆን ዲሺን ካሬይ ዶዬቶንታ ዩሱሲ ኢዛ ካሊዛይቲ ሸቂ ዲዛ ኬፋ ጌሊዴሰ፤ ኢሰታ ጌዶን ኤቂዲ፡ «ሳሮይ አንቴሰ ጌደ!» ጌዴሰ።

20 ሄሳ ጌ ሰሚዲ ባ ኩሼታኔ ባ ሚሌ ኢሰታ በሲዴሰ፤ ኢዛ ካሊዛይቲካ ጎዳ በኢዲ ኬሂ ኡፋዬቲዳ።

21 ሄሳፌ ጉዬ ቃሴካ ዩሱሲ ኢሰታ፡ «አንቴሰ ሳሮይ ጌደ! ታ አዋይ ታና ከቲዳ ማላ ታኒካ አንቴና ከታይሰ» ጌዴሰ።

22 ሄሳ ጌ ሰሚዲ ኢሰታ ቦላ ኡፋ ጌዲ፡ «አንቴ ጸሎ አያና ኤኪቴ።

23 አንቴ አሳ ናጋራ አቶ ጌኮ ኢሰታሰ አቶ ጌቴታና፤ አንቴ አሳ ናጋራ አቶ ጎንታ ኢጲኮ ቃሴ ኢሰታሰ አቶ ጌቴቴና» ጌዴሰ።

ዩሱሳኔ ቶማሳ

24 ዩሱሲ ባና ካሊዛይታኮ ዪዳ ዋዴ ታማኔ ናምአታፔ ኢሶይ ዲዲሞሳ ጌቴቲዛ ቶማሲ ኢሰታራ ዳና።

25 ሄሳ ጊሻሰ ሃንኮ ዩሱሳ ካሊዛይቲ ቶማሳሰ፡ «ኮኒ ጎዳ በኢዶሰ» ጌዳ። ቶማሲ ቃሴ፡ «ሚሰማሬን ጫዴቲዳ ኢዛ ኩሼታ ታኒ ታ አይፌራ በኦንታ ዳሼ፡ ቃሴካ ታ ቢራጼ ሚሰማሬይ ጌሊዳሶን ጌልፋ ጸሎንታ ዳሼኔ ታ ኩሼ ኢዛ ሚሌ ማዱንፋን ጌልፋ ጸሎንታ ዳሼ አማኒኬ» ጌዴሰ።

26 ኦሰፑን ጋላሳፌ ጉዬ ኢዛ ካሊዛይቲ ቃሴካ ኢሰቲ ሶን ዲሺን፡ ቶማሲካ ኢሰታራ ኢሲፌ ዲሺን፤ ካሬይካ ጎርዳን ዲሺን ዩሱሲ ዪዲ ኢሰታ ጌዶን ኤቂዲ፡ «ሳሮይ አንቴሰ ጌደ!» ጌዴሰ።

27 ሄሳፌ ጉዬ ቶማሳ፡ «ኔ ቢራጼ ሃ ኤሃዳ ታ ኩሼታ ቤያ። ኔ ኩሼ ሃ ኤሃዳ ታ ሚሌን ጌልፋ አማና አቲን አማኖንታዴ ጌዶፓ» ጌዴሰ።

28 ቶማሲ፡ «ታ ጎደ! ታ ጸሶ!» ጌዴሰ።

29 ዩሱሲካ ቶማሳ፡ «ኔኒ ታና ቤኢዳ ገሻሰ አማናዳሳ፤ ታና ቤኦንታ አማኒዛይቲ ገዲኮ ኢሰቲ ኣንጃቲዳይታ» ገደሰ።

30 ሃይሳ ማጸፋን ጸፊቶንታ ዳሮ ማላታታ ባና ካሊዛይታ ሲንፋን ዩሱሲ ኣሉደሰ።

31 ገደ ኣቲን ዩሱሲ ኢዚ ማሲሄ፡ ጸሓ ና ገዲዳይሳ ኢንቲ ኤራና ማላኔ ኢንቲ ኢዛ ሱንፋን አማኒዲ ዴኦ ዴማና ማላ ሃይሲ ጸፊቲደሰ።

21

ባና ካሊዛይታፕ ላፑናታሰ ዩሱሳ ቤቶ

1 ሄሳፌ ጉዬ ዩሱሲ ጸቢራዶሴ ኣባ ኣቻን ባና ካሊዛይታሰ ቃሴካ ቤቲደሰ።

2 ሲሞና ጌቲቲዛ ጳጳርሲ፡ ዲዲሞሳ ጌቲቲዛ ቶማሲ፡ ጋለላ ቃና ኣስ ናቲናኤሌይ፡ ዛብደሳ ናይቲካ ዩሱሳ ካሊዛይታፕ ሃራ ናሞኣቲካ ዉሪ ኢሲፌ ዲሺን

3 ሲሞና ጌቲቲዛ ጳጳርሲ ኢሰታሰ፡ «ታኒ ሞሌ ኦይካና ባይሰ» ገደሰ፤ ኢሰቲካ ኢዛሰ፡ «ኮኒካ ኔናራ ባና» ገደ። ኢዛራ ኬዚ ቢዲ ዋጎሎን ጌሊዳ ሺን ሄ ጋላሳ ኦማርሰ ኢሲ ሞሌካ ኦይኪቤቲና።

4 ጋዴይ ዋንቲሺን ዩሱሲ ኣባ ኣቻን ኤቂደሰ፤ ኢዛ ካሊዛይቲ ቃሴ ኢዚ ዩሱሳ ገዲዳይሳ ኤሪቤቲና።

5 ዩሱሲ ኢሰታ፡ «ናይቶ ሞሌይ ዲዜ?» ገደሰ፤ ኢሰቲካ፡ «ኣይኮይካ ባ» ገደ።

6 ኢዚካ፡ «ጌቲዛ ዋጎሎዛፕ ኡሻቻ ባጋራ ኣባን ዩጌቲ፤ ኢንቲ ዴማና» ገደ ገሻሰ ጌቲዛ ኣባ ገደ ዩጌን ዳሮ ሞሌይ ኦይኬቲዳ ገሻሰ ጌቲዛ ሞሌዛራ ጎቻና ዳንዳይቤቲና።

7 ሄ ዋዴ ዩሱሳ ካሊዛይታፕ ኢዚ ሲቁዛ ኢሶይ ጳጳርሳሰ፡ «ሄሲ ጎዳኮ!» ገደሰ። ሲሞና ጌቲቲዛ ጳጳርሲ፡ «ሄሲ ጎዳኮ!» ገዛ ቃላ ሲዩዳ ማላ ኦሶ ዲጎፎ ገዲ ማይኦ ቃሪ ዋሊዲ ካሎ ዲዛ ገሻሰ ሄራካ ማይኦ ኤኪ ማይኢዲ ኣባዛ ገደ ጉፒ ጌሊደሰ።

8 ዩሱሳ ካሊዛ ሃንኮይቲ ቃሴ ቢታፌ ጸቱ ሜቲሬ ማላ ሃኪ ዲዛ ገሻሰ ሞሌይ ኩሚ ዲዛ ጌቲዛ ጎቺ ኤኪዲ ዋጎሎራ ጋኪዳ።

9 ኢስቲ ዋጎሎዛፔ ዋጂሺን ሞሌይ ኢዛ ቦላ ዲዛ ቦንቆ ታማኔ ኡኬል በኢዳ።

10 ዬሱሲ ኢስታ፡ «ሃኢ ኢንቴ ኦይኪዳ ሞሌዛፔ ኣኔ ሃ ኤኪ ዪቴ» ጊዴሰ።

11 ሄሳ ጊሻሰ ሲሞና ጌቴቲዛ ጴጽሮሲ ዋጎሎዛ ጊዶ ጌሊዲ 153 ዋጋ ጊታ ሞሊቲ ኩሚዳ ጌቴዛ ኣባፌ ጌዴ ጋዴ ቦላ ጎቺዴሰ፤ ሄሳ ማላ ዳሮ ሞሌራ ዲንካ ጌቴዚ ዳኬቲቤና።

12 ሄሳፌ ጉዬ ዬሱሲ ኢስታ፡ «ሃ ዪዲ ሚቴ» ጊዴሰ። ኢዚ ጎዳ ዬሱሳ ጊዲዳይሳ ዉሪ ኤሪዳ ጊሻሰ ኢዛ ካሊዛይታፔ ኢሳዴይካ፡ «ኔ ኦኔ?» ጊ ኦይቻናሰ ጸሊዳዴይ ባ።

13 ዬሱሲ ዪዲ ኡኬል፤ ሞሊዛ ኤኪዲ ኢስታሰ ኢሚዴሰ።

14 ዬሱሲ ሃይቆፔ ዴንዲን ኢዛ ካሊዛይቲ ኢዛ በዪሺን ሃይሲ ሄቫንሉ።

ዬሱሲ ጴጽሮሳ ኦይቺዳ ኦይሾ

15 ኢስቲ ሚ ጊሺሺን ዬሱሲ ሲሞና ጴጽሮሳ፡ «ዮና ና ሲሞና! ሃይታንታፌ ኔ ታና ኣላ ዶሳይ?» ጊዴሰ። ኢዚካ፡ «ኤ ታ ጎዶ! ታ ኔና ዶሲዛይሳ ኔካ ኤራሳ» ጊዴሰ።

16 ዬሱሲ ኢዛ፡ «ጳሚዛይታ ታይታ ሄማ» ጊዴሰ፤ ናሞኣንሉካ፡ «ዮና ና ሲሞና! ኔ ታና ዶሳይ?» ጊዴሰ፤ ኢዚካ ዛሪዲ፡ «ኤ ጎዶ! ታ ኔና ዶሲዛይሳ ኔካ ኤራሳ» ጊዴሰ፤ ዬሱሲ ቃሴካ፡ «ታ ላቃታ ናጋ» ጊዴሰ።

17 ሄቫንሉ፡ «ዮና ና ሲሞና! ኔ ታና ዶሳይ?» ጊዴሰ። ኢዚ ሄቫንሉ፡ «ኔ ታና ዶሳይ?» ጊዳ ጊሻሰ ጴጽሮሲ ሚሼቲዲ፡ «ጎዶ! ኔ ኡባ ኤራሳ፤ ታ ኔና ዶሲዛይሳ ኔ ኤራሳ» ጊዴሰ፤ ዬሱሲካ ቃሴካ፡ «ታ ዶርሳታ ሄማ።

18 ታ ኔሰ ቱሙ ጋይሰ፤ ኔ ናቴላን ዳሼ ኔ ጌሌ ኔርካ ጊጸዳ ኔ ኮዪዳሶ ባሳሺን ኔ ጨሚዛ ዋዴ ጊዲኮ ኔኒ ኔ ኩሼታ ፒዲሲን ሃራ ኣሲ ኔና ጊጸሳናኔ ኔ ዶሶንታሶ ኔና ኤፋና» ጊዴሰ።

19 ዬሱሲ ኢዛ ሄሳሉ ጊዳይ ጴጽሮሲ ኣይ ማላ ሃይቆን ጸሰ ቦንቻናኮ ኢዛሰ ኤሪሳናሳ፤ ሄሳፌ ጉዬ ጴጽሮሳ፡ «ኔ ታና ካላ» ጊዴሰ።

20 ጴጽሮሲ ዩሺ ጸሊዲ ዬሱሲ ዶሲዛይሲ ኢዛ ካሊሺን በዪዴሰ፤ ሄሳዴይ ካሴ ኢስቲ ካዎ ሚሺን ዬሱሳ ሃይላኮ ሺቂዲ፡ «ጎዶ! ኔና ኣሌ ኢማናዴይ ኢዚ ኦኔ?» ጊ ኦይቺዴሰ።

21 ጴጽሮሲ ኢዛ በኢዲ፡ «ጎዶ! ሃይሳዴይ ዋናንዴ?» ጊዲ ዬሱሳ ኦይቺዴሰ።

22 ዩሱሲካ ኢዛስ፡ «ታ ሃ ሲማ ያና ጋካናዉ ታ ኢዛ ፓጻ ዋሊኮ ኔና ኣዚ ጋሊዴ? ኔ ታና ካላ» ጊዴስ፡

23 ሄሳ ጋሶን ኢሻታ ጊዶን፡ «ኢዚ ሃይቆ ሃይቁና» ጊዛ ዋሬይ ላሌቲዴስ፡ ጊዶ ኣቲን ዩሱሲ፡ «ታ ያና ጋካናስ ፓጻ ዳና ማላ ታ ኮይኮ ኔና ኣዜ ጋሊዳይ?» ጊዴስ ኣቲን፡ «ሃይቃካ» ጊቤና፡

24 ሄ ዮኦታ ጊሻስ ማርካቲዳይኔ ጸፊዳይ ሃ ዩሱሳ ካሊዛይሳ፤ ኢዛ ማርካቲሊካ ቱሙ ጊዲዳይሳ ኑኒ ኤርስ፡

25 ዩሱሲ ኦሊዳ ሃራ ዳሮቲ ዴቴስ፤ ታስ ሚሳቲዛ ማላ ኢዚ ኦሊዳ ሚሻታ ኡባ ኢሲ ቦላ ጸፊዛኮ ጸፊቲዳ ማጻፋታ ሃይሲ ኣላሜይ ቶካና ዳንዳዬና፡

ጌሻ ማጸፋ

Gamo: ጌሻ ማጸፋ Bible of Ethiopia, Ethiopic script

copyright © 2024 The Word for the World International

Language: Gamotso (Gamo)

Contributor: The Word for the World Northern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

d0ee6825-f93e-584e-8c8f-567d8d068e4b